

Жамоатчилик кенгаси:
Абдулла ОРИПОВ

Жамоатчилик кенгаси:
Нажмиддин ЖИЯНОВ
Азамат УМАРОВ
Минжохиддин МИРЗО
Феруза МУҲАММАДЖОНОВА
Аҳмад ОТАБОЕВ
Шуҳрат СИРОЖИДИНОВ
Аҳмад УСМОНОВ

Бош мұхарріп:
Собир ҮНАР

Бош мұхаррір ўринбосари:
Лукмон БЎРИХОН

Масъул котиб:
Акбарали МАМАСОЛИЕВ

Таҳрир ҳайъати:
Муҳаммад АЛИ
Иқбол МИРЗО
Абдусаид КЎЧИМОВ
Сироҷиддин САЙЙИД
Алишер НАЗАР
Ўрозбой АБДУРАҲМОНОВ

Саҳифаловчи: Фиёсiddин ОМОН ўғли

Ушбу сон "Ёшлик" журнали таҳририятининг
компьютер марказида саҳифаланди.

Манзилимиз:

Тошкент. ш.

Ўзбекистон шоҳ кўчаси, 16-а" уй.

E-mail: yoshlik-xatlar@rambler.ru

Tel/faxc: (8371) 227-0-227,
245-5-793, 245-0-552



© “Ёшлик” № 6 (268) 2013 й.

Ўзбекистон Ёзувчилар уюшмаси,
"Камолот" ёшлар ижтимоий ҳаракати муассислигидаги
ёшларнинг адабий-ижтимоий журнали
1982 йилдан чиқа бошлаган.

МУНДАРИЖА

БУГУННИНГ ГАПИ

Аҳмад АЪЗАМ. Гулзордаги алафлар 2

МУЛОҚОТ

Иброҳим ҒАФУРОВ. "Қодирий қошида қизармайсизми?" 7

ДРАМАТУРГИЯ

Қўчқор НОРҚОБИЛ. Сув кўрмай этик ечма 15

НАСР

Нурилла ЧОРИ. Бўрон тинган кеча. Ҳикоя 36

Асад АСИЛ. Ташналиқ. Ҳикоя 44

Ойгул УБАЙДУЛЛА қизи. Соғинч кўшиғи. Ҳикоя 52

Дилсора АБДУСАТТОРОВА. Туғилган кун. Ҳикоя 56

НАЗМ

Ҳол Муҳаммад ҲАСАН. Тоғлар тилим тушунгай. Туркум 12

Жаҳонгир ИСМОИЛОВ. Сен билан баҳордир умрим куз фасли. 34

Шойим ШЕРНАЗАР. Хушбўй насим тараалар дилга. 42

Замира РЎЗИЕВА. Субҳи ҷоғлар мужда кутдим насимларимга. 46

Икромjon АСЛИЙ. Интиқдирман ҳамиша баҳорингга, муҳаббат. 51

Гулчехра РАҲИМОВА. Порлок орзу-ўйимда сирлар кечгай тунлари. 54

Шавкат ОДИЛЖОН. Сиз тўзғисиз булултар мисол. 61

МУШОҲАДА

Абдулла УЛУГОВ. Шакл эмас, мазмун муҳимроқ. 31

НИГОХ

Зилола НАМОЗОВА. Поэзия ёхуд шеър умри. 40

ЖАҲОН ҲИКОЯЧИЛИГИ

Кэтрин МЕНСФИЛД. Садақа. Ҳикоя 48

БИРИНЧИ УЧРАШУВ

Алишер МУҚУМОВ. Дилга яқин ҳар битта сўзинг. 55

Махфузा ИМОМОВА. Чорляяпман латиф бир тонгни. 58

Феруза ТЎРАЕВА. Йўловчи. Ҳикоя 61

АДАБИЙ ҲАЁТ

Уйғун РЎЗИЕВ. Ҳаммаси болалар учун. 59

МУТОЛАА

Дилафрӯз ЗЕБАРОВА. "Оқ қоғоз кўнглимнинг туғилган ери". 62

ЕЛПУҒУЧ

Макс АДЛЕР. Уйқу арафаси. Ҳажвия 64

Босишга 08. 07. 2013 йилда рухсат берилди. Қоғоз формати 60x84 1/8. Нашриёт ҳисоб тобоги 8,7. Индекс 822.
ИССН 0207-9137. Журнал 2007 йил 4 майда Матбуот ва Ахборот агентлиги томонидан № 0253 рақами билан рўйхатга олинган.

Журналдан кўчириб босилганда "Ёшлик"дан олинди" деб изохланиши шарт.
"Ўқитувчи" НМИУ босмахонасида чоп этилди. Буюртма № 105-13. Адади 5750 дона.
Тошкент шаҳри, Юнусобод тумани, Янгишаҳар кўчаси, 1-уй.



Аҳмад АЪЗАМ

Бүгуннинг гапи Бүгуннинг гапи Бүгуннинг гапи



ГУЛЗОРДАГИ АЛАФЛАР

Гапни бир мисолдан бошласам, мисолки, сизни ўзингиз кўриб келаётган шунга ўхшаш жуда кўп бошқа мисолларга яна рўпара қиласди. Узр, шу гапим ҳам ўнговсизроқ чиқяпти. Лекин муаммони бирга, кўпчилик бўлиб ўрганишим керак-ку, боиси унинг шунча кенг тарқалганида, ҳаммамиз бирга ўйлашимиз лозимлигиди.

Хўш, янги бош директор эдим, студия ғаладонида маълум сабаблар билан беш йилми, кўпми “осилиб” ётган сценарийни ўқиб қолдим-да, дарров ишга тушириб юбордим. Киночиларга раҳбар бўлиб келишимдан илгари юзлаб кўрсатув, ҳужжатли фильм қилган бўлсам-да, ҳали бирор марта бадиий фильмни суратга тушириш жараёни тепасида турмаган эдим. Бир куни каттасиниб, шу фильм “сьёмка”сидан хабар олгани бордим. Жуда мураккаб юмуш экан: “моторстоп”, “бошладик-тўхтат！”, “қайтадан кетдик”, “дубл！”... Таниқли санъаткорлар ўйнаб беряпти. Улардан ичимда сал ҳайиқнам боис, раҳбардек ақл ўргатмай, чеккада қараб ўтиридим. Лекин бир жойи келди, сюжет бўйича “эру хотин” айтишиб қолади, шунда “хотин” “эри”га аччик қилиб, сиз кетсангиз, мен ҳам биттасини топиб оламан мазмунида: “Тешик мунчоқ ерда ётмайди”, деди. Суратга олиш тез-тез тўхтаб, саҳналар қайта-қайта олинади, орадаги танаффусда ўша “хотин” актрисага: “Синглим, сценарийдан чиқманг. “Тешик мунчоқ ерда ётмайди” эмас, “Тешик кулча ерда ётмайди” эди”, дедим. Актриса русча ўқиган, табиий, мумомаласи, тили ҳам ўрисча эди. “Йўқ, мен шундай дейман! Мунчоқ тешик бўлади (Нет, я так говорю! Мунчаки тишик бывают)”, деб менга ақл бўлди. Оббо, мунчоқнинг тешигини билар экан, лекин шундай мақол борлигидан тубдан бехабар! Тепадан

пастга тушмаса, қаёқдан ҳам билсин! “Фалончихон, бу – кенг тарқалган ҳалқ мақоли, ўзбекчани бузиб айтманг. Ҳа, мунчоқ тешик бўлади, лекин майдалигидан ерга тушса ҳам, кўринмайди, ётаверади. Аммо кулча – бу нон, шунинг учун унинг тешиккулчаси ҳам ерда ётмайди. Мабодо тушиб қолса ҳам, одамлар олиб, кўзига суртади”, дедим. “А я не хочу! Из-за какое-то узбекское слово не буду изменить свой язык”, деб, тил маданиятини оврупоча англар экан, айтганида турриб олди. Шунда режиссёр акамиз қулогимга: “Унча фарқи йўғ-у? Майли, ҳозир кўнглени хира қилманг, мунчогини дубляждга тўғрилармиз”, деб шивирлади. Биламан, тасвирга олиш жараёнида бироннинг аралашиши, ақл ўргатиши ножоиз, ҳам актрисанинг тарбия кўрган муҳити бошқа, табиийки, ҳалқницидан фарқли шароитда яшаётган бу “элита” вакилига минг тушунтирган билан фойдаси йўқ, она тилини шунча янтоққа судраб гапиришини ҳам унга бир марҳамат кўрсатиш деб ўйлади. Турган гап, мендан ранжиб қолди. Рост-да, шундоқ таниқли санъаткорни қанакадир авом сўзни айтишга мажбур қиласпман... Асли бу томорқа режиссёрги, унга сценарийдан чиқмасликни тайинлаб, қайтдим.

Фильм суратга олиниб бўлди, йиғма, яъни монтаждан ҳам чиқди. Энди “овозлаштириш” (“озвучивать”нинг таржимаси-да бу сўз), яъни фильмга овоз бериш, дубляж гали келди. Биласиз, актёр энди экрандаги ўзига қараб яна “ролга кириб” овозини ёздиради (ҳозир кўп фильмларда бу қоида қолиб кетган – актёр ёдламайди, матнни олдига қўйиб ўқиверади, шундан диалоглар сунъий чиқади). Хўш, шунда режиссёр акамиз ҳузуримизга қадам ранжида қилдилар: “Шу, укајон, бир илтимос: шу, актёrimиз

Аҳмад АЪЗАМ

Атоқли адаб, мұнаққид, журналист. 1949 йили Жомбой туманидагы Ғазира қишлоғида туғилган. Самарқанд Давлат университетида таҳсил олган. Ўзбекистон Ёзувчилар уюшмаси аъзоси. Адабнинг “Ойнинг гардиши”, “Бу куннинг давоми”, “Асқартот томонларда”, “Соясими йўқотган одам”, “Ҳали ҳаёт бор”, “Ўзи уйланмаган совчи”, “Рўё ёхуд Гулистанга сафар” каби асарлари ўқувчилар эътиборини қозонган.

ўз шевасида гапирса!”. “Гапиравермайдими, ким унинг оғзига хўжайн? Мендан нимага сўрайди?”, дедим ажабланиб. “Йўқ, фильмда ўз шевамда овоз берсам, шунга бош директордан рухсат олиб беринг, деяпти”. Ана холос! Қаёқка келиб қолдим! “Сценарий тоза адабий тилда ёзилган, тилни бузиб нима қиласди?”, дедим. “Ўз шевамда овоз берсам, чапанилигим самимий чиқади, деяпти. Арзимас гап-ку! Йўқ деманг энди сиз”, деб ялинди режиссёр акамиз. Бу кишим ҳам актёр томонида! Рухсат сўраганига ҳам раҳмат – анов кунги баҳс эсида-да. “Ака! Давлат тили ҳақида қонун бор, бунга адабий тилга риоя қилиш ҳам киради. Қонун ҳар қандай бош директордан, ундан катталаридан ҳам баланд туради, уни бузишга ҳеч кимнинг ҳаққи йўқ. Кейин фильмда шевада гапириш чапанилик эмас, маданиятсизлик. Қаҳрамоннинг чапанилигини тил бузишда эмас, ижрода кўрсатсин эди”, дедим. Режиссёр акамиз босиқ-вазмин одам, бўлди, тушундим, деди-да, чиқиб кетди. Ўзимнинг ичимдан нималар ўтганини англаб турибсиз: бу шунақа, менга бегона бир дунё экан! Ҳалиги санъаткор жўрамиз ҳам, турган гап, бош директор ошириб юборяпти, шевага қарши, мана, шевада шунча фильм олиняпти-ку, бирор бирордан қонунга бўйсунишни талаб қиляптими, деб ёзгиради.

Овоз беришда у жумлани бузмади-ю, лекин башибир талаффузни шевача қилди. Буни тўғрилаш, албатта, мумкин эди, аммо сут билан кирганни чиқариш... ўзингиз биласиз. У кишим сал ўтиб бир мустақил телеканалда кўрсатув олиб бора бошлиди, албатта атайин шевада ва... мана бўлмасам деб, мустақил бир газетада “Мен атайлаб шевада гапираман” деган чиқиш ҳам қилдилар.

Бу мисол ўша, етти-сақкиз йил олдин урчиб бошлаган, кўп одамларга арзимас туюлган ҳолатларнинг бир кўриниши эди. Эндиға келиб, уни юз ё мингга кўпайтириңг, ўзимиз кўнинкан, кўниқаётган манзара – киночилигимиз тилининг кундалик манзараси кўз олдингизга келади. Не тонгки, тил ҳам айниб, маънавий тарбияга зид шалоқ аҳволга тушган!

Мен бу мисолни ўзингиз биладиган муаммони яна бир ўйлаб олиш таклифида айтяпман.

Юксак минбарлардан ҳам айтиляпти, матбуотнинг ўзида гапириляпти, бонг ураётганлар чиқяпти, аммо ўз – ўзбек тилимизнинг бугуни ва эртаси борасидаги бу ташвишу даъватлар ўзимизнинг лоқайдлигимиз ботқогига чўкиб кетаётир.

Дод деб юборгинг келади – қоғозга додлайсан одам! Қоғознинг эса фақат қулоғи бор, оғзи йўқ – садо бермайди! Ахир, ҳамдардга додлайсан-да, одам!

Тилда атай бузғунчилик билан давлат қонунини бузиб, бунақа кинолару қўшиқларни ясад ташлаётган, ҳаммаёқни чет атамалару чаласавод ёрлик, реклама матнларига тўлдираётган, алламбало алфозда жилд-жилд босмаларни “бадиий асар” деб чиқараётган, эфирда қанақадир яроқсиз “ўзбекча” вағиллаб турганлар шу лоқайдлик ботқомизда гуркираб ўсаётган алафлардир ва уларни инсофга чақириш, тарбияли бўлишга ундаш, тил – бу тафаккуrimiz замини, миллий бойлигимиз – ўзлигимиз, уни

бузиш эмас, қўриқлаш, асраш, тозалаб туриш лозимлигини уқтириш ҳам бефойда. Худди мен ёзаётган шу гапларни ҳам деворга гапираётганим каби.

Албатта, шевада гапирсинглар, тўйиб гаплашинглар. Зоро, шевалар тилнинг илдизлари, тўғрироғи, булоқлари; улар ҳам куриб қолмаслиги лозим. Лекин афсуски, шеваларни ҳам ОАВнинг сунъий тили танглика солиб қўйган, глобаллашувни рўкач қилиб, унинг панасида ёт атама, ёт ибора, бузук биримкалар уларга ҳам бостириб кираётир. Ҳаётнинг равиши – кексалар ўтиб кетади, катталар кексаяди, изимиздан келаётган ёш авлод “глобаллашиб”, ўз шевасини майиб-майриқ қилиб гаплашади – бу булоқларнинг ҳам куриб бошлаганини шундан ҳам билса бўлади.

Гапжамоат минбариэгаси адабий тилэкани ҳақида кетаётир! Миллатнинг таркиб топиш омили ва шу миллатдаги бошларни бир-бирига қовуштириб келаётган тилимиз ҳақида. ОАВ минбарига чиқкан, кўпчиликка юзланган одам, агар ўзини хурмат қилса, марҳамат қилиб адабий тилда гапирсин! Минбарга етган одамнинг елкасида умуммиллат юки бўлиши зарур! Мактабдан олий ўқув юртларигача, мажлису йиғинлардан расмий тадбирларгача давлат тилида бўлиши лозим ва лобид! Давлатимизга мадху сано ўқиманг, унинг тилига амал қилинг. Ахир, кеча уни химоя қилиб кўчага чиқкан ўзимиз эмасми! Ҳамма дарслар адабий тилда ўтиладиган, устозлар ўқувчилар шевасини адабий тилга буриб, уни ўргатадиган чиройли қонун мажбуриятлари қаерда қолди? Энди буни қилиб бўлмайди, деб ўйлайсизми? Йўқ, бўлади! Мен эски шаҳарнинг қоқ марказида тураман, шу маҳалладаги мактабда мучал тадбири бўляпти экан. Таклиф қилдилар, бордим. Икки соатча ўтириб, ўқитувчиларнинг гапларни, болаларнинг сўзга чиқишлиари, шеър ўқишлиари ва қўйган саҳналарини томоша қилдим. Болаларнинг ҳаммаси шу атрофдан, асосан туб тошкентлик оиласардан, ўқитувчилар ҳам шундай. Лекин бир оғиз ҳам шева эшитмадим. Ҳайрону хурсанд бўлиб ёнимда ўтирган ўқитувчига: “Қандай яхши, болалар мактабда адабий тилга риоя қилар экан”, десам, ўқитувчи сапчиб тушди: “Вой, нима деяпсиз, мумкин эмас! Дарсларни адабий тилда ўтамиш, ҳовлида ҳам болаларнинг адабий тилни бузиб гапиришига йўл қўймаймиз. Ахир, бу давлат тилимиз-ку!” деди. Бўлар экан-ку! Қойил бўлдим, лекин қани эди ҳамма мактабда шундай бўлса! Афсус!

Асли муаммонинг туби чуқурроқ, масала тилнинг сут билан қаҷондан кириши, боланинг она тилини қаердан ўрганиб бошлашида. Бешик тебратадиган келинларнинг бир қўли бешиқда, икки кўзи телевизорда – алла айтиш фақат кўрик-танловларда қолди. Оналар рўзгордан бўшамай ҳам телевизорга қадалиб олади. Бола бир нарса сўраса, бошимни қотирма, бор кўчага, ўйна ё дарсингни қил, деб ҳайдайди. Эркаклар иш билан, боласи билан гаплашиб ўтиришдан ўзини олиб қочади. У ҳам хотинига қўшилиб сериал кўради. Эртак айтиб берадиган бувилар ўзи азалдан сийрак, экранга кўзи ўтгани... бунда ҳам ўша аҳвол. Булар ҳам ўтиб кетяпти. Дастурхон устидаги гурунглар йўқ бўлиб кетди. Бола қаердан тил машқини



олади – у ҳам ноилож, телевизорга тикилади, сал эси киргани компьютерни титкилайди, суррогат нарсалар онига қуилаверади, жумладан бузук тил ҳам.

Албатта, ота-она болаларига эга-кесим ундоқ бўлади, тил қоидалари бундок бўлади деб ўргатиб ўтирамайди. Аксинча, боланинг тили табиий мухитда: ўзаро мулоқот, сўзлашув, ўйинлар, ҳангомаларда камол топади. Ва мактабда бу тарбияни олади. Тўғрироги, олиши лозим. Мактабларда эса тил ўқитилиши ўқувчи болалар учун оғирлик қиласидан, зे-рикарли қоида-ю боғланишлар изоҳига ўтиб қолган. Азалдан бери шундай. Мактаблар жонли мулоқот тилини ўргатмайди, эгаю кесим, гап бўлакларини кўрсатиб беради, холос, бинобарин, тирик тилга муҳаббат ҳам уйғотмайди,

Фикр шакланиши, тилни билишнинг яна бир муҳим омили – китоб, бадиий асар. Ҳозир ўқувчиларнинг аксарияти китоб ўқимайди, бадиий асарларни варақлаб кўрмайди. Устига устак, дарслик – хрестоматиялар ҳам камбағал, улар ном санаш билан, ўтмишдаги катта адибларимизнинг ҳозирги ёшларнинг дунёқараши, қизиқиши, дунёбинлиги, кўнгил кечинмаларидан йироқ асарлари билан тўла. Ёшлар ўқийдиган нарса кам. Мана, бугунги кунга келиб шу мактаблар эккан арпа ҳосилини ўряпмиз-да, ёшларимизнинг тили бунча камбағал, бунча сунъий деб, нимага булар беодоб бўлиб кетяпти, деб ёзгарамиз. Қўшиқ айтаяпман деб алмойи-алжои шанғиллаб ётганлар, уларга шайдойи қарсак уриб, ўйинга тушаётганлар нафақат тил масъулияти, тил номуси нималигини, балки унинг ўзи нималигини ҳам билмайдилар. Фулийликни ўзи ихтиёр қилиб танлаган ва шу билан фаҳрланадиган манкурт тоифа! Бу ўзимиз етиштираётган авлод.

Миллат руҳининг ифодаси бўлмиш адабий тилни бузмай, бўлакламай ривожлантириш керак. Зоро, у давлатчилигимиз асоси ҳамдир. Тўқсон икки бовли ўзбекни бирлаштирган! Энди бу ўзбекнинг ҳар элати мактабдан бошлаб ўз шевасида гапириб, ўқиб-ёзадиган бўлса, кейин адабий тилни ҳар ёққа тортқиласа, тасаввур қиласиз-ку қаёққа ўтиб кетишимишни! Ўзи-ку шўро яхлит яшаб келаётган туркий миллатни сен алоҳида, сен алоҳида, мана, сенга битта республика, камроғингга, мана, мухторият деб улусларга бўлиб, орага кутқу уруғини қадаб қўйган эди. Туркистон туркийлари ҳар бири алоҳида миллат бўлиб олди, майли, бу миллатларга ҳам баракасини берсин. Лекин ягона туркий тил бўлакланди, ҳар бўллаги ўзича иҳоталаниб олди. Бир-бирини балодай тушунган эллар бугун қон-қардоши тилини луғатсиз англаши мушкул. Майли, ҳар бири ўз давлатида униб-ўссин, тараққий топсин, лекин умумтуркий тил бирлигини йўқотмасинлар. Бу тил Туркистондай улкан ҳудудда умргузаронлик қилаётган миллатлар тафаккури ривожининг гаровидир. Бу тил бирлигига раҳна солиши бугунги кунда ҳар бир туркий миллатнинг ўзини ичдан парчалашга ҳам олиб келади. Ўтмиш тарихларда бу неча бор қайтарилган, ялакатмағиз катта улуслар парчаланган.

Умумтуркий дарёning ариқларга бўлаклаб ташлангани етмагандай, чиғатой тилини адабий тилга

айлантиришда лексик бой имкониятлар яна ҳам торайтирилган, бугунги ўзбек адабий тилига асос қилиб қарлуқ-чиғил шеваларигина олинган. Масалан, жуда улкан ареал-қипчоқ лаҗжаси шеваларининг аксари бойликлари адабий тилга киритилмагани бизни қозоқ, қирғиз, қорақалпоқ, татар, бошқирд, олтой тиллари... умуман Россиянинг марказий, жанубий, шимолий ҳудудлари, Олтой ўлкалари, Мўғалистон, Хитой ҳудудларида яшаётган туркий ҳалқ, эл-элатлардан орамизни узоқ қилиб, лексикамизни ҳам торайтириб қўйган, бинобарин тилимизнинг ифода имкониятлари чекланиб қолган. Жаҳоннинг етакчи тиллари қаторига чиқа олмаслигимиз сабабларини ҳам шу ердан излаш керак. Бу менинг эмас, тилчи мутахассислар фикри ва бу ҳақиқат. Айни пайтда лексикографиямизга ўғуз шевалари бойликларидан жуда оз киритилгани учун, мана, бугунги кунга келиб усмонли турк ва туркман тилларини гаплашганда англашимиз қийин, ўқишида эса луғатга муҳтожмиз. Бу “илмий” тадбирлар оқибатида адабий тилимизнинг сўз бойликлари камбағаллашиб, ифода имкониятлари яроқсиз аҳволга тушиб боряпти. Гап тилимизнинг чиндан-да бугунги замон талабларига жавоб беради олиши ё бера олмаслиги борасида кетаётир.

Тескари иш қиляпмизми дейман. Тепада мен келтирган мисол майда, аммо катта ҳам майдадан каттаради. Ҳозир биз ОАВ, ТВ-радио тилини ҳар биримиз ўз маҳалламиз, ўз туман-вилоятимиз шеваларига тортқиласак, бу майдаликлар ёриғи эртага бориб жарликка айланади. Алалоқибат ўзбек миллатининг ҳам бир бутунлигига таҳдид солади. Бу ваҳима гап ё муболага эмас, энди уч бериб ўсаётган хавф. Наҳотки бўрини кўриб туриб ўзимизни асрамасак, узоқ ва яқин ўтмишдаги бўлнишлар сабоқ бўлмаса!

Соҳибқирон бобомизнинг: “Бизким, малики Турон, амири Туркистонмиз, миллатларнинг энг қадими ва улуғи туркнинг бош бўғинимиз” деган гапларини айтиб фаҳр қиламиш-у, бу ўғит-васиятни танимизга олмаймиз.

Туркий чиғатой, яъни ҳозирги ўзбек тилимиз ўтмишда барча туркий эл ва элатларга тушунарли бир ўзак тил эди. Турк Юнус Эмро, туркман Махтумкули, озар Фузулий, қозоқ Абай, қорақалпоқ Бердақ битта тил дарёсидан баҳра олган ва бугун уларни ўғириш ҳам унча шарт эмас. “Алномиши”, “Гўрўғли”, “Манас”, “Ўғузнома”, “Қўрқут ота” бир тил заминида яратилган. Бу тилнинг бош бўғини – шу, она тилимиздир. Уни асраб-авайлаш, унинг шева-лаҗжаларининг тоза булоқларидан яна сув олиш, фақат ўзимиз учунгина эмас, қардош тиллар ривожи учун ҳам ниҳоятда керак. Тилда олди-берди ўзимиз учун ҳам сув билан ҳаводек зарур.

Негаки тилимизнинг оҳори тўкиляпти, тақирланиб бораётир. Гулу чаманзор бўлиши лозим замин сувсиз биёбонга айланади. Гап фақатгина чет истилоҳлар истилосида ҳам эмас, тилимиз ичдан ҳам емирияпти: “Мен ёлғиз қолишни хоҳлайман” – нима дегани бу, эри ўлиб, бева қолишни истаяптими ёки ёнимдан кетинг, демоқчими? Қайси тилда бу? “Мени ўз ҳолимга (тинчимга) кўйинг” деса бўлар эди-ку! Йўқ, шунақа

бесўнақай гап қулоғимизга ҳар куни қайта-қайта қуилади, шундай гапириши одатга айлантиради. “Айиқларнинг билиш қобилиятлари жуда ривожланган”, “Юзлаб шундай иплар осилиб туришади” (Форда тепадан силқиб тушадиган олтингугурт кислотаси ҳақида), “Барнео қурбақалари мана шундай имоишоралардан фойдаланишади”, “Улар истаганча яшашимга имкон беришади” (баланд биноларга тирмашиб чиқадиган анув одам ўз оиласи ҳақида) “Хозир кайфиятингни кўтаришга ҳаракат қилиб кўраман”, «Қайнатилган қозондаги сув бунчалик буғланмайди», “...дастлабки мағлубиятни қабул қилиб олган”, “Анча паст туриш ҳолатига эга” (боксчи ҳақида), “Табиатга нооқилона муносабатда бўлиш...”, мен бу ўламса бирикмаларни эътиборингизни тортиш учун мисол қиляпман. Бўлмаса ўзингиз ҳам ҳар куни мудом эшиласиз. Нафақат ортиқча, сунъий сўзлар, балки жумланинг таркиби, лексикаси ҳам бузуқ. Шу бузуқлик урфга, коидага айланиб, тилимизни чок-чокидан сўкиб юбораёттир.

Бир эътибор беринг: “Янги йил муборак!” Ҳамма ерда шундай ёзадиган бўлдик. “Бўлсин”ни қўшмаганимиз боис жумла маъноси силжиб, йил бизга эмас, ўзига муборак бўлиб қоляпти. Худди гапиришга арзимайдигандек туюлади бу ҳам. Лекин шундай ёзиш ва ўқиш одатта айланиб бораётгани одамни сескантиради. Бир синглимиз чиқишини ҳе-бе йўқ, саломсиз: “Омонмисиз, азизим?”, деб бошлайди. Салом қани? Нима, биз экранга қараб ўтирганлар уртўполон муштлашувдан чиқдикми, омонлигимизни сўрайди? “Мен сизлар билан хайрлашаман” – гўё бизга қараб ўн киши гапираётган эди, шулардан биттаси биздан аразлаб қолди! Нимага хайрлашади, юз кўрмас бўлиб кетгулик қилганимиз йўқ-ку? “Хайр” билан “хайрлашаман”нинг фарқига бормаса, “Кўришгунча, омон бўлинг” деб қўя колсин – шу кифоя-ку!

Демокчиманки, ўз тилимиздаги сўз, ибора, бирикмаларнинг маънисига бормаслик кўникма бўляпти ва бу, айланиб келиб ёшларнинг тилини бузяпти. Каталар эса эътиборсиз.

Шу гапларни айтяпман-у, лекин, масалан, менга телевизорда футбол матчини шарҳла, десалар, ўзим ҳам шу “Коптокни боши билан уриб киритди”, “Коптокни оёғи билан олиб қочди” каби сунъий иборалар тортанагида типиричилаб қолсам керак. Чунки тинмай тақрорланадиган шу “зарба-ю кучли зарбалар”дан каллам гангид, очиқ гап, шарҳнинг ҳақиқий тили қандай бўлишига ақлим ҳам етмай қолган. Жумла ўзбекча, шарҳловчи (шуни бемалол “шарҳчи” деса ҳам бўларди) ўзбек, сўзлари ҳам ўзбекча, лекин шарҳи ўзбекча гапиришга ўхшамайди. “Футболчи тўпни ўйинга киритади”, оёғидан, бошидан, умуман ҳамма ёғидан нуқул “жароҳат олади”, оёғи қайриладими, лат ейдими, эти ё пайи чўзиладими, боши ёриладими, суяги дарз кетадими, фарқи йўқ – “жароҳат олади”, тамом! Бошқа сўзни қўлламаймиз. Ҳолбуки, тилимизда “жароҳат” – очиқ шикаст. “Жароҳат” билан “яра”нинг ҳам фарқи бор. Ҳужум қилинмайди, балки “уюштирилади” ё “амалга оширилади”. Барака топгур, жилла қурса, “хужумга ўтди” де, нима қанақа “амалга оши-

рилаётганини” кўриб турибмиз-ку. Яна қаранг, икки боксчи муштлашяпти, биттаси кўпроқ мушт еяпти, “зарбаларни қабул қиляпти” экан, чидаш беряпти, “ютқизиш ниятидан воз кечмоқчи эмас”, деб, кейин гўё тўғриланади: “ютқизиш ниятидан чекинмокчи эмасга ўхшайди”. Эй жўра, гапинг ўхшамайди, ахир, боксчи “ютқизиш ниятида” эмас, балки ютаман деган умидда ўртага тушган.

Ўн ийлардан ошиб кетди, русча “добroe утро”, “добрый день”, “доброй ночи”, усмонли туркчадан “иий сабахлар”, “иий гунлар”, “иий гежалер”, “иий акшамлар”, “иий уйкулар”, (“иий” – эгзу, эгулик; туркчада тилак билдиришнинг “хайрли...” муқобили ҳам кенг қўлланади) ёзма тилимиздан “хайрли тонг”, “хайрли кун”, “хайрли тун” тарзида, хусусан ТВнинг кино ва таржима сериаллари туфайли болалаб, ёзма тилимиздан жой олиб бўлди. Усмонли туркий бизга тушунарли, чунки туби бир тил. Лекин сўз қўллашдаги тафовутларни бефарқ таржимонларимиз фарқлаб ўтирумайдилар. Энди бу ясамалик оғзаки тилимизга ва ҳатто шеваларга ҳам ўтиб кетаётир.

Чет истилоҳларнинг она тилимизга киришига меъёрида йўл кўйиб бериш билан уларни ўрганишни аралаштираслик керак. Лекин масала шундаки, чет истилоҳни, ўз онингизда айни луғавий маъно ифодаси – миллий сўз бўлмаса, қандай англайсиз, ўрганишда нимага суянасиз, хорижий истилоҳни нимага қиёсан тушунасиз? Англанган онг – тафаккурнинг сиyrати, бу сўз. Миллий Сўз чет тилни ўрганишда замин, шу боисдан ҳам она тилимизни қанча теран билсак, чет тилни шунча пухта ўзлаштирамиз. Бу оддий аксиома. Мана ўйланг, масалан, ўзи асли ўзбек бўлатуриб, болалигидан русча боғчага қатнаб, русча мактабда ўқиб ва, табиийки, кейинги ҳаётি давомида европоча ҳаёт (бу ҳам бир гибрид тушунча, таъсири жихатидан кўпроқ саёз русча) муҳитида яшаган одамларнинг тили ҳаминқадар, фикрлаш тарзлари на у, на бу бўлиб қолади. Тил заминидан оёғи узилгандан кейин тафаккур таркиби ҳам ўзгаради, бузилади. Бунга, масалан, бадиий адабиётимиз ҳам бир мисол. Ўзи ўзбек бўлатуриб бошқа тилда ёзган истеъоддларнинг асарлари ўзбек заминида унча илдиз ота олмади, ҳатто уларни таржима қўлганда ҳам ташқаридан қараш, бадиий тафаккур бегоналиги аён сезилиб қолади.

Миллий истилоҳларни излаб топиш, янгиларнинг қандай илдиз, аффикс, суффикс, префикслардан ясалишини тилчиларимизга кўйиб берайлик, бу иш уларсиз битмайди ҳам. Бизнинг фикрларимиз ундаш, холос. Миллий тилнинг тасарруфда келаётган сўзларидан сўз ясаш, буни билган тилчиларимиз учун тинкани қуритадиган оғир, кенг қўламли, лекин қилиб бўлмайдиган иш эмас. Худди шундай, шеваларимиздан сўзлар олишнинг меҳнати бор, менингча. Яъни улар адабий тилнинг меъёр, қоидалари ва орфография шартларига мослаштириб истеъмолга киритилиши лозим, бу ҳам мутахассислар юмуши. Лексикографиямиз аҳволини қайта қараб чиқиш, уни бойитиш нечоғли долзарб бўлмасин, бу борада ҳам чумчукни қассоб сўйгани маъқул. Фақат тайсалла-маслик лозим.



“Ўқувчи”, “ёзувчи” каби нисбатан “ёш” ўнлаб истилоҳлар илк истеъмолга киритилганда булар ҳам ғалати туюлган бўлса керак: “адиб”, “нависанда”, “талаба”, “толиб” каби ўрганган сўзларимиз турганда буларга на ҳожат, деб. Лекин ҳозир муомалада табиий бўлиб кетди, арабий “адиб”, “талаба”га қараганда кенгроқ кўламда истифода этилади. Шеваларимизда эса адабий тилдан четда қолаётган бошқа муқобиллари ҳам бор: “ёзарман”, “ўқирман”. Негадир, шу “...ман” қўшимчали сўзлар адабий тилда жуда сийрак, бу суффикс имкониятларидан янги сўз ясашда фойдаланмаймиз. Аҳоли тилида эса кенг қўлланади: “Бу сотарман, у оларман бўпти. Бу оларман, қиз тегарман”, мана, “Зоминнинг тил қомуси”да шунақа “...ман” қўшимчаси билан ясалган, адабий тилга кирмаган йигирмадан ортиқ сўз келтирилади. Яна бир мисол “...гилик”, “...гулик” каби қўшимчалар билан ясаладиган “боргулик”, “кетгулик”, “келгулик”, “ўтгулик” (“ўтгилик”) адабий тилда жуда сийрак, ахён-ахёнда, бу ҳам бадиий асарларда қўлланиб қолади. Истамбул кўчаларида енгил уловлар кўчада қатор териб сотувга қўйилган, ҳаммасининг олд ойнасида “сатилик” деган ёзув. Демак, сотилади, тушунарли, лекин бизга ўхшаб “сотилади” деб китобий эмас, нимадир туб туркий, бизда унинг айнан шундай лўнда муқобили борми-йўқми деб роса ўйлаганман. Яқинда “Қашқадарё ҳалқ сўзлари”ни варақлаб, айниятини топиб олдим: “сотқилик!” Ўзимизнинг сўз! Ёнимизда турган! Ҳалқ бемалол қўллайди. Биз эса русча “продажа”дан олиб, “уй сотилади” (“дом продаётся”), “сотиладиган уй” (“дом на продажу”) деб бирикмани сўлжайтиранмиз. “Балиқлар тозаловчилик вазифасини бажаради” – бу не жумла эканини баҳолашни ўзингиз “амалга оширинг”!

Бунақа ҳолатларда, майли, луғат титкиламайлик, ўзимизга қулоқ солайлик: сўзлашув – жонли авом тилимиз минг кўргуликка дуч келаётган бўлса-да, ҳали ҳам бой, асл сўзларимизнинг маъноси теран, кўлами кенг. Адабий тилнинг ўз замини – авом тили, ҳалқнинг жонли тили ҳисобига бойиб, ривожланиб бориши ҳам қонуният-ку.

Излаш, изланиш керак. Сўз ҳам тирик, тил дарёси оқимида нафас олиб яшайди, таъбир жоиз бўлса, уччиди ҳам. Биз эса ўз сўзларимизни жонсиз қиласяпмиз ҳамда уларнинг устига кўп кушандада қўйиб юборяпмиз.

Бугунги кунда гўё соф ўзбекча сўзлардан тузилган бирикмаларнинг сунъийлиги, бир сўз ифода қиладиган тушунчани тўрт-беш сўз билан ифодалашга ўтиб кетаётганимизга ажабланасиз. “Ўзбекистон ҳаво йўллари” қирқдан ортиқ йўналишда парвозларни амалга оширади”, “Ўзбекистон ҳаво йўллари” истиқбол сари дадил қадам ташламоқда”, “Бундай уйғунлик ҳамма ўсимликлар томонидан амалга оширилавермайди” – сиртдан ўзбекчага ўхшаган мазкур жумлаларни тилчи олимларимиз бир лексема қоидаларига солиб текширсалар, нима бўляпти ўзи деб ташвишга тушиб қоладилар.

Сўзга эътиборсизлик, бефарқлидан у ўлиши ҳам, аникрофи бошқа сўз унинг ўрнини эгаллаб, ўлдириши ҳам мумкин. Мана, ҳаммамиз “ахлат”ни оғизга оладиган ва бундан ҳазар қилмайдиган бўлиб кетдик: “Ахлат ташлама! Ахлат мошин келди.. Ахлат чеълакни олиб тушаман”. Миллий ахлоқу одобимиз тагида покизалик ётади. Ахлат эса – бу нажосат. Маъносини билган одам шу сўзни ёзишга ҳам ийманади. Ахир, уйимиздан чиққан сабзавоту мева пўчоғи, овқат сарқити, супуриндини шундай деяпмиз! Фариштали келинлардан тортиб, нуроний, тақволи буваларгача. Жонли, авом тилида ҳам, ОАВ ёзма нутқида ҳам беэътибор “ахлат” деб кўллайверамиз. Ҳолбуки, тилимизда асл маъносини берадиган “чиқит”, “чиқинди” каби беш-олтита истилоҳ беэга ётибди. Аммо буларнинг устидан русча “мусоръ”дан кўчирма ўгирилган “ахлат” босиб қолди. Қизиғ-эй, “тезак”, “тезаклади” турганда капитару чумчуқдан каркидану филгача – ҳаммаси “ахлат ташлайдиган ё сочадиган” бўлиб кетди. Дарвоқе, ТВга раҳмат, яқиндан бери орасира “чиқит”ни кўллайдиган бўлди.

Она тилимизга муносабатимизни тубдан ўзгартиришимиз лозим. Тилимиз хароб аҳволга тушиб боряпти, уни қайта жонлантириш учун ҳаялламай иш бошлаш керак.





“ҚОДИРИЙ КОШИДА ҚИЗАРМАЙСИЗМИ?”



Адабиётшунос олим, таржимон Иброҳим Ғафуров билан сұхбат

– *Иброҳим ака, Сизни сүз мұхіблари закий мұнаққид, етуқ таржимон, моқыр адіб ва танглайи китоб билан күтариլған зиёли деб билади. Ижозатингиз билан бадиий таржима мавзусида сұхбатлашсак. Менімчә, таржимага асар танлашингизнинг ўзи бир мактаб. Ҳамиша “баланд дорға осилгансиз” – муаллифларни чертиб-чертиб танлайсиз, құлға илинган асарни ең шимариб, таржима қилиб кетавермайсиз. Айтматов, Достоевский, Жойс, Маркес, Мопассан, Распутин, Сартр, Тургенев, Фолкнер, Ҳемингуэй... Салафларни ўзбекча гапиришиб, таржимани “түйға боргудек” даражага етказғунча, ишлар давомида игна билан қудук қазидингиз. Саволим “иши битиб, улови лойдан ўтган” китобхонининг ношукурлығига ўхшаб қолса, маъзур тутасиз. Таржимага харжлаган қувват өзүрдеги таржиматни бадиий ижодға ўналтирганингизда, бўй баравар мағзи тўқ романдар ёзишингиз мумкин эди. Умрингизнинг талай иили ўзингиз қолиб, бошқа адилларни юзага чиқаришига кетганидан жилла бўлса-да ачинасизми?*

– Дунё марҳаматли ва ранг-баранг ва марҳаматли. Ҳар кимнинг чекига нимадир тушади. Чекимга сүз ва нафосат дунёсида танқид, таржима ва мансура тушган. Романдар ёзилмаганидан афсусланмайман. Романдарга ғоя бўла оладиган фикрлар устидаги ишлаганман. Мансураларнинг гали келади. Таржималарнинг ҳам гали келади. Таржималаримда жумла, жумлаларда нурли рӯҳ ва кучли ифодавийлик, бутунлик, бадиият бор. Шунчаки таржима эмас улар.

Мўъжизакор илоҳий Қуръон одамзодга нозил қилингандар асрда Исҳоқ Шомий деган ажойиб таржимон ва донишманд ўтган. Унинг ҳикматларини улуғ

олим ва тадқиқотчи Сергей Аверинцев кўхна оромий тилидан русчага ўгириб қолдирган. Исҳоқ Шомий ҳикматлари теранлигининг қиёси йўқ. Кўхна оромий тилини билмайман. Аммо Сергей Аверинцев таржимаси воситасида бу мўъжизага ошно бўлдим. “Юрак яшаган чоғда, ҳиссиёт тугайди. Ҳиссиётнинг жонланиши юрак учун ўлим. Ҳиссиёт жонланган чоғда, бу Худо олдида юрагимизнинг ўлгани белгисидир”. Оддий сўзлар билан айтилган поёнсиз ҳикмат. Буни илк бор ўқиганимда, ўзимни ҳеч нарса ёзмагандай ва ёзмаслигим керақдай сезганман. Бундай сўз олдида ҳар қандай кибр, ҳар қандай димоғдорлик, ҳар қандай ифтихор маъносиз, тамомила маъносиз бир нарсага айланаб қолади. Исҳоқ Шомийдан беш юз ийл кейин чўл тўрғайдай ҳаволаниб инсон сирини очган Яссавий ва Боқирғонийни, Мажнуннинг Мажнунлигини тушунгандай бўлади одам. Мен Исҳоқ Шомийнинг мўъжиза сўзларини ҳали тушуниб етганим йўқ. Байрон ҳиссиётни саждага айлантиради. Ҳар сўзи демонсирайди. Сўзнинг соҳирсоз оламларида ҳар қалам рангин тажриба-да.

– *Бир сұхбатингизда таржима пайти ҳар бир сўзни тегирмонга дон согландек юрагимга солиб, тинимсиз айлантираман, деб ташбих қилгандингиз. Мусоҳаба баҳона ижодий лабораториянгизга бирров бош суқишига изн берсангиз. Ҳемингуэй “Алвидо, қурол!”нинг хотимасини ўттис тўққиз марта ёзib чиқкан экан. Сўзга ниҳоятда талабчан Маркес “Бузрукнинг кузи”ни бошдан-оёқ ўн беш топқир таҳрир қилган экан. Одатда, қўлёзмаларни қайта-қайта таҳрир қиласизми? Дейлик, “Бузрукнинг кузи” роман-эпопеяси таржимаси қандай кечган?*

Иброҳим ҒАФУРОВ

1937 йили Тошкентда туғилган. “Гўзалликнинг олмос қирралари”, “Унумилмас боф”, “Жозиба”, “Она юрт куйчиси”, “Ёнар сўз”, “Ям-яшил дараҳат”, “Ўртоқ шоир”, “Юрак – аланга”, “Проза-нинг шоири”, “Пириканинг юраги”, “Шеърият – изланиш демак”, “Илтижо”, “Ўттис ўип изҳори”, “Дил эркинлиги”, “Ҳаё – халоскор”, “Мангу латофат”, “Таржима назарияси”, “Паривашлар мажлиси” сингари адабий-танқидий мақола, эссе, мансура ва ҳикоялардан иборат китоблари чоп этилган. Айтматов, Достоевский, Жойс, Конфуций, Маркес, Мопассан, Нитше, Распутин, Сартр, Солженицин, Ҳемингуэй сингари адіб ва мутафаккирлар асарларини ўзбек тилига маҳорат билан ўгирган.



– 1978 йили ёзувчи Одил Ёқубов Масковдан Габриэль Гарсия Маркеснинг “Бузрукнинг кузи” романини кўтариб келди. У пайт атоқли адид билан Давлат бадиий адабиёт нашриётида бир хонада рўпарама-рўпара ўтириб хизмат қиласардик. Одил ака ўзбек адидлари пайдар-пай ёзаётган роман ва қиссаларнинг кўлзёзмаларини ўқир, муаллифлар билан узоқ чўзилмай лўнда-лўнда гаплашар, Масковнинг тарбиясини олган эмасми, гапнинг пўсткалласини айтиси кўя қолар, муаллифлар унинг фикрларини инобатга олишарди. “Самолётда шу романни ўқиб қолдим. Масковда тоза шов-шув бўляпти. Илгари бунақа романни ҳеч ўқиган эмасман. Баъзан одам боласи ёзганмикин, шунчалар хаёл, фантазия, мифология зўр, дейман. Ўзбек тилига ўтириб бўлармикин, қани, охиригача ўқиб чиқай-чи...”.

Одил Ёқубов романни таржима қилишни кўнглига туғиб юрди. У кунда-кунора канда қимай ўтадиган кундузги ва кечки давра сухбатларида роман ҳақидаги таассуротларини айтар, гурунг берарди. У асарларни ўкувчи сифатида эмас, ёзувчи сифатида ўқирди. Одил аканинг ёнида юриб, ниҳоят, ўкувчи сифатида ўқиши билан ёзувчи сифатида ўқишининг фарқига борганиман. Ёзувчининг китоб ўқиши бу – тўла маънодаги ҳарёклама ижодий иш. Бу ўқиш жараённада фикр тинимсиз ишлайди, хаёл тўхтовсиз парвоз қиласди. Ёзувчидаги ўзини безовта қилиб юрган нарсалар қандайдир баҳтиёр ечим топгандай, ижодий ниятларда янги йўл ёки йўналиш очилгандай, илҳом учқунлари ҳар томонга ҷарсиллаб отилаётгандай бўлади. Толстой, Достоевский, Бальзак каби улуғ адибларнинг кундаликлари, ёзишмаларини, китобларини ҳам оддий ўкувчи каби эмас, ёзувчи каби ўқиганликлари, мутолаа асносида хаёл ва фикр шоввалари бир зум тарқ этмаганлигига гувоҳ бўлиш мумкин. Ҳозир буни чин маънодаги интеллектуал ўқиш деб айтиш ўринли. Ғоялардан ғоялар, ниятлардан ниятлар туғиладиган ўқиш бу...

Одил Ёқубов кейин китобни менга ўқишига берди. Ўша пайтда “Телба” романни устида бош кўтармай ишлаеттган эдим. Аммо адабий жамоатчилик ўртасида Маркес асарлари, чунонча, “Бузрукнинг кузи” худди Чингиз Айтматов китоблари каби фаол ўқилиб, фикр юритилиб тургани учун бу асардан бехабар “билимсвой” бўлиб юришни ўзимга муносиб кўрмадим. Одил ака: “Пиримқул ҳам ўқимоқчи”, дедилар. Китоб кўлимга теккач, бир ҳафтада хатм қилдим. Воқеалар бу қадар зич, бу қадар тарапн, мифологияси, мифологик тафаккури бу қадар бой асарга илк бор дуч келишим эди. Албатта, “Оқ кема”нинг нолакорлиги жондан кетмас, наслий жароҳатдай тирик эди. Аммо Маркес бутунлай бошқа олам, ўзга қитъя ҳаёти тажрибалари. “Бузрукнинг кузи” менда муҳаббат уйғотмади. Мен чексиз ҳайратга ғарқ бўлдим. Ҳайрат ва муҳаббат бошқа бошқа нарсалар эканлигини англадим.

Кейин янги аср кирди. “Жаҳон адабиёти” журнали чиқиб, ҳаммамизни қувонтирди. Глобал – ялпи дунёга туташдик. Ер курраси битта. Темир девор, темир панжара орқасида қандай биқиниб яшайсиз? Журнал менга Нитше ва Маркес таржимасини топширди. Маркесни яна бир қайта тадқиқотчи назари билан ўқидим. Ҳақиқатан, яна у одам қўли билан ёзилганга ўхшамади. Уни энди одам қўли билан қандай таржима қилиш мумкин? Одил Ёқубов тарихий роман қатламлари ичига кириб таржимага вақт ва имкон топмади...

Бир куни Пиримқул ака: “Маркесни ўгирибсиз. Но мини нима қилдингиз?” деб сўрадилар. “Бузрукнинг кузи” дедим. “Ха-а-а...” дедилар. Бошқа гап айтмадилар.

– *Бузрук оригиналда ҳам (patriarca), инглизча таржимада ҳам (patriarch) айни шаклда қўлланилган. “Патриарх” қандай қилиб “бузрук”ка айланди?*

– Бу ном бирдан ва дафъатан туғилгани йўқ. Унгача бир қанча варианtlар назардан кечирилди. “Бузрук” сўзи Боқирғонийни ўқиб ўтирганда, миямда лип этиб ёнди. Аслиятга тўла монанд концептуал ном топмагунча таржимага кўл уриш мумкин эмасдай туолди. “Бузрук” “куз” билан ички-ташқи оҳангдошлиқ касб этди. Таржима принципининг учи топилгандаи бўлди. Уни маҳкам тутиб роман лабиринтлари ичига кўрқмасдан кириб бордим.

Мумтоз матнларнинг хусусиятларидан бири – уларга бошқа ҳеч нарсани кўшиб ва олиб ташлаб бўлмайди. Мумтоз матн аслиятдаги қиммати баробарида бошқа тилда ҳам мумтозлик салоҳиятини сақлаши, мумтозлик хосиятидан ҳеч нарсани бой бермаслиги, йўқотмаслиги шарт. Бунинг учун заргар диққати, заргар меҳнати, заргар нигоҳи, заргар талабчанлиги лозим. Эътиборлisisи, инжиқ заргар ўзи яратган буюмга қайта-қайта сайқал беришдан ҳеч қачон эринмайди. Адид, таржимон ҳам шундай. Таржимоннинг сайқали – таҳририда, қайта-қайта таҳририда. Таҳрирда матн илма-тешик бўлиб кетади. Матнга ишлов беришнинг чеки йўқ. Мумтоз таржима матни шундай ишловдагина яратилади. Таржимашуносликнинг “аслият услубини чиқариш”, “бадиий услубни қайта яратиш” сингари тушунчалари мавжуд. Яъни таржимада Тургенев Тургеневдай, Гончаров Гончаровдай, Достоевский Достоевскийдай бўлиши керак. Кучли таржимон – кучли муҳаррир ҳам! Бунга мен Зулфия, Абдулла Қаҳҳор, Асқад Мухтор, Ҳамид Ғулом, Ўткир Ҳошимов, Миркарим Осим, Ваҳоб Рӯзиматовнинг ижодий меҳнати тимсолида гувоҳ бўлганман...

– *Илгари Farb адабиёти намуналари ўзбекчага асосан рус тилидан ўгирилган. Рус тили воситачи тил (медиум) вазифасини бажарган. Табиийки, оғиздан оғизга ўтган ривоятнинг саҳиҳлигига путур етади. Қолаверса, воситачи тилда ўйл қўйилган камчиликлар учинчи тилга ўтганда ҳам айнан тақорланиши эҳтимоли катта. Бу ҳолатда – аслиятнинг оҳори тўкилмаслиги, ғози ўйқолмаслиги учун мутаржим қандай ўйл тутиши керак?*

– Воситачи тил орқали бадиий таржимада аслият услуби ва, айниқса, персонажлар нутқи, диалогларнинг ўзига хос жонли жиҳатларини чиқариш қийинроқ кечади. Сўзларда ифодаланган миллий ўзига хосликлар, характерли ҳолатлар сийқаланиб кетиши эҳтимоли йўқ эмас. Бундай “йўқотиш”ларга йўл қўймаслик таржимоннинг ёзувчи ва унинг айнан шу асарини қанчалар тўғри, теран тушуниши, қанчалар нозик билимдонлик билан идрок этишига боғлиқ. Эрудиция ва интуиция ҳар қандай таржимада иштирок этиши ўзгармас зарурат каби қаралади. Айниқса, у воситачи тил орқали таржимада аслиятга яқинликни сақлашда сув ва ҳаводай зарур. Шу икки муҳим нарса бўлмаса, таржимага ҳаваскорлик “хуснбузар” и тошиб кетади.

Ҳамма гап аслиятни қанчалар тушунишда, тушуниб талқин этишда. Ҳемингуэйнинг инглизчадан русчага ҳамда инглизчадан ўзбекчага ўғирилган “Килиманжаро қорлари”, “Френсис Макомбернинг омонат баҳти” асарларини бир сира қиёслаб чиқсан, эрудиция, интерпретация, интуиция каби тушунчалар амалда қандай натижаларга олиб келгани, қанчалар жиддий бадиий ўзгаришларни юзага чиқарганини кузатамиз. Бадиий таржима қонун-қоидалари, принциплари универсал, ўзгармас қимматга эга ва уларни билмаслик, менси-маслик, риоя қилмаслик профессионал яроқсизликка олиб боради.

— *Оғрикли масаладан гап очдингиз. Бугун ажнабийчада бурро-бурро сўзлашадиган авлод етишиб келяпти. Тили бийрон ёшларимиз сағи кенгаяётгани нур устига нур. Лекин айрим ҳаваскорлар хорижий тилнинг зеру забарини пухта ўзлаштирмаи, фарқ пишган олма дараҳтига тирмашган бола-бақрадек ўзини бадиий таржимага ураётгани чатоқ-да. Баъзида таржимачилик Навоий, Бобур, Оғаҳий каби улуғларимиздан қолган табаррук мерос экани унутиб қўйипяпти, баъзида эса қуруқ “воситаи жоҳ” бўлиб қоляпти. Ахир, бадиий таржима бачкана маҳси тикиш эмас-ку. “Алдайвераман, алдайвераман, ким билсин, балки туйқус доно гап айтиб юборарман” дейди Достоевский персонажлардан бири. Айрим графоман-таржимонларда ҳам “Ўгиравераман, ўгиравераман, балки туйқус бирорта зўр таржима чиқиб қолар” деган таги пуч даъео бор, шекилли. Ҳойнаҳой, итальянларнинг “Traduttore – traditore” (“Таржимон – хоин”) мақоли ҳам қўл-ёзмаси устабузар тилмоч қўлига тушиб, ситам чеккан бирор муаллиф томонидан тўқилган бўлса керак... Йўлни тор олаётган бўлсам, айтаверинг, балки кенгбагирлик қилиш, мутолаага ялпи муносабат сусайган бир даврда бадиий таржимага қўл ураётган ҳимматли ҳавасманднинг елкасини қоқиб қўйган маъқулдир. Нафси замони, таржима салтанатига кириш учун “Сим-сим, оч эшигингни!” дегандек қўйиш керакми?*

— Ҳар бир ишни шу ишга лаёқати ҳамда ҳақиқий қизиқиши бор одамлар қилгани маъқул. Ҳар бир касб-хунар, мутахассислик аслида қисмат. Таржимонлик ҳам ижодкорлик каби қисмат. Сермашақат хунар. Бошқа соҳаларда яроқсиз бўлган одам кун кўриш учун ёки осон деб таржимонликка ўзини урса, бунда ҳам, албатта, яроқсизлик қиласи. Киши ўз-ўзини яхши англамагунча ва қисмат амрини масъулият билан ҳис қилмагунча ижтимоий жабхаларда адашиб-улоқиб юришга маҳкум. У ўзига ҳам, жамиятга ҳам кўп ортиқча ташвишлар келтиради. Лаёқатлилик коэффициентлари ишлаб чиқилган. Олий ўқув даргоҳларига ёки ишга қабул қилишда шу лаёқатлилик коэффициентига жавоб бернишига қараб баҳолаган маъқул.

— *Жаҳон адабиётида ҳар бир авлоднинг ўз таржимаси бўлиши лозим, деган қараш бор. Масалан, Михаил Булгаковнинг “Уста ва Маргарита”си итальян тилига ўн хил талқинда ўғирилган. Бир асарга турли авлод мутаржимларининг қайта-қайта мурожаат этишини қандай баҳолайсиз?*

— Инсониятга керакми, бадиий ҳамда фалсафий даражаси юксак китобларнинг таржималари янгилашиб бораверади. Атоқли таржимон Қодир Мирму-

ҳамедов катта жасорат билан Ҳомернинг “Илиада” ҳамда “Одиссея” достонларини рус тилидаги энг яхши таржималаридан ўзбекчага ўғирилган. Тили равон, салмоқли, ўқиганда ичига оҳанрабодай тортиб кетади. Хўш, шу шарафли таржима неча йилга чидайди? Ўн йил, юз йил, икки юз йилгами? Биз бунга жавоб беролмаймиз. Бу ўзбек тилининг бадиий, илмий, фалсафий, маданий қобилияти қанчалар сақланиши, ўсиб-ривожланиб, ҳалқни, миллатни қанчалар бирлаштириб, илҳомлантириб туришига боғлиқ. Аммо бирор таржимон бир кунмас-бир кун юонон тилини Ҳомер миқёсида ўрганиб, инсониятга бешик бўлган бу асарларни аслиятдан ўзбекчага ағдариши фикрига тушиб қолмайди, деб ким айта олади? Ўшанда у албатта Қодир Мирмуҳамедовнинг олижаноб, эзгу тажрибасига ҳам суняди. Ўзидан олдинги авлод вакили бу ишга тамал тошини қўйганидан миннатдор бўлади. Ўшанда анъана ҳам бошланади. Ўзбек адабиётида Ҳомерни таржима қилиш анъанаси...

— *“Сўз сўйлашда ва улардан жумла тузишда узоқ андиша керак” деб ўғит беради ҳассос ёзувчимиз Абдулла Қодирий. Ўқувчи (тингловчи, томошабин) дидини аёвсиз жизғанак қилаётган бозор адабиёти ва тижорий ўзандаги театр-кино Андишадан мосуво экани аччиқ ҳақиқат. Қўлбола молини усталик билан бадиият намунаси сифатида кўрсатишга уринаётганлар эчкининг чандирини барра қўй гўшти деб ўтказаётган суллоҳ қассобдан фарқ қилмайди. Сизнингча, санъат ниқобини тутган жўнлик, саёзлик, ўртамиёналиқ, дидисзлик билан қандай курашиш мумкин? Шишадан аллақачон чиқиб кетган девни унга қайтариш ўйли борми? Ё, айрим зиёлиларимиз маслаҳатига кириб, лойқа оқаётган дарёнинг тинишини кутиш керакми? Сув тингунча, асов дарё анча-мунча кўпприкни бузиб-янчиб-ювиб кетмайдими? Таржимоннинг ўқувчи дидига мослашишини ёқ(оқ)лайсизми?*

— Таржимон ҳам, ёзувчи ҳам ҳеч қачон дид-фаросатда замондош ўқувчига мослашиб, тенглашиб ижод қилолмайди. Ижодкор ҳамма вақт дид-фаросат, виждонлилиқда замондан, замондошларидан анча олдинроқда юради. Бўйи омманинг бўйига баравар, қилиғи омманинг қилиғидан фарқ қилмайдиган, ўз фикрига эга бўлмаган киши қандай қилиб ёзувчи, шоир, санъаткор, танқидчи, таржимон бўлиши мумкин? Йўқ, ижодкор ҳамма вақт чуқуроқ ўйлайди, узокроқни кўради, умум манфаатини ўтқирроқ, теранроқ тушунади. Шунинг баробарида у ижодкор деб аталади. Одамлар ўқимайди деб, Жойс, Флобер, Достоевский, Кафка, Нитше, Беккет, Ионескони таржима қилмай ўтираверсак, бизни ким ижодкор деб тан олади? Бизни инсоният маданиятларидан ким баҳрадор қиласи? Мослашиш маданият табиатига, ижтимоий вазифасига тамомила зид. Мослашиш – оммавий маданиятнинг энг суюкли усули, ўйинчоғи. Оммавий маданиятга ўнгтерси қўринмайдиган, бош-кети бир бўлиб кетган оммавий эрмак керак.

— *Таниқли адаб Ҳуршид Дўстмуҳаммад “Ҳар қандай миллий адабиётнинг нуфузи “Жараён” ўша тилга ўғирилган-ўғирилмагани билан белгиланади” деб ёзганди. Франц Кафканинг довруқли асари Вафо Файзуллоҳ таржимасида ўзбек ўқувчиси қўлига етиб борди. Ҳуршид аканинг*

мулоҳазасидан келиб чиқсан, бемалол ўмганимизни кўтарсак бўлади. Сизга қолса, миллий адабиётнинг “бўйи”ни қайси асарлар таржимаси билан ўлчайсиз? Замонавий ўзбек таржимони қайси муаллифларга кўпроқ эътибор қаратиши зарур?

– Ҳозирги миллий адабиётнинг бўйини ҳам, энини ҳам муайян бирон асар билан ўлчаб бўлмайди. Миллий адабиёт бугун ва эртага ҳам ўзини қидиришда давом этади. Жуда-жуда кўплаб оммавий адабиёт, оммавий санъат намуналари яратилади. Одамлар уларга кўникадилар. Санъат, адабиёт шу экан-да дейдиган, чумчукни саъвадан, булбулни қарқуноқдан ажратолмайдиганлар ҳам кўпайгандан-кўпаяди. Улар наинки адабиётнинг виждони, балки инсониятнинг виждони ҳақида ҳам ўйламай қўядилар ва бундай савол кўйилганда, шу ҳозир керакми, одамзод энди бензиннинг қайғусини қўлсин, дейдилар. Шундай шарроитда ҳам миллий адабиёт инсонга нима керак: бир қарич ерми ё бир бурда нонми, деб изланишда давом этади. Бугун ва узоқ-яқин эртага инсониятга тўғри йўл кўрсатолган, муаллимлик қилган, ахлоқ, ахлоқ ва яна ахлоқни одамзодни сақлаб қолишнинг ягона қороли деб билган адиллар, файласуфлар, таълимочилар мададга келадилар. Бизнинг мададкоримиз ва олисларни ёритувчи машъаламиз классика! Навоий, Бобур, Толстой, Флобер, Бальзак, Стендаль, Достоевский, Тагор, Қодирий, Чўлпон, Руссо, Вольтерга борайлик! Аввало, ақлнимиз, сўнг ҳиссиётларимизни тарбиялайдиган асарларни доим кўз ўнгимида тутайлик, қулоғимизни шуларга осайлик, юрагимизни шуларга очайлик. Классика ўлган эмас! У доим долзарб, доим актуал, доим бизга ҳамдард!

– **Жалолиддин Румийда шундай ҳикоят бўларди. Форс, араб, турк ва юонон имтифоқо бир дирҳам топиб олибди. Ақча бор жойда ғалва ҳам чиқади-да: тўртловон тангага нима харид қилиш масаласида ўзаро довлашиб қолибди. Форс – ангур, араб – инаб, турк – узум, юонон – истофил сотиб олишини таклиф қилибди. Бир-бируни тушунмаган тўртловон ўзиникини маъқуллаб турраверибди. Можародан ўнлаб тилни биладиган зукко зот (полиглот) хабар топибди. Тўртловон аслида бир нарсани харид қилмоқчи эканини тушунтириб, муросага келтирибди... Бу-ку, олис ўтмиш ҳикояти. Лекин ҳозир ҳам – дунё “глобал қишлоқ”ка айланисиб, миллатлар бир-бираига жонсарак талпинаётган даврда тилмочга эҳтиёж ошгандан-ошяпти. Бир дирҳам устида гижиллашиб қолган тўртловон ривоятини бежиз эсламадим. “Қўлнинг кири” деб ҳар қанча катта кетмайлик, минг таассуфки, кунимиз шу зормандасиз ўтмайди. Айниқса, қалам аҳли кўнглидаги покиза туйғуларни бегард сақлаши, кучини ўтин ёришга сарфламаслиги учун ҳам ақча зарур. Бир пайтлар таржимашунос олим Ғайбулла Саломов мутаржимларни моддий рағбатлантириш зарур, деб хўб куюнганди. Ҳозир-чи, бу борада аҳвол қандай? Нашриёт ва таҳририятларда таржима учун белгиланган қалам ҳақи, моддий рағбатдан кўнглингиз тўладими?**

– Таржимадан ўзим учун эстетик, ғоявий манфатларни биринчи ўринга кўйдим. Таржима адабиётимизнинг оталари бўлган Қутб Хоразмий, Сайфи Саройи, Алишер Навоий таржимани халқнинг маънавий

баҳрадорлиги деб тушунган ва бу улуғ ғояни адабий-ижтимоий принцип даражасига кўтарган эдилар. Таржимада – баҳрадорлик, баҳрадорликда – таржимонлик. Бу олижаноб принципдан ортиқ моддий рағбат, манфаатдорлик йўқ.

– **Ирланд ёзувчиси Жеймс Жойснинг “Улисс”и XX аср романчилигининг ноёб намунаси деб баҳоланади. Дунё интеллектуалларига қудратли таъсир кўрсатган роман таржимаси ҳам ҳар бир миллий адабиёт учун ҲОДИСА деса дегудек. Машақватли меҳнат ва дақиқ изланишларингиз маҳсули ўлароқ, ўзбек китобхонсеварлари “Улисс”га маҳрам тутинди. Балки сабрсизлик қилаётгандирман, лекин “Улисс” каби салмоқли роман таржимасидан кейин фикр аҳли ўртасида жонли тортишувлар, тифиз муҳокамалар авж олиши керак эди. Қарангки, бундай бўлмади. Жойсни, майли, “хос”лар ёзувчиси, деб турайлик. Лекин неча замонки, Достоевский, Маркес, Мопассан, Айтматовдан таржималаринги ҳам довюрак тадқиқотчиларга илҳақ-да... Умуман, охирги ўшлар таржимашунослик хийла заифлашгани таассуф билан қайд этиляпти. Жезга ҳар қанча ялтир-юлтур чаплаган билан тиллага айланиб қолмайди. Қолаверса, “ойнаси бор кишининг бари Искандар” бўлмайди. Жезни тилладан, чин Искандарни қаллобидан ажратиб берадиган таржима танқидини кучайтириш қанчалик мухим, деб ҳисоблайсиз?**

– Албатта, таржима ижоди билан биргаликда, елкама-елка таржима танқиди ҳам ривожланиб бориши позим. Булар бирини биридан ажратиб бўлмайдиган соҳалар. Таржима танқиди таржимашуносликнинг таркибий қисмидир. Ҳар икки соҳа адабий танқид, адабиётшунослик ҳамда тилшунослик билан ёндош, бақамти иш кўради ва ижодий йўналишларни белгилайди, шакллантиради, жараёндаги характерли хусусиятларни очиб, ёритиб боради. Таржимачиликка адабий танқид билан бирга таржима танқиди ўз мезоний талаблари орқали, жараённи жаҳон таржима санъатида рўй берётган ижодий-илмий ҳодисалар билан чамбарчас боғлаган ҳолда кучли таъсир кўрсатиши мумкин. Биз таржима, таржимашунослик, таржима танқиди йўналишида жаҳонда, Гарб ва Шарқ мамлакатларида қилинаётган улкан миёсдаги ишлар, ўзгаришлар, изланишлар, янгиланишларни жон-дилдан кузатиб бориш, кўлдан келганча уларга ҳиссамизни қўшишни истардик. Ўзбекистонда таржима ва таржимашунослик жаҳон мактабларига узвий боғланиб боришини орзу қиласиз. Катта миллий адабиётимизнинг кўлами, таржима мактабларимизнинг кўхна тарихи ва уларда шаклланган принциплар (шарҳлар, тафсирлар, маънолар таржималари, воситачи тил орқали таржима намуналари, ижодий мусобақалар, шариат, илоҳиётшуносликка доир асарлар таржимаси) шуни тақозо этади. Аммо булар ҳали орзу, холос. Хорижий тиллар ва айниқса, инглиз тилини чуқур ўрганиш давлат миёсида кенг йўлга қўйилаётгани, бунга катта эътибор қаратилаётгани келажакнинг умидбахш уфқлари очилаётганини кўрсатади.

Ёшлардан умид катта. Улар инглиз, рус, француз, немис, испан, италиян, араб, ҳинд, форс, хитой, япон, турк тилларини чуқур билиш заминида ўз изланишлари доирасига Гарб ва Шарқ таржимашунослиги, лингвис-

тикаси манбаларини ҳам кенг жалб қилсалар, уларни амалиётда таҳлил ва талқин этсалар, тадқиқотларнинг концептуал-аналитик жабхасини кучайтириб берсалар, ўн-ўн беш йил ичидаги соҳа жаҳон таржимашунослигининг узвий жонли қисми каби яшай бошлиайди. Ҳозиргача бажарилган илмий ишлар, тадқиқотлар рус тилида кейинги ярим асрда нашр этилган илмий манбаларга суюниш, уларни хўжакўрсинга қайд этиш билан чекланиб қолмоқда, жаҳон манбаларига муружаат этишга оқизлик қолмоқда. Бугунги таржима танқидидаги оқизликлар, ҳафсаласизлик, саёзлик, сийқаликларнинг асосий сабаби назариядаги шу каби умум почорлик билан боғлиқ. Тил ўрганишнинг ўсиши илмий-тадқиқотчилик ҳаракатининг кучайиши, юксак савияга кўйилиши билан бирга уйғун бориши зарур. Соҳаларга эса фақат шу ижодий, илмий ишларга аёнлаётатли кишиларгина жалб этилиши керак.

— *Французларда миллатпарварлик кучли. Айниқса, ўз тилини ҳимоя қилишда Оврўпадаги бирор миллат уларга бас келолмайди. Инглиз тилида бирор истилоҳ пайдо бўлса, фаранглар ҳаялламай унинг “эгизаги”ни ўйлаб топишади. Ҳатто курраи арзинг турли давлатларида бемалол-бедаллол истифода этилаётган computer, software, email, blog, supermodel каби байналмилал сўзларнинг ҳам француза мұқобили бор. Франсуа Рабле тилининг расмий қўриқчиси – Француз академияси 1635 йилдан бери тилбузарларга қарши “қилич ва қалқон билан” курашиб келяпти. Академиянинг айрим баёнотларига лаққа тушган одам, “мустабид” инглиз тилининг дастидан “бахти қаро” француз тилига кун йўқ экан-да, деб ўйлайди. Аслида-ку, фаранг забони жуда ўлар ҳолатда эмас – дунё тилларидан бири мақомида собит турибди. Лекин жароҳатни газак олмасидан даеолашга ўрганган фаранглар тилини ҳам ҳарислик билан иҳоталайди. Она тилини кўз қорачиғидек асраш борасида улардан анча-мунча иброт олсак, зарар қилмаса керак. Узоқ ўиплар “маърифат чопари” (Пушкин таъбери) рутбасида жонбозлик кўрсатган, Сўз хизматида сочи оқарган мутаржим сифатида айтинг-чи, бугун она тилимизни авайтай оляпмизми?*

— Дунё тилларнинг ранг-баранглиги, ирқларнинг ранг-баранглиги билан ҳам жозибали. Агар Худо одамларнинг манфаатлари учун оламнинг ранг-баранг бўлишини истамаганида эди, ҳаммани бир хил, бир тусда, бир тилда сўйлашадиган қилиб яратиш унинг изму ихтиёрида эди. Аммо бир хил қилмади. Нега? Одамлар бир-бирларига жозибали кўринисинлар, бир-бирларига интилсинлар деди. Тортиш кучи – дунё оҳанрабосининг марказига ранг-барангликни кўйди.

Тилни эъзозламаган, унга эътиборсиз, борми-йўқми, фарқига бормайдиган кимсаларда қандайдир ноқислик, оқизлик, синиқлик кўзга ташланиб туради. Тил одамни гўзал қиласди, жамоавийлик туйғусини уйғотади ва кучайтиради. Тиллар ранг-баранг бўл-

маса, миллатлар ранг-баранг бўлмасди. Араб, рус, инглиз тилининг ёнбошида қадим ўзбек тилининг борлиги нақадар гўзал, нақадар маънодор! У Қуръонни баён қилиб, Қуръон тилига, Инжилни баён этиб, Инжил тилига, “Одиссея”ни баён этиб, “Одиссея” тилига, “Улисс”ни баён этиб, “Улисс” тилига айланди. Нақадар гўзал бу ранг-баранглик! Шунинг курдатини сезмайсизми таржималарда! Ипақдай чириратма, ўн минг дараҷа ҳароратда ҳам кулга айланмайдиган жумлаларда! Улар худди Коинотнинг қора ўпқонидан ёғилаётган шуълалардан битилгандай! Кечагина бир китоб ўқидим, Бухоро лаҳжасида босилибди. Яна бир китоб кўрдим, Хоразм шевасида ёзилган. Барака топкур, қани курдатли ўзбек адабий тили?! Нега сиз уни инкор этмоқчи бўласиз? Лаҳжа даражасига тушасиз? Навоий қошида уялмайсизми? Қодирий олдида юзингиз қизармайдими? Кунингиз оммавий маданиятнинг “Уялмасанг, ҳар ишни қиласвер” қоидасига қолдими? Энди онадан азиз, отадан улуғ тилимизнинг юзига тупроқ сочасизми? Ўнгланинг! Уялинг! Асралмаганни асрарамас!

— *Иброҳим ака, боя таржимон меҳнатини заргар маваққатига ўхшатдингиз. Одатда, заргар аҳли инжиқлик билан ҳалфа танлайди. Ардоқли сирини учраган одамга дастурхон қилгиси келмайди-да. Негадир таржимада шогирд тайёрламадингиз. Наҳот, сўзгарлик ҳунарингизни ўрганишга муносиб, кўксига лахча чўғи бор қоракўз топилмаган бўлса? Густохлика йўймангу, Сиздек устозларнинг шогирд ҳозирламаётгани ҳам мактаб кўрмаганларнинг тегирмонига сув қўймаяптими?..*

— Сўфийга мурид қандай мақом ва ҳолда бўлса, адабий устозга шогирд ҳам шундай мақом ва шундай ҳолатда. Имоним комилки, устозу шогирд бир тан-бир жон бўлиб кетгандагина, икки ўртада батамом уйғунлик туғилгандагина мавжуд. Акс ҳолда, бу ўқитгану ўқиган, муаллиму толиб муносабатлариридир. Сўфийлар устоз – шогирд муомала-муносабатларининг энг юксак ахлоқий даражасига қатъян риоя қилганлар. Шогирд ўсиб, устоздан ўзиб кета бошласа, сўфий дарҳол уни бошқа, ўзидан кучлироқ устоз сўфийга ҳавола қилиб жўнатган. Мансур Ҳаллож, Хожа Аҳрор Валий каби улуғ сўфий донишмандлар таржимаи ҳолида бунинг улуғ ибратли мисоллари бор. Сўфийлардан ўрганадиган ахлоқ мўъжизалари кўп. Аммо уларнинг устоз – шогирдлик (пир – муридлик) анъаналари биз учун бениҳоя қимматли. Шогирд деса, ҳар жиҳатдан арзийдиган мумтоз зотлар бор, Худога беҳисоб шукур! Аммо уларга устоз керакмикин? Ҳамма гап шунда!

Мен эса устозларимга юкиниб, улар ҳақида ҳолбехол нафис мажлислар тузиб, камтарин сўзларимни ҳамиша улар пойига сочиб, бошимни мўъжиза дафтарларидан кўтармай таржима йўсунинда изланиб, шогирдлик бурчларимни Аллоҳ имкон берганча адо этиб келяпман. Худо ҳамма нарсани билувчи, кўрувчи, эши тувчи, охирги сўз – Уникидир.

Суҳбатдош: Собиржон ЁҚУБОВ



Ҳол Мұхаммад ҲАСАН



Нази Нази
Нази Нази Нази



Төглар тиши түшүнгәй

Түркүм

МУСИЧА

Мусича мүй келтирур,
Беҳиштдан бўй келтирур.
Инига ун сенса ким,
Мўл ризқи рў(и) келтирур.

Мусича мүй келтирур,
Бўй қизга тўй келтирур.
Қўраларин тўлдириб,
Кўйруқли қўй келтирур.

Мусича мүй келтирур,
Кўнгилга ўй келтирур.
Кафтида дон тутса ким,
Кетмас обрўй келтирур.

Мусича мүй келтирур,
“Ку-ку”лаб куй келтирур.
Куйиб юрган иигитга
Бир паририй келтирур.

Мусича мүй келтирур.
Үйларга тўй келтирур...

ЧОРЛОВ

Нафас қисиб агарда,
Сигмай қолсанг шаҳарга,
Тушиб отдан, эгардан
Тоғларга кел, тоғларга.

Ҳол Мұхаммад ҲАСАН

(Холмамат Ҳасанов) – 1957 йил Сирдарё вилоятида туғилган. 1983 йил ТошДУ (ҳозирги Миллий университет)нинг ҳуқуқшунослик факультетини битирган. Ўзбекистон Судьялари Ассоциациясида хизмат қиласи. “Оҳуев”, “Қадимий қўшиқ”, “Ул куни устоз дедилар...”, “Сулувелардан сулувсан” номли шеърий тўпламлар муаллифи. Ўзбекистон Ёзувчилар уюшмаси аъзоси.



Ошина, жўра, улфатлар,
Суюқ, сийқа сухбатлар,
Жонга тегса “ои”, “ган”лар,
Тоғларга кел, тоғларга.

Тогда сир бор, ҳайбат бор,
Юксакликда ҳикмат бор.
Ҳис бор, катта ҳайрат бор –
Тоғларга кел, тоғларга.



Бунда “миши-миши”, гийбат йўқ,
Тижкорат йўқ, рағбат йўқ,
Ёзув-чизув, тухмат йўқ,
Тоғларга кел, тоғларга.

Қўл силта кам-қўстингга,
Дастингни чўз Дўстингга.
Пастлар қолсин пастингда,
Тоғларга кел, тоғларга.

СЕХР

Тоғлар тўшига чиқсанг бас,
Улар паст кетишига қўймас.
Сехрлаб қўяр, сехрлаб,
Бундай ҳилқатни ким суймас.

Каклиги какир-какирлаб,
Кийик улоги дикирлаб,

Кўшиқлар айтиб қайнайди
Булоги биқир-биқирлаб.

Бурганлари бўй таратар,
Шувоги тани ярратар,
Нар беданадай сайратар
Кавраги касир-касирлаб.

Туманли товлар – ўтовлар,
Тўзгитиб тибит собовлар.
Оқ қосабали момолар
Сирлашар пицир-пицирлаб.

Камарда зовлар, унгурлар,
Тош кўчса ёмон гумбурлар.
Аъзои бадан жемирлар
Юраклар дукур-дукурлаб.

Қотларда ўтлар олқори,
Қояда қийгир патлари.
Сув сачратар санглоқлари
Биргина сўзни зикрлаб.

Дараси – дарё ўраси,
Шаропаси – шаршараси
Йўнар қиловли қиррасин
Қайроқтошлари тўғирлаб...

Ҳайдар кокулли шамоллар
Ях чўққиларни “ёмон”лар.
Хучига учар хаёллар
Чукрилар тотин ўғирлаб.

Туятоннинг таъми хуши,
Томирин кавлар каламуши.
Нимага урди кирни нииш
Андизлар шитир-шитирлаб?

Тошибақа тошга пусиниб
Гўлликка солар ўзини.
Қидирар ризқи рўзини
Курту қумурсқа қимиirlаб.

Кўзлар қамашар кўркидан,
Дўлана, учқат, зиркидан.
Абрек ифори бургида
Арчалар шохи гичирлаб.

Чакамук, ҳулпули пишиган,
Айиқлар ейшига тушиган,

Замбуурлар чиппа ёпишиган
Куйлашиб “мингир-мингир” лаб.

Куённинг қавми товушқон,
Сугурга юмрон тугшишган.
Тулкиман този қувшишган
Тишлари такир-такирлаб.

Тунлари тўлин ойни кўр,
Минг қўйли манов бойни кўр.
Чилдирма ҷалиб тўкар кўр
Юлдузлар бижир-бижирлаб.

Жумурда қорин мойлари,
Форда сақлангич жойлари,
Бойбича келинойлари
Кубилар пишар гусирлаб.

Қишини кузга муҳрлаб
Баҳор ҳам борар охирлаб.
Таърифга бошقا Ҳолим йўқ
Тилимни тийгум “узр”лаб.

Сеҳрлаб қўйди-да сеҳрлаб...

МАЙДАНАК

Қизиқмиз табиатан,
Қишида хуноб ютамиз...
Күйдиради саратон,
Ёзда совуқ кутамиз.

Чўлда ҳозир эллик бор,
Туриб терга ботамиз.
Қирга чиқсан... чўлликлар
Чопонда совқотамиз.

Ошиқиб тоғ – дарёга,
Отга қамчи чотамиз.
Ҳар азиз авлиёга
Таъзим қилиб ўтамиз.

Руҳи покига дуо –
Ҳазрат Лангар Отамиз.
Кўқабулоқ – кўк маъво...
Ҳисларни уйготамиз.

Мана, Майданак – майдон
Кўзга дурби(н) тутамиз.





Пасайиб келар осмон,
Борлиқни унутамиз.

Ҳарсангтошга ёнбошлиб,
Туманларни титамиз.
Семиз булутни ушлаб,
Согиб сут ивитамиз.

Ой бўйнига солиб қўл,
Оқ ўтовда ётамиз.
Бу ердан энг яқин йўл
Йор, юлдузга кетамиз.

ЎЛАН

Отам от сурган адирлар –
Қирлар жон қадар қадрли.
Дўмбирасига жўр бўлиб,
Ўланлар айтсам арзийди.

Ойлардин ойдин ўйлари,
Карвонлар кутган бойлари.
Ордона қолди ўтган сўнг
Туялар оққан сойлари.

Туялар боқсам “ҳала”лаб,
Олдимга солсам галалаб.
Урсам норининг бўйнига,
Ўлсам парининг қўйнида.

Ойнинг қўтонлаб оғиши,
Ойда бир ёмғир ёғиши,
Қўрани нурга белабди
Тўлнинг суртери тугиши.

Газалар боши қораймии,
Даҳналар оғзи тораймии,
Бослигиди чиққан бойбича
Тушларин йўлга йўраймии.

Ярқироевуқ ярқираса,
Бориблар ҳолин сўрасам.
Согинганини билдириб,
Жобсорлар очиб қараса.

Сочбовларини сочоқлаб,
Жўмалагини мунчоқлаб,
Чоигоҳда ўтар отарга
Кўшикадисини қучоқлаб.



Кийган ҳаққари ковуши,
Тошларга тегиб товуши.
Зовларни олар забтига
“Чирий”лаб чибич согиши.

Кўганда габа қўзилар,
Ийдириб бўйни ҷўзилар.
Жамрашганида манграшиб,
Эмача бовринг эзилар.

Қозаноқ, гилагай ичиб,
Жегда – кебанагин ечиб,
Ҷўлиги чалар сибизиқ
Масирқаб, дунёдан кечиб.

Бир тутам соқол иякда
Така торигар киякда.
“Бобов”ларингни бас қил-еї,
Хали сенга рўз қаёқда.

Ҳаволар ёғар тов-тovга,
Туялар келар мотовга.
Муртими суртиб “бой” ота,
Кириблар ке-етди ўтовга...

ТЎРТЛИКЛАР

* * *

Эр кишининг эркалиги кучдадир.
Белин букар кушандаси учтадир.
Боши учун етар баъзан бири ҳам:
Бири намдир, бири гамдир, бири кам...

* * *

Минг йиллардан бери жўрам Исоқ Тўра
Шеър қадрига кўпроқ етар мендан кўра.
Кўзларидан кўрса бўлар юрагини
Ҳар сония виждонидан сўраб урап.

* * *

Юзда ҳам ёиларни кўрса,
юзингиз ёришиб турсин,
Кўролмасдан кампирингиз
кунора уришиб турсин.
Кўшиилар киришиб турсин,
лабларин буришиб турсин,
Ичингиз юришиб турсин –
ишингиз юришиб турсин.





СУВ КЎРМАЙ ЭТИК ЕЧМА



Расмлар муаллифи Аслиддин Калонов.

Қўчқор НОРҚОБИЛ

Сурхондарё вилоятининг Олтинсой туманида туғилган. Тошкент Давлат университети (ҳозирги ЎзМУ)нинг журналистика факультетида таҳсил олган. “Дарё ортидаги йиги”, “Үн саккизга кирмаган мен бор”, “Дераза раҳидаги гул”, “Қуёшини ким уйғотади” каби қатор насрый, шеърий тўпламлар, бир неча драмматик асарлар муаллифи. Ўзбекистон Ёзувчилар юшмаси аъзоси.

САККИЗ САХНАЛИ ҲАНГОМА

Қатнашувчилар:

1. Чори учар – Чапани, ҳақиқатгүй, андак қитмир киши. 55-60 ёшда.
2. Рўзихол – Чори учарнинг хотини. Эрига ҳамиша ҳадик билан қарайди. 50-55 ёшда.
3. Эшдавлат – Ўзига хос қайсар, бироқ содда киши. 35-40 ёшда.
4. Йўлдошли – Чори учарнинг ўғли. Тижоратчи. – 25-30 ёшда.
5. Орзубой – Содда ва ишонувчан одам. 55-60 ёшда.
6. Норгул – Орзубойнинг хотини. 50-55 ёшда.
7. Райхон – Орзубойнинг қизи. 18-20 ёшда.
8. Бўриполвон – Ўзига бино қўйган, кўрс одам. 55-60 ёшда.
9. Шоди барака – Ким нима деса ишонадиган, гўл ва олим киши. 55-60 ёшда.
10. Сарви – Шодибойнинг хотини. 50-55 ёшда.
11. Нозим шоир – 25-30 ёшда.
12. Фелекс – Ажнабий. 30-35 ёшда.
13. Тўхта қушноч – Кинначи кампир. 65-70 ёшда.

БИРИНЧИ САҲНА

Чори учарнинг ҳовлиси. Қишлоқа хос кўримда тикланган уй-жой. Ҳовли четида супа. Даражатлар соя ташлаган, пахса девор билан ўралган ҳовлининг бир четида ошхона, тандир, ўчоқ, бостирма. Супа орти кенг-мўл боф.

Рўзихол у-бу нарсаларга уриниб, куймаланиб юриди. Туйкус – эшик тақиллади. Ташқаридан овоз келади. Фазабнок ташвишлар. Рўзихол анграйиб туради. Супада мудраб ўтирган Чори учар ўринидан сапчиб туриб кетади.

Чори учар: (*Супада тик турган кўйи ўз кўксига туфллаган бўлиб*) – Ёмон туш кўрдимов... Астағуруллоҳ.

Эшик тақиллаши яна авжга чиқади.

Рўзихол: (*Хавотир билан эшикка имо қиласди*). – Туш эмас, ўнгингизда.

Ташқаридаги овоз: – Очинг эшикни... Ким бор?..

Рўзихол: (*Дарвозага қараб юра бошлайди...*) – Қиёмат қўпдими, нима бало?

Ташқаридаги овоз: (*Жаҳл билан*) – Чори тоға! Чори тоға-ёв. Очинг эшикни.

Чори учар: (*Кўркувдан ранг-кути ўчиб*) – Эй, тўхта. Рўзи. Тўхта. Бу Эшдавлатми? Эшдавлат. Очма. Қутурганга ўҳшайди, очма.

Рўзихол: – Эшикни ўпириб киради. Важоҳатини кўрмаяпсизми?

Чори: (*У ёк-бу ёкка аланглайди-да югуриб бориб тўйнкарилган каттакон саватнинг тагига яширина-ди*) – Бўпти, оча қол.

Рўзихол: (*Эшик томон бораётуб*) – Яна бир балони бошладингизми-а? Худо бехабар одам экансизда-а. Қачон элга қўшиласиз-а. Бораяпман... Ҳо-о-в, очаяпман.

Эшик тарақ-туруқ этиб ҳовлига ғазабнок, кўйла-гининг олд туғмалари очилган, кўкрагини кўрсатиб,

иштони пойчаларини тиззасигача қайриб, оёғига калиш кийиб олган Эшдавлат югуриб кириб келади. Қўлларини мушт қилиб у ёк-бу ёкка аланглайди.

Эшдавлат: – Қани, а? Эрингиз қани?

Рўзихол: – Нима гап, Давлатжон иним, нима гап? Қани, супага ўтири.

Эшдавлат: (*Қўл силтаб, яна ўшқириб*) – Амма, супада ўтирадиган аҳволдамасман ҳозир. Қўтири каллага соя не даркор, деган экан кимдир... (*Бош чайқаб ўзига гапираверади*) – Айтувдима... Айтувдим... Шу учар писмиқнинг гапига кирма деб... Тоға бўлса ўз йўлига. Маслаҳатингдан ўргилдим. Элга эрмак, юртга элак бўлганим қолди... Аммо, айтинг, эрингизга айтинг, кўзимга кўринмасин, ўлай агар, олдимдан чиқса бир бало қип қўяман.

Рўзихол: (*Эшдавлатга ҳам ачиниб, ҳам кинояомуз қараб*) – Кўринмайди, кўзингга кўринмайди, Давлатжон иним. Ҳалиям кўринаман деётгани йўқ.

Эшдавлат: (*Асабий*) – Айтганимни қил, қишлоқда номингга нарвон қўйиб улуғлашади, дейди. Ўзига ўхшаган бемаъни гапларни қаердан топаркан-а, амма, бу учар чолингиз.

Рўзихол: (*Гўёки хафадек*) – Давлатжон, иним... У киши сенгаям бегонамас, ҳадеб учар, учар дейверма. Айт, чолим нима иш қип қўйди?

Эшдавлат: (*Энди қўлини мушт қилиб ўз бошига уриб*) – Увв... Воойи! Нима қилди дейсиз? Шунинг маслаҳатига кириб туппа-тузук томорқанинг адогида энига тўрт, бўйига тўрт қилиб чуқур қазиб ўтирибман-а...

Рўзихол (Хайрон, ажабсиниб) – Нега қазасан?

Эшдавлат: (*Жигибийрон*) – Нега қазардим, нимага қазардим, ўзимга ёки учар эрингизга гўр қазимайман-ку...

Рўзихол: (*Сесканиб*) – Ҳой, ҳой, иним. Эшдавлат, ўзингни бос.

Эшдавлат: (*Бош чайқаб*) – Ҳовуз қаздим, амма, ҳовуз қаздим.

Рўзихол: (*Таажжубда*) – Ҳовузни нима қиласан?

Эшдавлат: (*Энди янада аламли чинқириб*) – Нима қилардим, бутун қишлоқни ҳовлимга қамаб чўмилтиргани қазимаганман ҳар ҳолда. Бизнес қиламан девдим. Ҳа. Бизнес. Учар эрингизнинг маслаҳати билан. Нима эмиш, балиқхона куриш керакмиш. Фарғонага бориб, ишбилармон дўстларидан кўриб келганмиш. Эни-бўйига тўрт, чуқурлиги икки метр келадиган ҳовузга балиқ ургини ташлаб кўплайтирасам, икки йилда миллионер бўлиб кетармишман. Шу ҳовузда бир кило-ярим килолик балиқлар етиштириб сотсан, ҳар куни ўлдим дегандан 100-150 минг сўмдан даромад олишим мумкин экан.

Рўзихол: – Қанча?

Эшдавлат: (*Қовоғини уюб*) – Бир кунда юз-бир юз эллик минг сўм соғ фойда қолармиш. Ҳа, шунча пул оқиб келаркан!..

Рўзихол: – Тошни ёбсиз шу гапингизга, 100-150 минг сўм фойда кўриш керак бўлса, нега ўзингиз шу ишни қилмайсиз, демадингми тогонгга, иним? Ўйининг аҳволи бу, тағин бировга ақл бўлишига, бировга йўл кўрсатишига ўлайми? (*Сўнг сават томонга бир қараб чўчиб тушади. Овозини энди юшратиб*) – Ҳа, энди у киши сенга бегона эмас, жиянимнинг бири икки бўлсин, дегандир-да.

Эшдавлат: (Күл силтайди. Саватнинг устига бориб ўтиради) – Қаерда бирим икки бўлади. Қайтанга элга кулгу бўлдим. Отамдан ҳам оладиганимни олдим.

Рўзихол: (Хавотирланиб) – Нима учун кулги бўласан? Отангдан нимани олдинг, иним?

Эшдавлат: (Сават устида ўтирган кўйи оёқларини ликиллатиб, саватнинг қорнига тўпиллатиб телиб...) – Мен ўлиб-тирилиб, эни-бўйи тўрт метрлик ҳовузни энди бир метр қилиб қазувдим дэнг, ер остидан пақиллаб сув отилиб чиқди. Томошани кўринг, ҳовлининг қолган қисмини ҳам сув босиб кетди. Бостирма томондаги девор оғиб, уйичи кети очиқ қолган боладай кўчага кўриниб қолди, қўйди. Бир пасда ҳамсоя-овул йиғилди. Умрида сув кўрмаган ўрдак жўжаларим сувда сузиб, кучук сувда шалоплаб юрибди денг. Ҳовуз қазимай ўл дейдиган одам йўқ. Куладиган одам кўп, аммо! Отам қаттиқ дакки берди.

Рўзихол: – Эрим ҳовуз қази деса қазийверасанми, сув тошиб чиқиши хаёлинга келмадими, иним?

Эшдавлат: (Кўл силкиб) – Учар эрингиз бир нарсани билади дебман-да, амма! Бойиб кетиш йўлини ўргатяпти дебман, писмиқнинг юзи кулгандай бўлувди-я...

Рўзихол: (Супадаги чойнақдан пиёлага чой куйиб олиб келиб сават устида ўтирган Эшдавлатга узатади.) – Давлатжон иним, чой ич. Ишқилиб сув тўхтадими?

Эшдавлат: (Бош чайқаб) – Туман марказидан мутахассислар келди. Бетонлаб ёпишиди, бир амаллаб. Икки юз мингга тушиб ўтирибман. Аммо, мен буни шундай қолдирмайман. Учар эрингиздан барибир ўчимни оламан.

Сават устидан туриб кета бошлайди.

Рўзихол: (Уни юлатиб) – Қўй, куйинма иним. Тоғанг, барибир тоғанг-да. Хафа бўлма. Энди, иним, минг қилсаям бир томир нари, бир томир бери, тоға барибир тоға. Тоға-жиян қир пичноқ бўлиб ётманглар, айланай, эшитган кулади.

Эшдавлат. (Жойида таққа тўхтаб, Рўзихолга ўқраяди). – Амма. Амма! Лекин бостирма-чи. Томорқачи? Ошхонамнинг бир қисми-чи? Сув оп кетди деяпман-ку. Яхшиям қўшним Бўри попвон бор экан. Ўғиллари билан кун бўйи томорқадан чеалклаб сув чиқардик. Эрингиз думиниям кўрсатмади. Эрингизнинг қилмишидан Бўри попвоннинг ҳам ажинаси отланди. "Шу қитмирнинг гапига кирасанми. Ёшлигидаям гўр эмас эди, энди қаро ер бўлармиди, бир пайтлар Ҳамдам чавандознинг тўйида чалпак қилиб йиқитганман. Шу-шу ҳозиргача калласи киари-чиқари, хаёлига келган гапни гапириб, бўлмағур маслаҳатларни бераверади", деди.

Шу пайт саватни иргитиб Чори учар иргиб туриб, Эшдавлатга хезланиб ўшқиради. Чори учарнинг сават тагидан чиқиб, хўроздай ҳурпайишини кўриб Эшдавлат, доевираф қолади...

Чори учар: (Важоҳат билан олдинга интилиб) – Бекор гап. Бекорларни айтибсан. Нима бало, мастмисан? Оғзингга келганини гапираверасанми-а? Ўша тўйда, ўша Ҳамдам чавандознинг тўйида, ўша Бўри калингни икки оёғининг орасидан илон чил бе-риб илдириб оёғини осмондан келтириб, (кўлларини ҳаволатиб) худди чархпалақдай қилиб бошимдан

ошириб шундай йиқитганманки, бели узилиб кетишига бир баҳя қолган. Унинг полвонлиги чепуха. Бир чўнқаймани билади. Писиб, кўрқиб олишади. Тушундингми? Менга Бўри кални мақтайсан, нокас.

Рўзихол икковининг ўртасида гоҳ унисига, гоҳ бунисига қараб, овсарланиб қолади.

Эшдавлат: – Вой-вой. Вой-вой. Манави одамни қаранглар. Мен тоғдан келсам, боғдан келади. Гапни чўзмай, икки юз мингни чўзинг.

Рўзихол: (Унинг йўлини тўсиб) – Давлатжон, иним. Шайтонга ҳай бер, иним.

Чори учар: (Гоз туриш қилиб) – Кел, қани. Қоч, хотин. Келсин-чи, нима қиларкан. Мени ким деб ўйляпти бу? Ойдин кампирнинг бояни кўрсатиб қўяман, бунга.

Эшдавлат жойида тахта бўлиб тўхтаб қолади. Шаштидан тушади. У ёқ-бу ёққа аланглайди.

Рўзихол: (Эрига ҳайрат билан) – Нима? Нима деб алаҳляяпсиз?

Чори учар: (Эшдавлатнинг шаштидан тушиб, шалвирагани, гали нишонга тўғри текканини билиб, энди бехавотир ҳолатда хотинига қараб) – Хотин, бор-боравер, ўзимизнинг шунчаки гапимиз бор... Давлатжон ининг (киноя билан) мени тушунди. Нега қараб турибсан, бор, қўйга ўт ташла.

Рўзихол уларга ҳайратомуз қараб ҳовли адогиша кетади.

Эшдавлат: (Синовчан нигоҳ билан) – Бу нима деганингиз? Ойдин момо боянинг бизнинг гапга нима дахли бор.

Чори учар: (Энди ғолибликни тўлиқ қўлга олиб...) – Даҳли бор, жиян. Даҳли бор. Куни кечаям телевизорда кўрсатди, "Сув ёқалаб", деган кинони кўрдингми? Кўрдингми? (Ўқрайиб қарайди).

Эшдавлат: (Ажабланиб) – Кўрдим.

Чори учар: (Эшдавлатга ижирғаниб қараб) – Кўрган бўлсанг яхши. Шу кинони ўзимизнинг хешимиз, Нормамат раиснинг анави шоир ўғли Эркин амакинг ёзган. Майли, гап бунда эмас. Гап шундаки, шу кинода эри йўқ, эри олисда юрган аёлнинг тўшагига, қўйнига кирган ўғлини раис Болта Мардон чунонам савалайдики, бола шўрлик туғилганига пушаймон ейди... (Яна ўқраяди... Энди у ғоз. Энди у хўроз. Энди...) – Кўрдингми? Кинонинг ўша жойини кўрдингми, жиян?

Эшдавлат: (Типирчилаб, ўзини қўярга жой тополмаган кўйи, ерга қараб қўзини аланг-жаланг қиласди) – Кўрдим, тоға! Кўрдим! Лекин... (унинг овози синиқ чиқади).

Чори учар: (Энди ғолиблик қиёфасида ачиниш ҳисси) – Лекин-пекини йўқ. Сенинг отанг Ҳайдар кўёнчиқ ўша Болта Мардондан ҳам ўтиб тушади, сени савалаб, қамчилаб ўтирайди, бира тўла болталаб, чопиб ташлаб қўяқолади. Сени чопиб ташлайди, ўша мегажинингни ҳам бурдалайди... Үқдингми? Номусли эркак эри олисдаги аёлнинг, умуман, номаҳрамнинг номини булғамайди.



Эшдавлат: (Полуги пасайиб) – Тоға, ер тагида илон қимирласа биласиз-а, энди шуни достон қилиш шартмас-ов?.

Чори учар: (Ижирғаниб) – Йўқ, жиян, мен майдакаш, ипириски одам эмасман. Феъли-рўйимни қитмир дединг – тўғри, писмиқ дединг – тўғри, гоҳ-гоҳида шундай номаъқул, элга овоза ҳазилларим ҳам бўп туради. Бироқ, бирорвнинг бояни ҳаром қилмайман, қишлоқнинг булогини булғамайман, уқдингми? Сенга гапим шу: оёғингни билиб бос, ернинг юзи қаттиқ бўлгани билан, шувит қилсанг ер ютишиям турган гап, жиян. Қисқаси, бирорвнинг номуси элнинг ори билан барабар. Ҳаром-ҳаришни ийғиштир. Ойланг, гулғунчадай болаларинг бор. Ке, энди шу гап орамизда қолсин. Нима дединг?

Эшдавлат: (Мўлтираб, жовдираб) – Тоға, тоғажон. Мен тушундим. Шу гап, ҳалиги, Ойдин момонинг боя масаласи ўртамизда қолсин!

Чори учар: (Кўнгли юмшаб) – Қолади, қолади, жиян. Тоғанг майда одам эмас. Қолади.

Эшдавлат кўксига кўлини қўяди.

Эшдавлат: (Зўрга илжайиб) – Хўп, мен борай, тоға.

Чори учар: (Қатъяят билан) – Тўхта! (Кўйинини кавлайди) – Ма, манавини олиб қўй. (Бир тахлам пул узатади) – Қулаган бостирмангни, деворингни тикла!

Эшдавлат: (Хижолат ҳолда қўл силтаб) – Керакмас. Очиги, ўзимдан ҳам ўтди. Олдингизга келмас эдим, деворни тиклаётсам, Орзубой амаки, энди ҳар куни балиқ ерканимиз деб бола-бақра билан орзу қилиб ўтирувдик, ҳей, аттанг деб, пичинг қилди. Шу гап суюксуягимдан ўтиб кетди. Кейин, шайтоннинг гапига кириб сиз томон югуриб келавердим...

Чори учар: (Пулни ён чўнтаига қўтариб солади. Илжайиб) – Орзубой шундай дедими? Пичинг қилди, де.

Эшдавлат: (Энтикиб) – Кейин... Ҳалиги Бўри полвон иккови.

Чори учар: (Гапини шарт бўлиб, ўқрайиб) – Полвон дема. Бўри кал де.

Эшдавлат: (Салчиб тушиб) – Хўп. Бўри кал иккови, Орзубой амакининг супасида ўтириб битта шишани майдалашга тушишди. Менимча, менга қўшиб сизнинг роса мазах қилишди-ёв.

Чори учар: (Жиддий қиёфада, унинг гапига ишонқирамай қараб) – Сен буни қаердан билдинг?

Эшдавлат: (Яна тажанг) – Тоға! Айтдим-ку, сув тошиб деворимни ағанатиб кетди деб. Ҳамма томон, қўни-қўшнимнинг ҳовлисиям кўриниб қолди-ку... Орзубой амакининг супасини шу девор тўсиб турарди-да...

Чори учар: (Энди хижолатомуз алфозда) – Ҳа бўпти... Ҳафа бўлма. Ахир ўзингга ҳам каллани Худо бекорга бермаган-ку... Энди тоғам айтди, деб... Ҳа, майли, бўлар ишдан гаплашайлик... (Сўнг унга яқинлашиб елкасига қоқади.) – Бир гап бор. Балиқ ейишмоқчи экан де. Мен Бўри кал билан ўша Орзубой жевачига балиқнинг ўрнига колбаса едираман. (Эшдавлатга тикилиб туради...) – Бир режа бор, жиян. Эл эшитмаган ҳангомани энди ўз кўзинг билан кўрасан.

Эшдавлат: – Тушунтириброқ гапиринг, тоға.

Чори учар: – Хўш, қани супага чиқ. (Улар супага ўтиришади.) – Шундай қилиб Орзубой анави Бўри кал билан байрам қилди, де. Мазах қилди, де. (Ўйланиб қолади) – Менга қара, хўш, сен ҳалиги, Панжи чапақайнинг шоир боласи, анави журналистликка ўқигани, телевизорда ҳам кўриниб қолади-ку, оти ни майди, ҳа, Нозим, мен уни Нозим найнов дейман. Нозим найнов, қишлоққа кепти деб эшитдим, бир ажнабийни ҳам эргаштириб келганмиш, шуларни бизнигга бошлаб кел.

Эшдавлат: (Ҳайратомуз) – Нозимни нима қиласиз?

Чори учар: (Мийигида кулиб) – Бу ёғини сўрама... Нозим найнов бўладиган бола, уккағардинг боласи ҳаммомнинг туйнугидай қишлоқдан чиқиб бутун мамлакатга танилиб бораётпи. Ўшани шериги, ҳалиги ажнабий жиблажибон билан бирга қўшиб олиб кел, бир зиёфат мендан. Бир меҳмон қилсан зиён қилмайди. Кейин... кейин бир режа бор. Сен хурсанд бўласан... Уқдингми?

Эшдавлат: (Ўрнидан қўзғалиб) – Уқдим, уқдим, тоға. Нозим қачон келсин?

Чори учар: (Уни эшик томон кузатаётиб) – Иложи бўлса ҳозир топиб кел... (Елкасига уриб қўяди.)

Улар хайрлашишади.
Саҳна қоронгулашади.

ИККИНЧИ САҲНА

Чори учар супада ястаниб ўтириб чой ичаяпти. Гўё беларво. Сула ёнида, кантакон ўйлхалта устига ўтириб олган ўғли Йўлдош, ўйл олдидан фотиҳа беришинг дегандай отасига имо қилади. Шу пайт ўчоқ томондан кичкинагина тугунчани кўтариб онаси Рўзихол юргригаб келади-да, тугунчани ўғлига тутади.

Рўзихол: – Ол, айланай болам. Ӯроқжон, тез-тез кеп туравер, ўқишинг қочиб кетмайди. (Эрига қўрқиб-писиб қарайди, эри хотинининг бу гапидан сўнг унга олайиб қараб бош чайқаб қўяди)

Йўлдош: (Жигибийрони чиқиб) – Эна, неча марта айтганман, шу Ӯроқ деманг деб... Йўлдош деб айтсангиз бўлаверади, ошнапарим, синфдош қизларнинг олдида ҳам кечга Ӯроқжон, Ӯроқжон дейвериб безор қилдингиз. Одамни шарманда қилманг, эна.

Рўзихол: – Ўрганиб қолганман-да, болам, ўрганиб қолганман. Мен учун Ӯроқвой. Бу отни раҳматли Нозик момонг қўйган.

Чори учар: (Хотинига энсаси қотиб қараб) – Бас қил. Болани йўлдан қолдирма.

Рўзихол: (Икки қўлини фотиҳага очиб) – Омин, болам тойдай тосирлаб юрсин.

Чори учар хотинига еб қўйгудай қараб ўшқиради.

Чори учар: (Тажанг ҳолда) – Ҳой, менга қара. (Овозини чўзиб, оҳиста) – Менга қара...

Рўзихол эридан олдин боласига фотиҳа берганидан мулзам бўлиб, мум тишлаб ерга қараб қолади.

Чори учар: (Томоқ қириб, ўзининг бу уйнинг хўжайини эканлигини билдириб қўйиш учун) – Қани



омин. Олгину олдирмагин. Йўлинг оқ, ниятинг ойдин бўлсин. Аллоҳу Акбар.

Улар учовлон фотиҳага қўл кўтаришади.

Рўзихол: – Омон – эсон юргин, Ўроқкон.

Йўлдош: (Аччиғланаб) – Эна... Айтдим-ку, эна.

Чори учар: (Кулиб) – Мен далада бўлганман, энанг сени шийпонда түқкан. Гўринг нурга тўлгур Нозик момонг киндигингни ўроқ билан кесган. Ўроққа қанча сифинсанг оз (кулади, силкиниб-силкиниб, елка учирив кулади) – Шу ўроқ бўлмаганда... зовудингдан яроқсиз бўлиб тушардинг... (Яна елка учирив, завқ билан кулади...) – Сўнг район марказида сенга ЗАГСдан гувоҳнома олгани борсам, шаҳардан практикага келган ўрис қиз "УРАК, УРАК, что такой урак?", деб қолди... Қани энди Ўроқнинг ўрисчасини билсан... Кейин колхоз кассири Йўлдош акага хушомади учун отингни Йўлдош деб ёздириб юбордим. Вой жинқарча-ей, энди, "Что такой Йўлдаш?" деб қолса бўладими. Ўроқнинг ўрисчасини билмаган одам Йўлдошнинг ўрисчасини қайси гўрдан билсин! "Йўлдош – это деньги" деб юбордим. Ангра-иб қолди. Кейин ёзиб берди... Ҳаммасидан зўри, кейин Йўлдош кассир елкамга қоқиб суюнчи пули берди. Ана шундай, мулло Йўлдош. Йўлдош – деньги дегани деб тўғри айтган эканман, мана пулнинг орқасидан қувганинг қувган! Ўв, гапим нотўғрими? Аслида пулни қувиб ҳам ёлчитмаяпсан... (Қўл силтайди. Сўнг бир ўғлига, бир Рўзихолга қараб) – Хотин, носқовоғим токчада қопти, олиб кел.

Рўзихол зипиллаб чиқиб кетади. Чори ўтирган жойида ўғли томонга ўнгай бурилади.

Йўлдош: (Энди аччиқланган кўйи ўрнидан турив отаси томон юра бошлиди. Тўхтайди) – Ота, ўзингиз ҳам ошириб юборасизда-а. Ҳозир замон шунақа. Ҳамма ўзини пулга урган пайт. Бизнес. Пул... Бизнес, бу иқтисодиётнинг олтин қонуни.

Чори учар: (Мийигида кулиб, ўғлини калака қилиб) – Ҳамма замондаям шундай бўлган. Ҳамиша одамзод ўзини пулга, бойликка уриб келган. Қўй, менга ўргатма, болам?

Йўлдош: – Между прочим, сиз тенги одамлар ҳам ҳозир анча уддабурон. Масалан, анави Бўри полvon... Водийдан тўққиз дона товук тухумини уч миллион сўмга сотиб опкепди.

Чори учар: (Ўрнидан туриб кетади) – Нима? Нима деяпсан, эсинг жойидами, ўзи? Уч миллионга тўққизта тухум?

Йўлдош: (Энди жойига қайтиб бориб сумка устига яна ўтириб олади. Дадасини довдиратганидан хурсанд) – Ҳа, уч миллионга тўққиз дона тухум сотиб олса фирт тентаклик, жиннилик-ку... Бўри кал ўзини даволатсин, ёки сен ўзингни даволатгин, бола.

Йўлдош: (Пинагини бузмай) – Сиз шундай ўйлайсиз. Лекин Бўри полvon ўша тухумларни очириб дакан

хўрор, ҳа, уришадиган хўрор қилади. Ўша хўрорларнинг ҳар бирини камида икки миллионга сотади. Тўққиз тухумдан тўққиз урушқоқ жўжа чиқса, урушқоқ хўрор бўлса, ҳар бирини икки миллиондан сотса ўн саккиз миллион сўм дегани. Ҳа, майли ўн беш миллион ҳам дейлик. Ана ишбилармонлик, мана бизнес...

Чори учар: (Энди анграйиб) – Ҳо... шундай дегин. (Энди ўйланиб қолади) – Сенга бир савол. (Юзидаги терини артади) – Ўша тухумларнинг урушқоқ хўрор бўлишига ким кафил? А? Айт-чи?

Йўлдош: (Хуш кўрмай) – Водийдаги полvon жўралари урушқоқ хўрорни товуққа қўйиб, ҳалигиндак... (Жим туради...) – Хуллас, шундан сўнг туғилган тухумларни Бўри полvonга беришган.

Чори учар: (Ҳамон ҳайратланиб) – Йўқ, бу аниқ жавоб эмас...

Йўлдош: (Қўл сиқиб) – Айтаверайми? Сиз шу охирiga етмасангиз қўймайсиз-да. Тухумларнинг ҳалиги урушқоқ дакан хўроздан эканлигини исботловчи далиллар бор. Видеокамерага олиб боришган. Видео тасмалар бор... Бизнес сизга ўйин эмас, ота.

Чори учар: (Ишониб-ишонмай) – Товуқнинг кетини видеокамера билан пойлашган, де? Ўша хўрорларни чинданам катта-катта пулга уруштиришадими? Биз томонда бундай нағма йўқ-ку?

Йўлдош: (Энди тажанг) – Бор жойда бор. Дакан хўрорларини Бўри полvon ўша, бу ишни мукаммал қилиб эплайдиганларга сотади.

Чори учар: (Алами келиб) – Сен буларни қаердан билдинг?

Йўлдош: – Ўғли Расул айтди.

Чори учар: – Тухумларни қачон олиб келибди?

Йўлдош: (Отасига ажабланиб қараб) – Тунов куни. Ота, энди бу гапни кўчага шамоллатиб юборманг. Бу сир.

Чори учар: (Ўғлига норози қараб) – Сен менинг ўғлиммисан ё Бўри калнинг боласимисан-а? Нега мунча унинг тарафини оласан?

Йўлдош: (Ялинганинмо) – Ота, илтимос, Сиз билинг, мен билай. Ҳатто буни Бўри полvonнинг хотини Сарви холаям билмайди.

Чори учар: (Тажкубланиб) – Нега?

Йўлдош: – Бизнесга хотин киши аралашмагани маъқул-да.

Чори учар: – Хўш. Ундан бўлса арзанда-ю азиз олтин тухумлар қаерда экан?

Йўлдош: (Отасига маъноли қараб) – Сизга нима қизиги бор бунинг?

Чори учар: (Гўё беларево) – Қизиги йўқ? Хоҳласам осонликча билиб оламан.

Йўлдош: (Сергак тортиб) – Ота, қўйинг майдагапни. Расулга сўз берувдим. Яқин ошнам у. Шундоғам эшитдингиз-ку ҳаммасини.

Чори учар: (Писанда қилиб) – Расул ошнанг бўлса, мен отанг.

Йўлдош: (Норози) – Уф! Майли. Ҳеч кимга айтмайсиз-а, тўғрими.

Чори учар: (Энсаси қотиб) – Тўғри. Тўғри. Айтавер, ҳеч кимга айтмайман.

Йўлдош: – Тухумлар Шоди барака амакининг дўконидаги музлатгичда. Эртага олишади. Курк товуққа бостиришади.



Чори учар: (Ўзича мамнун) – Демак, Бўри кал ўзича хотинидан ҳам, бошқалардан ҳам сир тутган. Яхши.

Йўлдош: (Бўшашиб) – Ота, бўпти, мен кетдим....

Чори учар: (Ўғлидан кўнгли тўлмаган ота қиёфасида) – Менга қара, Сен қачон одам бўласан? Ёшинг ўттизга борди. Ун йилдан бери бир институтни зўрга тугатаяпсан. Қачон қарасанг елкангда тўрванг, физионсан, физион. Тошкент ҳам ярим қадам бўп қолди сенга.

Йўлдош: – Бўлди, ота, бўлди. Худо хоҳласа бу йил тугатаман ўқиши. (Кейин гапни бошқа ёққа буриб...) – Ота, Эшдавлат аканинг лақабини эшитдингизми? Эшдавлат ҳовуз! Ҳамма уни энди Эшдавлат ҳовуз, деб чакирайпти. Сизнинг шарофатингиздан бу, ота. Лақаби ҳовуз бўлди.

Чори учар: (Энди тутикашиб) – Сендан мен Эшдавлатнинг лақабини сўраётганим йўқ-ку, бола. Менга қара, Шоди бараканинг дўконига сен нима оп келиб бердинг?

Йўлдош: (Бепарво) – Нима опкепман?

Чори учар: (Ижирганиб) – Энағарди боласи, аёлларнинг ҳалигисини... айтаман... Уялмай шуни оп кеп бердингми-а?

Йўлдош: (Ажабсиниб, кулиб) – Шу арзимаган нарсани сиз ҳам билдингизми-а? Қишлоқ эмас бу! Бу нақд дунёга хабар тарқайдиган ахборот маркази! Адашиб сумкамга тушиб қолган... Мен ҳам эътибор бермай Шоди амакимга ташлаб кетганман. Шуниям айтдими сизга. Ўзи тогорадан тор қишлоқ бўлсаем, дунёга хабар тарқатади. Одамлари оғзи билан юради.

Чори учар: (Ўдағайлаб.) – Бирор айтдими йўқми, сенинг ишингмас буёги.

Йўлдош: (Оғрингандай...) – Ота, ахир глобаллашув, цивилизация, деган нарсалар бор, телевизор, интернет. Бу гаплар жуда майда гаплар. Шу нарсага аччиқланиб ўтирибсиз-а?

Чори учар: (Ажаблананиб) – Нимаси майда? Нега аччиқланмай?

Йўлдош: (Энди довдираб) – Ахир дунё ривожланышда. Дунё деворларини ривожланиш бузиб ўтаяпти.

Чори учар: (Мийигида кулиб) – Дунёни тинч кўй. Бизга тўғри келмайдиган нарсасини сен айтган дунё бизга тикиштирмасин. Майли, деворимизни ҳам бузмасин, ўша дунё сувилизацияси. Мана шу ён кўшнимиз Орзубой ва бизнинг ҳовлимиз ўртасидаги деворниям бузиб, ёки ундан ошиб ўтмасин, бир балонг, яъни гирдибаломиди, глоболамиди, ўша нарсанг. Чунки, бизнинг қаричимизга тўғри келмай турган ўша ривожланишингни бизга кераги йўқ, бола. Уқдингми. Бундай нарсаларни бизнинг қишлоққа тикиштирма, бола. Ўша тараққиётинг ҳам тикиштирмасин.

Йўлдош: (Энсаси қотиб) – Нимани тикиштиряпти сизга тараққиёт?

Чори учар: (Энди ғазаби тошиб) – Энангнинг кўкрак халтасини тикиштираяпти. Эрта хотин-халажнинг бошқа нарсасини ҳам олиб келиб очик-ойдин кўз-кўз қиласанларми? Уялмайсанми, бола?

Йўлдош: (Нокулай ҳолатда) – Ота, қўйсангиз-чи?

Чори учар: (Ўйчан...) – Нимани кўяман. Орсизлик, номуссизлик арзимаган нарсадан бошланади, болам. Майли, сен айтган сив... сив... гла...

Йўлдош: (Ўзини ўнглаб) – Цивилизация, глобаллашув...

Чори учар: (Бош силкиб) – Ҳа, шундайчакин нарсалар ориятни оёқ ости қилса, кераги йўқ, болам. Орияти оёқ ости бўлган одамнинг илдизи мўрт бўлади. Ориятсизлик аёлни эркакшода, эркакни эса хотинчалиш қилиб қўяди...

Шу пайт носқовоқ кўтариб пилдираб Рўзихол келади. Ота-боланинг овозини баландлатмай гаплашишаётганидан кўнгли хотиржам, юзига табассум югуради.

Рўзихол: (Жилмайиб) – Ота-бала нимани гаплашаяпсизлар?

Чори учар: (Киноя) – Сувилизация ҳақида...

Рўзихол: (Гўёки бир нарсани тушунгандай... Юзини рўмоли билан тўсиси...) – Вой, ўлмасам...

Шу пайт эшик тақиллайди. Кимдир овоз беради. Машина гуруллаши ҳам эшитилади. Ит ҳуради.

Йўлдош: (Отасига қаратма) – Ота, майли, яхши қолинглар, эна, бўпти майли, яхши ўтиринглар, Қудрат ошнам вокзалга олиб бориб ташлайман девди, келганга ўхшайди.

УЧИНЧИ САҲНА

Ўша ҳовли. Ўша супа. Чори учар ёнбошлаб олиб газета ўқияпти. Яна эшик тақиллайди. Чори учар безовталашиб қараб туради. Рўзихол ошхона томондан чиқиб келиб эрига қарайди. Авзоридан яна безовта. Эрига энди буниси ким бўлди, дегандай им қоқиб қўяди. Чори учар бошини эшик томонга ирғайди.

Чори учар: – Нега қоқкан қозиқдай бўлиб турибсан? Бор, эшикни оч. Агар нокерак одам бўлса мени йўқ, деб айт.

Рўзихол: (Тумшайиб) – Нокераклигини қаердан биламан...

Чори учар: – Аввал қара-чи... Ҳе, ўл талмовсарамай.

Рўзихол эшик томон югургилайди: “Ҳозир, ҳозир, ким у”. Бир пасда қайтиб келади.

Рўзихол: – Анави Нозим шоир бору, Панжи ча-пақайнинг кенжаси. Ўша билан бир ўрис бола турибди эшиқди олдида. Нима дей? Тавба, шаҳардан ўрис ошна топиб кепди, ажойиб-да шу бола? Нима дей?

Чори учар: (Хотинига кинояли жилмайиш билан бош чайқаб) – Ҷақир! Ҷақир! Нима дердинг. Ҷақир! Ўрис бола эмиш. Ўрисмас, инглиз у. Инглиз. Нега анграясан, бор чакириб ке. Ҳа-я, сен, қизингниги бораман деятувдинг. Бор, боравер.

Рўзихол: (Эшик томон бораётниб) – Кечқурун бораман қизингизни кўргани.

Чори учар: (Қатъият билан) – Йўқ. Ҳозир борасан. Ҳозир.

Рўзихол эрига норози бир қараб эшик томон ўргулайди. Ҳовлига ажнабий дўстини эргаштириб Нозим киради. Ажнабий ўнг қўлини боғлаб, бўйнига бинт билан осилтириб олган. Икковига обдон за-

монаевийликнинг суверат-сийратини шундай ёпишириб кўя қолган. Нозим тавозе билан Чори учарга салом беради. Ажнабий ҳам қўли кўксидা Нозимнинг қилиғини қайтаради...

Чори учар: (Мамнун) – Хуш кўрдик, йигитлар. Хуш кўрдик. (Нозим ва ажнабий йигитга ҳавас билан қарайди.)

Нозим: – Чакирибсиз, бова? Тинчликми?

Чори учар: – Ҳа, энди, дунё янгиликларидан баҳраманд бўлай дедик-да, неваражон. Кўз тегмасин, (бир Нозимга, бир ажнабийга қарайди...) Қишлоғимизнинг фахрисан, фахри, Нозимжон!.. Бошқани билмадим-у, лекин, мен сен билан фахрланаман. Манави бўйинсангни таништириш...

Нозим: – Бу Фелекс Робъсон. Бизга дунёвий матбуотдан дарс беради. У ўзбек тилини, урф-одатларимизни ўрганаяпти.

Фелекс: – Салом. Салом. Якши. Якши.

Чори учар: (Ажнабийга дикқат билан разм солиб) – Салом, иним. Салом, яхши. (Нозимга) Дуруст. Сенга сабоқ беришини билмадим-у, лекин ўзбеклардан кўп нарсани ўрганиши чин. Ҳа энди, ажойиб удумларимиз бор... Хўш, Нозим, шоир ошнангнинг кўлига нима қилди? Чакки бўпти-ю?

Фелекс: (Яна заевқланиб) – Кўл. Кўл. Кураш. Кураш.

Нозим: – Ҳамма нарсага қизиқаверади. Кеча Қосим қассобнинг тўйига бордик. Кураш берди. Кўймади, менам ўзбекча курашга тушаман деб, тихирлик қилаверди. Мехмоннинг сазаси ўлмасин деб, хўп дедик. Бўри полвоннинг ўғли, Расул синдошими билан курашга туширдик. Мана, энди шу аҳвол (Нозим ажнабийнинг қулогига нималардир шипшийди. Ажнабий тасдиқлади, бош қимирлатади.)

Чори учар: (Уларни супага бошлиайди. Супага чиқиб ўтиришади) – Эй, шу Бўри калнинг боласи, Расул инжиқнинг ҳам фаросати йўқ-да. Мехмоннинг ҳурматини қилмайдими. Секингина олишиб, йиқилиб қўйса ўлармиди, нокас калнинг боласи...

Нозим: – Йўқ, бова. Расул буни аяди. Йиқилиб ҳам берди. Лекин ўзи сал мўртрок шекилли, эти эзилиб, пайи чўзилганга ўхшайди.

Чори учар: (Ўтирган жойида эғилиб, Фелекснинг лат еған қўлини ушлаб кўради, дикқат билан разм солади) – Чин, чиқмабдиям, синмабдиям, пайи чўзилгани чин. (Бироз Фелексга қараб туради-да, ўнг қўлининг кўрсаткич бармогини ҳавога ниқтаб) – Топдим. Топдим. Давоси учун ўзимизнинг ўзбекона усулни кўллаш керак... (Бирдан Чори учарнинг юзидаги табассум жилва қиласи) – Иккала қўлини бир-бираига ишқайди. Қарсак чалиб, кулади) – Топдим.

Нозим билан Фелекс ҳайрон.

Нозим: – Нимани топдингиз, бова?

Чори учар: (Шодлигини яширолмай) – Бунинг кўлига тухум боғлаш керак... Ҳа, тухумнинг саригини боғласанг яхши бўлади.

Нозим Фелексга энгашиб шипшиб Чори учарнинг гапини таржима қилган бўлади.

Фелекс: (Нокулай аҳволда гўё) – Йўқ. Йўқ. Доктор! Доктор якши.

6-сон. 2013 (268)

Чори учар: (Нозимга энди ҳафа бўлғандай) – Айт, ошнангга. Қадимдан ота-боболаримиз шундай қилган. Удумимизни ўрганаётган экан, амал қилсин-да. Тухумнинг сариги шишни ҳам, оғриқни ҳам дарров олади. Буни Ибн Сино айтган.

Нозим яна Фелекснинг қулогига нимадир дейди:

Фелекс: – О, О! Авәцино. Авәцино. Хуп. Майли. Хуп! Авәцино якши.

Чори учар: – Бу бошқа гап. Ҳозир, бу ердан кетаётисиб, анави Шоди бараканинг дўконига киринглар. Хонадон тухуми яхши. Унда бор. Тўқиз дона олиб, еттитасининг саригини олиб, катта косада аралаштириб кўлига суркаб, яхшилаб боғлаб қўй. Иккитасини қовуриб енглар. Удуми шунақа, уқдингми?

Нозим: – Шоди барака шаҳарга кетаётган экан. Ҳозир кўрдик. Дўёкони очиқмикин?

Чори учар: (Хурсанд) – Нима? Шоди шаҳарга кетаяпти де? Дўконда хотини савдо қилаётгандир. Айни муддао-да. Айни пайти экан, неваражон. (Сўнг ўзининг шодлигини яширишига уриниб) – Хотини бўлса яхшида, у-бу нарсанинг фаҳмига етади. Хонадон тухумини сўрагин-а! Музлатгичда турибди. Тўқиз дона тухум, уқдингми?

Нозим: – Хўп, бова. Майли. Шундай қиламиз. Ана, Фелекс ҳам рози бўлди. Тухум бўлса, тухум-да. (Кейин Чори учарга разм солиб) – Бова, нега чақиртирувдингиз?

Чори учар: (Бош силкиб) – Ҳа-я. Фелекснинг дарди билан бўлиб, чалғиб кетибман, невара. Менга қара, сен Орзубойнинг қизини ёқтирасан деб эшидим, шу чинми? Анави, ҳозир шаҳарда ўқиётгани бор-ку, муаллимника ўқиётгани?

Нозим: (Уялиб ерга қараб) – Райхонни айтаяпсизми?

Чори учар: (Мўлжални бехато олганидан қувониб) – Ҳа. Райхонни айтаяпман. (Нозим ерга қараб турибди) – Хўш, билсанг, отанг Панжи чавандоз энг яқин ошнам. Орзубой ҳам менинг қадрдон жўрам. Иккови ҳам қўнглимнинг туб-тубидаги яқинларим. Лекин, шу Орзубой қизини, Тўйчи раиснинг ҳалиги, туманда катта ишда ишлабтган ўғлига бермоқчи, деган гап орлади қишлоқда. Сен ҳафа бўлма, Орзубойни чақириб, ётиғи билан тушунтираман... Гапимга киради. Кирмай кўрсин.

Нозим: (Фелексга хижолатли қараб) – Бу гапдан менинг ҳам хабарим бор. Ўзимам Райхон билан гаплашаман, деб келувдим. Йўқса, Фарғонага, курсдошларимиз билан айлангани кетмоқчийдик. Қишлоққа келишимдан ҳам мақсад Райхон билан гаплашиш эди, бова.

Чори учар: (У ҳам Фелексга бир қараб қўйиб) – Бу ҳамма гапни тушунавермайдими?

Нозим: – Йўқ. Гапираверинг, бова.

Чори учар: – Тушунмагани яхши. Қишлоқнинг сирини Англия билиши қолувди, энди...

Англия сўзини эшитиб Фелекс Чори учарга ялт этиб қарайди.

Чори учар: (Жилмайиб) – Англия, Англия яхши! Яхши нимайди, Нозимбой?

адабий-ижтимоий журнал

21



Нозим: – Гуд.

Чори учар: – Англия гуд. Гуд Англия. (Фелекс жилмаяди.)

Нозим: (Тарааддуланиб) – Раҳмат Сизга, бова. Энди мен борай. Шундай қилиб (ерга, бир нуқтага тикилиб) – Райхоннинг дадаси билан гаплашасиз-а?

Чори учар: – Албатта. Гапим битта. Лекин Нозим, бир масала чиқиб турибди-да.

Нозим: – Нима масала?

Чори учар: (Үйланиб) – Хўш, менга қара, шу колбаса ўсимлиги борми?

Нозим: (Ҳайрон) – Нима?

Чори учар: (Энди жиддий) – Колбаса ўсимлиги борми, деяпман? Ер юзининг бирор жойида колбаса ўсимлиги борми, деяпман?

Нозим: (Кулади. Фелексга қарайди. Фелекс ҳам нима гап дегандай бир Нозимга, бир Чори учарга қарайди) – Бова, ҳеч эшифтмаганман. Йўқ.

Чори учар: (Фелексга қараб) – Нозимбой, бу гапни ошнангга айтиб ўтирма. Демак, бундай қиласан, сендан Орзубойми, унинг ўғлими, колбаса ўсимлиги борми деса, ҳа деб қўявер.

Нозим: (Ажабланиб) – Нега? Нима учун, бова?

Чори учар: (Сирли оҳангда) – Сендан нима кетади, эшифтганман де, ҳеч бўлмаса.

Нозим: (Энди айёrona кулиб) – Бова, Орзубой амаки билан гаров ўйнадингизми дейман-а?

Чори учар: – Нима бўлса, бўлди. Хўп де. Сўзим битта, сен шуни тасдиқлассанг, Орзубойни қизи Райхонга уйланишингга аввало Олло, сўнг мен борман. Гапим битта, невара. Хўп де.

Нозим: (Энди жонланиб) – Бўпти. Колбаса ўсимлиги бор... (Кейин ўйланиб туриб) – Бу дунё кенг бўлса, балки бордир ҳам. (Нозимнинг ўзи ҳам кулиб юборади...)

Чори учар: (Ўрнидан туриб кетади. Фелекс ва Нозим ҳам туришади. Чори учар Нозимга қўл узатади) – Кўлни ташла. Келишдик-а.

Нозим ва Чори учар қўл ташлашади. Фелекс ҳайрон.

Нозим: – Бўпти бова, Сизга ишондим.

Чори учар: – Хўш, агар Орзубой, мабодо сендан ижикилаб сўраса, ана Фелексбойни ҳам гувоҳ қилиб кўрсатиб юборавер. Орзубой бу ошнандан сўраб-сурштиrolмайди. Бунинг учун тил керак. Агарким, ўша колбаса уруғини Фелекс ошнам Чори бовамга Англиядан олиб келиб берди, десанг, янайм зўр бўларди. Гапим битта, Орзубойни қизи Райхонни фақат сенга беришига кўндиrmасам, нима десанг деявер, неваражон.

Нозим: (Бу ўйиндан завқланиб) – Бўпти. Гап битта. Колбаса уруғини Сизга биз бердик. Англиядан опкеп бердик, тамом.

Чори учар: (Хаддан зиёд шод) – Яшавор, невара. Яша.

Улар супладан тушиб ҳовли ўртасига келишади. Чори учар уларни эшикка кузатади.

Чори учар: – Ҳа дарвоҷе, анави Шоди бараканинг дўконидан, инкубаторники бўлмайди, хонадон тухумни опкетиш эсларингдан чиқмасин-а.

Нозим: – Албатта, бова. Ҳозир дўконга кириб олиб кетамиз.

Фелекс: – Якши. Якши. Ҳайр.

Чори учар: (Фелексга, унинг боғланган чап қўлига ишора қилиб) – Тухум... Тухум. Яхши. Яхши. Ибн Сино.

Фелекс: – Якши. Тухум.

Нозим ва Фелекс чиқиб кетади. Чори учар ҳовлида шоду хуррам ҳолатда қолади. Завқ-шавққа тўлиб ўзича куй чалиб саҳнада рақсга тушиб ўйнай бошлайди:

САҲНА АЙЛАНАДИ.

ТЎРТИНЧИ САҲНА

Қишлоқ маркази. Чорраҳа. Норавон, ўйдим-чукур тўрт кўча бирлашган жой. Шу ердаги дўкон пештоқига "Шодибек Мирзо Жаҳонгир ал-Барака" хусусий фирмаси" деб ёзib қўйилган. Дўкон ичидан расстага ярим белидан суюниб ўтирган Сарви писта чақиб, атрофга аланг-жаланг қараб қўяди.

Шу пайт дўкон ёнига Нозим ва Фелекс келади. Қўли боғлиқ ажнабийга Сарви ажабланиб қарайди.

Нозим: – Салом алайкум, Сарви хола.

Фелекс ҳам: – Салом, салом.

Сарви: (Бир Нозимга, бир Фелексга разм солиб) – Ва алайкум ассалом, келинглар, келинглар, иниларим.

Нозим: – Сарви хола, бизга тухум керак, тухум борми, товуқнинг тухуми?

Сарви: (Чимрилиб) – Айланай, шоиржон, ҳалиям товуқнинг тухумини бераман, илоннинг тухумини эмас.

Тухум сўзини эшитиб Фелекс ҳам гапга аралашади.

Фелекс: – Ес. Ес. Тухум. Авецино.

Нозим: (Сарви холага қараб) – Уф, Авецино дейверибам хит қиворди...

Сарви: – Авециноси нимаси?

Нозим: – Ибн Сино демоқчи!

Сарви: – Ҳай, ҳай, шоиржон, авлиёларга шак кептириманг.

Нозим: (Бироз тажанглашиб) – Бўпти хола, тухумни беринг энди. Музлаттичда, тўққиз дона бор экан-ку.

Сарви: (Тимирскиланиб) – Бор экан. Мана, холодильницида. Ўзиям тўққиз дона экан... шунча тухумни нима қиласизлар-а?

Нозим: (Сарви узатган елим халтани олиб) – Етитасининг сарифини манавининг қўлига қўйиб боғлаймиз. Иккитасини қовуриб еймиз. Шу.

Сарви: – Ота-бобомиз ҳам шундай қилган. Банияти шифо. (Кейин қизиқсиниб) – Инглиз ошнангнинг қўлига нима қилди, ўзи?

Нозим: (Гапни қисқа қилиш учун) – Эй, бунинг тарихи узун. Кейин биласиз, хола, биз кетдик.

Фелекс, чўнтағидан ўн доллар чиқариб узатади. Нозим унинг қўлидаги долларни олиб, Фелекснинг чўнтағига қайтариб солиб қўяди. Ўзи ёнидан пул чиқариб Сарви холага узатади. Фелексга энгашиб нимадир дейди.

Фелекс: (Мамнун илжайиб) – Гуд. Гуд.
Сарви: (Кулиб) – Гуд. Гуд. (Сўнг Нозимга қаратма) – Ошнангни бизниги ҳам меҳмонга олиб ўт.

Улар кетади. Сарви ҳамон қизиқиши ва ҳаяжонда.

Сарви: – Гудбай. Гуд.

Нозим билан Фелекс кетгач, дўйкон ёнида томок қириб, Орзубой пайдо бўлади.

Орзубой: – Ҳорманг бойбича. Бу дейман, Шоди барака кўринмайди. Савдода ўзингиз экансизда-а. Яхши. Яхши.

Сарви: (Пештахта устидаги у-бу нарсаларни тўгриласандай бўлиб) – Келинг, ака. Яхши юрибсизми? Дугонам Норгул ҳам яхшигинами, дамликкинами?

Чори учар: – Дугонангиз дамликкина, дамликкина. Диконглаб юриби, кепин, хавотир олманг.

Сарви: – Бирор нарса керакмиди, ака. Нима оберай?

Орзубой: (Дўйконга разм солиб) – Анавиндан битта оп беринг. Яхисидан бўлсин.

Сарви қоғозга ўраб ароқ узатади.

Сарви: – Йўл бўлсин, ака! Зиёфат борми, дейман.

Орзубой: (Бош иргаб) – Бор, бор. Билмайман, қаерданdir кун чиқиб Чори учар ошга чақириби, агар уйда бўлса Шодивой барака ошнамни ҳам бирга олиб ўтай девдим. Отамлашардик. Гурунг-да, гурунг...

Сарви: – Ошнангиз, Худога шукур, бугун сизлар билан бирга отамлашолмайди. Бўри полвон билан бозорга кетди.

Орзубой: – Ҳа, иши бормиди?

Сарви: – Ҳайронман. Кечакаласи бизниги миманингдир режасини тузиши.

Орзубой: (Қизиқсина) – Қанақа режа?

Сарви: – Билмадим. Шивир-шивир гаплашишади, денг. Чой оп кирсан дим-дирс жим бўлиб қолишади. Нима гап десам, ошнангизнинг жазаваси тутиб кетди. Жаҳлидан жавзо тути тўклиди, ўзиям.

Орзубой: – Шундай денг, кепин? (Ўйланаб туради.)

Сарви: – Билганим шу бўлди – бозордан Бўри полвонга шу кунларда курк бўладиган товуқ олиб келишмоқчимиш.

Орзубой: (Янаям қизиқиб) – Курк бўладиган товуқ... Бозорга ким курк бўладиган товуқ опчиқаркан? Бир товуқ учун икки киши бозорга кетишдими? Қизиқ. (Кейин мавзуни бошқа ёққа буриб) – Ҳозир менинг олдимдан ўтиб кетганлар ким эди? Яхши таний олмадим. Бирини танигандай бўлдим. Бири Панжи чавандознинг шоир боласи, бир қўлини боғлаб олгани шубҳалироқ...

Сарви: (У ёқ-бу ёққа қараб) – Инглиз у. Инглиз.

Орзубой: (Ҳайрон) – Ё, тавбангдан-ей. Инглиз денг. Шоири тушмагур ўзи ғалатироқ бола чиқди-да. Инглизлар Англияда яшайди-ку... Дунё ҳам бизнинг қишлоққа бир қадам бўй қолди-я. Бу қишлоққа, илгари тумандан бир одам йилда бир ё икки келарди. Англия ҳам Хурсан калнинг томорқаси ёнидан ўтган ариқ устига қурилган кўприкнинг нариги бошидай яқин бўй қолди-я... Ҳа, майли. Мен кетдим... Шоди барака келса айтинг, келин, Чори учарниги ўтсин.

Орзубой кетади. Сарви унинг ортидан тумшаяди.

Сарви: (Орзубой кетгач ортидан) – Ўтади, ҳим... ўтади. Энди учар икковингга қўшилиб яллама-ёrim айтиб чайқалиши қолувди.

Шу пайт Сарвининг пештахта устидаги уяли телефони жиринглайди. Сарви телефонни олиб, қулогига тутади.

Сарви: (Хушёр тортиб) – Эшитаман, хўжайн. Гапираверинг. Ҳа, яхши. Савдо чаккимас. Яхши. Ўзингиз яхшимисиз. Бозордан қайтасизми? Яхши, хўжайн. Мол-ҳолга уйда ўғлингиз қараб турибди. Айтдим, кўйларга ҳам ем беради. Ҳаммасини айтдим. Хавотир олманг, бозорлигингизни қилаверинг. Нимани айтяпсиз. Тухумни? Холодильникдаги тухумни? Ие, Бўри полвоннинг тухумимиди у? (Жим... эсанкираб қолади...) – Йўқ... Йў-ў-ўқ... сот... сот... сотмадим. Сотмадим. Тухумни сотмадим.

Сарви лабини тишлаб, жим туради. Юзида қўрқув аломати... Кўйлаги ёқасини сўл қўли билан очиб кўксига туфлайди.

Сарви: (Кўрқиб) – Энди нима қилдим-а. (Еллигич билан елпинади...)

САҲНА ҚОРОНҒУЛАШАДИ БЕШИНЧИ САҲНА

Чори учарниг ҳовлиси. Сулада Чори учар билан Орзубой ўтирибди. Гурунг авжиди. Даствурхон ҳам қуруқ эмас. Мева-чева. Даствурхонда Орзубой Шоди бараканинг дўйонидан олган шиша ҳам диккайиб турибди.

Чори учар: (Мулозамат билан даствурхона шора қилади...) – Ол. Олиб ўтири, ошна. (Шишига қўл чўзади...) – Яна битта қуяими?

Орзубой: (Энди буниси ҳам талтайиб, тавозе билан...) – Эеий, йўқ-йў, йў, йў! Йўқ! Кейинроқ, кейинроқ.

Чори учар: (Шишидан қўлини олиб) – Ҳа, майли, кейин бўлса, кейин-да...

Орзубой: (Чорига сирли тикилиб, у ёқ-бу ёққа алланглаганнамо) – Опчиқ, қачон берасан? Ўзи гапингнинг жони борми?

Чори учар: (Кўрсаткич бармогини лабига босиб) – Эеий, секинроқ. Ҳовлиқма. Буни бировга гапирма. Ошнам деб сенгаям илиндим. Кўрайлик-чи? Тажрибада. Тажриба.

Орзубой: (Яна у ёқ-бу ёққа қараб) – Шуни ким оп келди дединг?

Чори учар: – Нимани?

Орзубой: – Колбаса уруғини-да!

Чори учар: (Юзида табассум) – Нозим шоир бор-у, ўша опкелди. Ҳалиги Пелкис деган ажнабий ўртоғи берибди. Ўша ёқда ҳам экиларкан. У ёқда ҳали жуда-жуда кам одам биларкан. Асли бу сабилнинг ватани Колумбиями, ишқилиб, тубканинг туби экан...

Орзубой: (Завқланиб) – Валлоҳу Аълам! (Ёқасини ушлайди) – Дунёда мўъжиза кўпда-а?

Чори учар: – Кўп-кўп. Менам Нозим шоирдан ижикилаб сўрадим. Сенга ўхшаб. Биласан-у, мен сув



кўрмасам этик ечмайман. Ишондим-да! Нима, дунёда қовун дарахти бор, пахта дарахти бор. Шоколад дарахти бор, ҳатто нонга ўхшаган маҳсулот берадиган дарахти бор, асал берадиган дарахт бор, сут дарахти бўллади-ю, колбаса дарахти бўлмайдими?

Орзубой: (Ҳаяжонланиб) – Дарахт де!

Чори учар: (Энди бир оз каловланиб) – Менимча бу, дарахтдан майдароқ бўлиб, ҳалиги бутасимон бўлиб, ўзимизнинг бандидевона бор-у, ўшанга ўхшаб ўсса керак, аммо сабил қолгур росаям серҳосил бўларкан...

Орзубой: (Ҳаяжонда) – Ўзингам экдингми?

Чори учар: (Қўли билан ишора қилиб) – Ана, томорқага сепиб чиқдим. Бироз қолувди, ўйлаб-ўйлаб сенга илиндим.

Орзубой: – Барака топ, ошна, барака топ. Қуй энди, биттадан олайлик.

Улар ичишади.

Чори учар: (Зеҳн солиб) – Орзубой.

Орзубой: (Ҳавотир аралаш) – Нима дейсан?

Чори учар: – Энди шу Нозим ёмон бола эмас, қизинг Райхонга кўнгли бор деб эшиштаман. Отаси Панжи чавандоз ҳам чаккимас. Палаги тоза. Шу ёшларга ўзимиз оқ фотиҳа берсак, тақдир-да, тақдир. Нозим шоир ҳам дунё кўрган, ўқимишли бола, қолаверса, қишлоқнинг фахри, ҳали довруғи бутун юртга таралади, ҳалитдан телевизорга чиқиб шеърлар ўқияпти. Кўзинг тушгандир.

Орзубой: (Ўйчан) – Яхши бола-ю, лекин...

Чори учар: (Қатъий) – Ҳеч қандай лекин-пекини йўқ. Бундай уддабурон, ишбилармон күёвни қаердан топасан? Сенгаям, шу колбаса уруғидан беришимни Нозимнинг ўзи тайинлади. Бу қурмағурнинг грамми олтин баҳосида экан. Қиммат-да, қиммат.

Орзубой: (Ҳайратини яширолмай) – Шундай қимматикин? Бу, ҳа майли, хотиним билан гаплашиб кўрайчи, бир гап бўлар. Энди, уругни оп чиқ.

Шу пайт девор ортидан овоз келади. Девор ортидан Бўри полвон билан Шоди бараканинг боши кўринади. Улар бозордан қайтаяпти. Уларнинг гапсўзлари, кулгуси эшиштилиб турибди. Орзубой билан Чори учар девор томонга ажабсиниб қарайди.

Бўри полвон: (Девор ортидан бош силкийди) – Ассалому алайкум. Ҳорманглар.

Шоди барака: – О, ҳов, майшат зўр-ку. Байрамми, дейман?

Чори учар: (Девор томонга бўй чўзиб) – Байрам, байрам. Бизда ҳамиша байрам.

Шоди барака: (Орзубойга қаратма) – Орзубой, бу учар ошнамиз қаердан кун чиқиб, мулозамату марҳамат қип қолди?

Орзубой эшишмаганга олиб Чори учарга хижолатли ҳолатда қарайди.

Чори учар: (Норози оҳангда) – Барака, сен ҳаммани ўзингга ўхшатасан.

Бўри полвон: (Орага қўшилиб) – Ўзига ўхшагани яхши-да, сенга ўхшамаса бўлди-да. Дунёни ўзига ўхшамаган одамлар бузади.

Девор ортидан Бўри калнинг илмоқли гап қилиши Чори учарнинг ғазабини кўзгатади.

Чори учар: (Дарғазаб) – Ҳой, кал, оғзингга қараб гапир.

Орзубой: (Ўртага тушиб) – Қўйинглар шу бақира-чақири (Сўнг девор томонга бўйини чўзиб...) – Эй, Бўри полвон, товуқ кўтариб опсизми?

Бўри полвон: (Девор ортидан) – Бозорга борувдик. Ҳа, энди оп келаяпман... Керак-да, керак.

Чори учар: (Кинояли жилмаяди. Сўнг ҳузур қилиб кулади) – Бу дейман бозордан бирор семизроқ кўчкор етаклаб келганингда, дунёни бузиб, бошга кўтараркансанда-а, кал?!?

Бўри полвон: (Чори учарга) – Учар, товуқ оламанми, хўрор оламанми, қўй етаклайманми, сенинг ишинг бўлмасин! Ақлинг етмаган ишга аралашма. Гап дунё бозоридан қуруқ қайтмаганники.

Шоди барака: (Овозини баландлатиб) – Қўйинглар-э! Чори, Орзубой, икковинг ҳам кечкурун Бўри полвонниги ўтинглар. Ўша ёқда давом этказамиз. Зиёфат беради.

Орзубой: (Жонланиб) – Нега энди сеникига эмас? Сабабини билсак бўладими?

Шоди барака: – Билишинг шарт эмас.

Чори учар: – Бўпти, борамиз. Борамиз... Ҳали кечгача гап кўп. Бўпти, ўзларинг келинглар, бу ёқка. Бир пиёла чой, ярим косадан шўрва.

Бўри полвон: – Тил учидан гапираётганинг маълум-ку. Майли, кечкурун бизниги ўтинглар.

Чори учар: – Демак кечкурун кун чиқаркан-да, а?

Улар девор ортидан кетиб, ўз йўлида давом этишади.

Орзубой: (Чори учарга илтижоли қараб) – Энди ҳалигини олиб чиқ.

Чори учар: (Ҳовли этагига қараб овуз беради) – Рўзихол, ҳов Рўзихол.

Саҳнага Рўзихол чиқиб келади.

Рўзихол: – Нима дейсиз?

Чори учар: (Сирли қарашиб қилиб) – Омборхонага кир. Бурга еган телпагимнинг ёнидаги қора халтачани олиб чиқ.

Орзубой: (Қўли кўксиди) – Барака топ, ошна, барака бол! Мендан қайтмаса, сенга Худодан қайтсан.

Чори учар: (Сергак тортиб) – Йўқ, йўқ, йўқ! Худони тинч қўй. Ўзингдан қайтсан, ўзингдан. (Сўнг мишиғида кулиб қўяди.)

Рўзихол кичкина қора халтачани олиб келиб эрига беради. Чори учар халтани олиб Орзубойнинг олдиға ташлайди. Орзубой халтачани шоша-пиша олиб ҳидлаб кўради.

Орзубой: (Завқланиб) – Чинданам колбасанинг хиди келаяпти? (Сўнг қўлини дуога очади) – Омин, умрингдан барака топ, ошна.

Чори учар ҳам дуога қўл очади. Улар туришади. Орзубой хурсанд. Ҳайрлашаётуб Чори учар Орзубойнинг елкасига қўл ташлайди.

Чори учар: – Ошна, энди Нозим билан қизинг Райхон масаласини ҳам ижобий ҳал этсак, яхши бўларди.

Орзубой: (*Кўйнидаги халтани яна бир ушлаб кўриб*) – Айт, Панжи чавандозга, айтавер, одам юбораверсин.

Чори учар: (*Завқ-шавқ билан унинг елкасига қоқиб*) – Эй, яша. Бу бошқа гап.

Орзубой чиқиб кетади. Чори учар унинг орқасидан кулиб кузатиб қолади. Шу пайт супа ёнига келган Рўзихол у-бу нарсаларни ўғишиштираётган бўлиб, эрига норози тўнгиллайди.

Рўзихол: (*Куйиниб*) – Ҳой чол, ҳалиям шу қитмирлигингиши ташламадингиз-а? Яна бир балони бошламоқчимисиз-а?

Чори учар: (*Хотинига мамнун қараб*) – Эй, сен эркаклар ишига аралашма. Мен буларга Чорини мазах қилиш, ортидан гийбату-ғурбат қилиш қандай бўлишини кўрсатиб қўяман.

Шу маҳал девор ортидан бақир-чақир, қий-чуев эшиштилади. Шоди бараканинг “Лаънати хотин, мендан сўрасанг ўласанми?”, – деган ўдағайлаши эшиштилади. Нимадир тарақтайди. Шутобда ҳалиги кичик девордан ошиб ўтган Сарви – Шоди бараканинг хотини юргургилаб Чори учарнинг ҳовлисига чиқади. Рўзихол ва Чори учар ҳайрон бўлиб қараб туришади. Сарви уларнинг олдидан ҳансираф чопиб ўтаётганида, Чори учар унинг йўлини тўсмоқчи бўлади.

Чори учар: – Ҳой, ҳой, келин, бунча ҳовлини айланниб югарасиз, тинчликми?

Сарви: (*Ҳансираф*) – Тинчликмас, тинчликмас, ана, ана (*Сарви қўли билан девор томонни кўрсатади...*)

Шу чогда девор томондан бир дона калиш учиб келиб буларнинг ёнига тушади. Сарви кўча эшик томон чопиб кетади. Энди девордан ошиб ўтган Шоди барака ҳаллослаб юргургилаб Сарвининг ортидан қувади.

Шоди барака: (*Оёғида бир пой калиш, бири яланг ҳолда ҳансираф, Сарвининг ортидан оёғидаги бу калишини ҳам ечиб иргитади*) – Падарингга минг лаънат сенинг, товуқ мия!

Чори учар Шоди баракани тўхтатиб, йўлини тўсади. Рўзихол ҳангу манг бўлиб саҳнада сўппайиб, нималар содир бўлаётганини англаб-англамай турибди.

Чори учар: (*Шоди баракани билагидан қисиб тўхтатиб*) – Ҳой, менга қара, уялмайсанми? Ёшинг бир жойга борганда бу нима қилиқ? Болаларинг, қўни-қўшни, маҳалла-кўйдан уялмайсанми-а? Бу нима қилиқ, ҳей, ўл-е, туришингни қара.

Шоди барака: (*Пишнаб, ҳансираф*) – Сен сўрама, мен айтмай. Тухумни сотиб юборибди, тухумни.

Чори учар: (*Юзидағи шодлик ифодасини яширишга уриниб*) – Тухум бўлгандан кейин сотади-да.

Рўзихол: (*Энди тилга кириб*) – Шунга шунчами?

Шоди барака ерга ўтириб олади-да, аламидан увлулаб, ийглаворади.

Шоди барака: (*Ўтирган кўйи ўз кўксига муштлаб...*) – Воеей, воеей! Сенлар нимани тушунардинглар. Сенларга нима-а-а-а. Вой-ее-е-е. Қиммат эдида у тухум. Қиммат эди. Воо-е-е-е. Ярамас хотин-а.

Чори учар: (*Қовогини ўюб*) – Нима бало одамнинг тухумимиди у?

Рўзихол юзини рўмоли билан тўсиб эрига норози қарайди. Эри унга кет ишорасини қилиб бош иргайди. Рўзихол кетади.

Шоди барака: (*Ўтирган жойида ерни муштлаб*) – Ҳа, ҳа! Одамнинг тухуми эди.

Шу пайт дарвоза тақиллайди. Тарс-турс овоз эшишилади. Ҳовлига ҳаллослаб Бўри полвон югуриб киради. Шоди барака ўрнидан иргиб туради. Ўзини Чори учарнинг панасига олади. Бўри полвон Шоди баракага ташланиб қолади.

Бўри полвон: – Тухумни топ! Тухумни топ! Мана сенга. (Унга мушт тушириб қолади. Шоди барака ҳамвой-войлаб унга ҳамла қиласди. Чори учар икковининг орасига тушиб ажратади).

Чори учар: – Бўлди-да энди-е-е. Шармандалар. Бўлди. Бўлди. (Улар иккови ҳам бир-биридан ажрала-ди. Бўри полвон Шоди баракага гезариб-бўзариб, хезланиб қараб туради).

Бўри полвон: (*Уф тортиб*) – Мен билмайман, топасан...

Шоди барака: (*Чийиллаб*) – Қаердан топаман? А?

Бўри полвон: (*Ижирганиб*) – Хотининг ўша лаънати ажнабийга ўзингнинг тухумингни бериб юборса яхши эди, бу кунингдан кўра тухумсиз қолсанг авло эди.

Шоди барака: (*Ерга ўтиреволиб, унга маҳзун термулиб*) – Топмадингми, уйида йўқмикан?

Бўри полвон: (*Юзини тескари буриб*) – Кетиб қопти, икковиям шаҳарга жўнаворибди, ярамаслар.

Чори учар: (*Гўёки ҳеч нарсадан бехабардай уларга ажабсиниб қараб*) – Ким кетворибди, кимни қидирайпизлар?

Шоди барака: – Анави, инглиз билан Нозим найнов, улар кетиворишибди.

Бўри полвон: (*Шоди баракага ўқрайиб қарайди*) – Овозингни ўчир. Бас қил. Вайсақи. (Тишини тижирлатади).

Чори учар: (*Ҳеч нарса билмагандай*) – Уларда нима ишларинг бор эди?

Бўри полвон: (*Қўл силкиб*) – Ҳаммасига манави сабабчи.

Шоди: – Менмас. Ўзинг ўлармидинг шу зормандани уйингда сақласанг...

Бўри полвон: (*Ўқириб*) – Хотининг ҳам ўзингга ўхшаб қушмия, йўқ, қушмиямас, эшак мия.

Шоди барака: (*Хотини ҳақоратланганига чидай олмай, Бўри полвонга ташланиб қолади*). – Хотинга тил теккизма. Ҳозир сени бир ёқлик қиласман.

Чори учар Шоди баракани тўхтатиб қолади.



Чори учар: (Икковининг орасида тұғаноқ туриб). – Бас, бас-е, имонсизлар. Нима қилаяпсанлар?

Шу пайт күча эшик тарақтаб саңнага Эшдавлат кириб келади. Ҳамишагидай күйлагы тұгмалари ечилған, олди очиқ, күкрак-қорни күрениб турибди. Оғигда калиш. Кайфи бор, ичиб олган. У саңнага Ҳосила Раҳимованинг “Бос, бос, қамчи бос, отға ўзинг қамчи бос...” деган күшигини хиргойи қилиб чавандоз алғозда құлини ҳаволатиб кириб келади. Буларнинг учаласи ҳам жимиб қолишаади.

Эшдавлат: (Чайқалинқираб уларга яқинлашаркан). – Бос, бос, қамчи бос, отға ўзинг қамчи бос... Эй, эй, жамоат жам, биргина Эшдавлат кам. (Уларга синчковлик билан назар таштайди) – Ҳимм... Майли, майли, биз жиммиз. Биз гапирмаймиз. (Чори учарга қараб) – Тоға, фақат бир отимгина нос беринг. (Сүнг Шоди баракага қараб) – Барака амакимизнинг супермаркети ёпік экан. Чечам ҳам йүк. Жим-житлик. Қышлоқда ўрнингиз бор амаки, шу дўконингиз билан вей, менга қаранг. Сиз қышлоғимиз тарихида қоласиз-да.

Ҳалигиларнинг учаласи ҳам жим. Бир-бираига қарайди.

Чори учар: (Кўйнидан носқовоқ олиб Эшдавлатга узатади) – Ма, жиян. Ол.

Эшдавлат: (Уни кучоқтаб ўпмоқчи бўлади) – Ўзимни тоғам, ўзимни тоо-фаам!

Чори учар орқага тисланади. Шоди барака бурнини жиийради, ароқнинг ҳидидан беҳузур бўлган каби афтини бужмайтиради. Бўри полвон қўли билан бурнининг олдини елпийди. Эшдавлат Шоди барака билан Бўри полвонга бир ўқрайиб қарайди. Сүнг Чори учарга қараб жилмаяди.

Эшдавлат: (Чори учарга) – Тоға, компания зўр-ку. (Сула томонга, аниқроғи дастурхонда диккайиб турган ароққа сукланиб қарайди.)

Чори учар: – Жўна энди жиян, дамингни ол.

Эшдавлат кетаётиб Бўри полвон билан Шоди баракага ўқраяди:

Эшдавлат: (Уларга) – Тоға кечагина, булар оғизбурун ўпишиб, сиз билан менинг устимдан кулишиб майшат қилишаётвуди. Бугун бир-бири билан қири-қиён бўлиб ўтиришибди-ми? Эшитдим... Эшитдим. Ярим қышлоқ нега бу икки авлиё бир-бири билан жиққа-мушт бўлаётганига ҳайрон. Кеча мени ҳовуз қуллуқ бўлсин, калласи шамолда қолган учар тогангнинг маслаҳатига кириб бугун абжағинг чиқиб ўтирибди деб, роса кулишган ҳам шулар... Бугун... бугун... калласи шамолда қолган бўлсаям тогамиздан маслаҳат сўрашга келибдилар-ку... Ҳей, ҳар нарса бўлганларинг яхши.

Эшдавлат саҳнадан чайқалган кўзи “Бос, бос, қамчи бос, отға ўзинг қамчи бос...” деб чиқиб кетади. Бўри полвон ҳам, Шоди барака ҳам ерга ўтириб олади. Ерга қараб, бир нуқтага тикилиб қолишаади. Кишини ўйга чўмдирадиган мусиқа янграйди.

Чори учар: (Худди ўзиға ўзи гапиргандай, бироқ ҳаммага эшишилар тарзда). – Бўри, Шоди. Ошнапар. Менинг ҳеч қачон сизларга, одамларга хусуматим бўлмаган. Хусуматим йўқ ҳам. Фақат сизларнинг бунчалар майдафеъл, майдакашликларнинг суюк-суюгимга оғриқ киради. Эсингдами, Бўри, энди хизматдан келган пайтимиз... Ҳа, мен уч йилликда, матрослиқда хизмат қилиб келган эдим. Ўша Содиқ тоғамизнинг тўйида сен билан курашга тушдим. Сенам эпчил эдинг, кучли эдинг, зўр эдинг, тан оламан. Лекин сени йиқитишга кўзим етарди, сени йиқитолардим ҳам. Олишув чоғида сўл қўлим чимиллаб кетди, қалтис ҳаракат қилиб қўлимни чиқариб юбординг. Кўзимдан ўт-олов сачраб, бошим айланди. Базўр ўзимни тутиб турардим. “Ошна, қўлим чиқиб кетди, Бўри ошна, қўлим чиқиб кетди...” дедим. Сен... Сен ноилож турган аҳволимда мени йиқитдинг. Бу ҳам етмагандай бор гавданги устимдан ташладинг... Сўнг... Баковулларга, олишни кузатаётган қишлоқ ахлига мағрур қараб ўрнингдан турдинг. Ҳамма Бўри Чорини эгнidan ошириб урганда қўли чиқиб кетди, деб ўлади. Ҳа, ҳамма шундай тушунди. Мен ҳеч кимга ҳеч нарса демай, даврани мағлуб бўлиб тарк этдим... Шундан бери тўйда курашга чиқишга бетлай олмадим. Шундан бери сени кўрсан сўл қўлим зирқираб оғрийди. Шундан бери, мен эл қатори, одамлар, қишлоқдошларим каби сенинг номингга полвон сўзини қўшиб айтольмайман. Йўқ, ўтгани ўтди. Ёшимиз бир жойга борди. Ўша воқеани мен ёшликтинг хатоси, ҳа, ёшликтинг тўрлиги деб биламан... Бугун-чи, бугун, Шоди икковингнинг қилиб юрган ишларинг энсамни қотирди. Тўғри, замон бошка, яхши яшаш керак. Лекин, ота-бованг қилган ишларни қилсаларинг, қўлингдан келадиган, эр кишига ярашадиган ишни қилсаларинг бўлади-ку. Мен сенларга бўйинсаман – ошнаман, бари бир айтишим керак! Замонга боқ, телевизор кўраяпсанлар, қандай ўзгаришлар бўляяпти. Тадбиркорлик, касаначилик, фермерлик... Бизнинг қишлоқда ҳам шунга имконият бор-ку-а? Сен, мен, Шоди бирисак, ана Орзубойни ҳам қаватимизга олсак, элгаям, ўзимизгаям нафи тегадиган иш билан шуғуллансак бўлмайдими? Мен водийнинг Олмос деган қишлоғида бўлиб кепдим. Бир парча, кафтдек бўш ер йўқ, ҳосил олишади, жаннат дейсан... Бизларда ҳатто катта томорқамиз ҳам бўш ётади. Ишламаймиз. Қанча имкониятларимиз бор... Худога шукур, чорвамиз бор, еримиз бор, бофу роғларимизда ҳосил мўл бўлади, энг муҳими, қишлоғимизнинг бир эмас, икки жойидан дарё оқиб ўтади, тоқقا туташ адирларда курилишбоп хомашёлар бор. Биз фақат каллани ишлатмаймиз. Осоннинг остидан, енгилнинг устидан ўтамиз деймиз. Мана, шу Эшдавлат жияним. Мен унга юз бора тушунтирдим, Ҳазорбое каналининг тагида бўш ётган ерини ҳужжатлаштириб, ҳовуз қазиб, балиқчилик хўжалиги қил дедим. Бу нима қилди, уйида ҳовуз қазиб туппа-тузук томорқани расво қилди. Яна, мен айбормишман. Сен-чи Бўри, шу ишингни, манави, хўро забозлик ишингни мени билмайди, деб ўйлайсанми? Ҳаммасидан хабарим бор. Куракда турадиган ишни қилсанг-чи? Бундай ўйинларнинг эгаси бор, Сен билан мен эмас, Бўри. Бу ишинг бошининг бир фалокат опкелади, кейин кеч бўлади. Ундан кўра ана, Дегиз сув омбори ёнидаги 150-200 гектар ери

олиб, фермерчилик билан шуғулланайлик. Чорва боқайлик. Озуқага сувли ер бор, қолаверса, ўтган замондан қолган улкан молхона қовурғаси чиқиб, нурай деяпти. Шуни таъмирлайлик...

Шоди барака: (Ўрнидан туриб кетади) – Чори, ўзингмисан, нималар деяпсан. Бу ишларга пулни қаердан оласан?

Чори учар: – Олдин бизнес режа тайёрлаймиз. Ана, банкдан кредит оламиз. Шуям муаммоли? Аллақандай товук тухуми ҳақидаги эртакка кўз тикиб, ҳавои режалар тузгандан кўра бу минг марта авто эмасми? Энди бу замонда боқиманда бўлиб яшай олмайсан. Ишласанг, каллани ишлатиб ишласанг одамдай яшайсан. Яхшиси, сенлар, Ўзбекистоннинг бошқа жойларига чиқиб, бир айланиб, ўз кўзларинг билан кўриб келинглар. Тўфи, қишлоғимиз яхши, одамларимиз тантни, содда, ўзига хос чапани, ҳазилу ҳузулнинг жони, лекин, замонни билиб, замон билан бирга яшаш учун фақатгина шу фазилатлар камлик қиласди. Ишбильармонлик керак. Аввало ўз оиласизда шундай кайфият яратишимиш лозим. Бунинг учун мен ҳам ўғлим Йўлдошалининг аллақандай майда-чуйда ишлар билан шуғулланиб, тўрва елкалаб юргурилашига, фириб гарлигига чек қўйишим керак.

Бўри полвон: (Ўтирган жойида анграйиб) – Худо сенга гапдан берган-да. Бизнинг устимиздан куляпсанми, дейман?

Чори учар: – Йўқ, бўлари гапни айтдим. Ҳокимиятга ариза бердим. Сув омбор ёнидаги эски ферма атрофидан юз гектар ер олиб чорвага мос фермер хўжалиги очамиз. Сенлар менга қўшилсанг бас. Банк иши ҳам гаплашилди, ҳал бўлади. (Сўнг кулади) – Хоҳласанг, ўша ерда ҳам дакан хўрзларингни кўпайтираверасан.

Бўри полвон: (У ҳам ўрнидан туради. Ерга қараб, Чори учарнинг кўзига тик қарай олмайди). – Чори, мени кечир. Ҳаммаси учун мени кечир, ошна...

Чори учар: (Бош иргаб) – Айтдим-ку, ўтган иш ўтди. Ёшликинг тўрлиги, ёш ўтгач кўнгилга оғриқ бермаслиги керак.

Шоди барака: (Энди у ҳам Бўри полвоннинг юмшаганидан қувониб). – Албатта. Бизлар ошна бўлсак...

Бўри полвон Шоди баракага ўқрайиб қараб қўяди. Чори учар супа томон юра бошлайди. Супадаги тўнкарилган тогорани кўтариб, унинг остидан ичига нимадир солинган елим халтани олиб, Бўри полвон ва Шоди барака ёнига келади.

Чори учар: (Бўри полвонга) – Манавини ол.

Бўри полвон: – Нима бу?

Чори учар: – Ол, олавер.

Бўри полвон елим халтани олиб, унинг ичига қарайди. Сўнг бирдан Чори учарнинг юзига тик қарайди. Жим бўлиб қолади.

Шоди барака: – Нима гап? Нима бўлди?

Чори учар: (Бўри полвонга) – Сен миллион-миллионга сотиб олган тухумлар шуми?

Бўри полвон: (Кўзини олиб қочиб, оҳиста) – Шу, ошна. Шу.

Шоди барака: (Ёқасини ушлаб) – Ё, Алҳазар!

Чори учар: – Энди буларни нима қиласан?

Бўри полвон: – Нима қиласай?

Чори учар: – Ўша оғайниларингга қайтариб топшир. Пулингни қайтариб ол. Сотиб юборган мол-ҳолингни оғилга, кўрага қайтариб сол. Оғилида моли, кўрасида қўйи йўқ одамнинг рўзгорида барака бўлмайди.

Шоди барака: (Хөвлиқиб) – Қандай қилиб бу тухумлар сенинг кўлингга тушиб қолди?

Чори учар: (Мийигида кулиб) – Сир. Бунинг учун Нозим шоирни ҳам, ҳалиги инглиз меҳмонни ҳам янисбётманлар.

Ҳар учаласи баравар кулиб юборишади. Чори учар уларни супага чорлайди.

Бўри полвон: – Мен кетдим.

Чори учар: (Ажабсиниб) – Қаёқقا?

Бўри полвон: – Фарғонага. Манави зормандарни ўз эгаларига бериб қайтаман. Сен айтгандай куракда турадиган ишларни қиласай...

Бўри полвон кетади. Чори учар ва Шоди барака супа ёнида қолади.

ОЛТИНЧИ САҲНА

Орзубойнинг ҳовлиси. Оддий қишлоқ хонадони. Ҳовлида дараҳт соя ташлаган жойга ўрнатилган ёғоч каравотда Орзубой кўрпа-тўшак қилиб ётибди. Боши гарди рўмол билан боғланган. Ёнида қизи Райҳон. Ғамгин қиёфада отасининг бошида ўтирибди. Райҳон отаси бош кўйган ёстиқ ёнидаги чойнакдан пиёлана чой қуиб, бир қўли билан отасининг бошидан ўнгай бўлсин учун кўтариб, унинг оғзиға пиёлани яқин олиб боради. Ота қўли билан "ичмайман" ишорасини қиласди. Қиз отасининг бошини ёстиқка қўяди. Шу маҳал Орзубойнинг хотини Норгул эрининг бошидан исириқ тутаётган оташкуракни айлантиради. Ҳовли эшиги тараққаб қишлоқнинг қушноч кампиди Тўхта хола кириб келади. Қиз билан она худди нажоткорини кўрган каби ўрнидан дик этиб туршиади. Она қўлида тутаётган оташкуракни қизига беради, қизи оташкуракни олиб чиқиб кетади. Орзубойнинг бошида Тўхта қушноч билан Норгул қолишаади. Норгул сўзсиз ётган эрига қараб ҳиқиллаб ўиғлаб кўз ёш тўқаяпти. Рўмоли уни билан кўз ёшларини ҳам артади. Тўхта қушноч каттакон гарди рўмоли унига тугилган пахтани олиб беморнинг бошидан айлантириб уни силай бошлайди. Нималарни дир пичирлайди.

Тўхта қушноч: (Норгулга) – Гапирмай қўйдими?

Норгул: (Қалтираб) – Гапиради, гапирайапти. Ҳозиргина дўхтири келиб уйку дори бериб, ухлатиб кетди. Гапиргандаям ғалати гаплар қолаверади, гапи ғалати, эси кирди-чиқди бўлғанга ўхшайди. Ана, ётган жойида томорқани кўрсатиб, даромад дейди. Колбаса дейди. Колбаса экдим, жуда кўп дейди.

Тўхта кампир: (Силашдан тўхтаб) – Бу нима деганинг? Томорқа томонни кўрсатаяпти?

Норгул: – Ҳа, анави жойни, ёнғоқ томонни кўрсатиб, нуқул колбаса дейди. Алаҳсийди.



Тўхта қушноч: (Ўйчан) – Жин чалибди. Эрингни жин чалибди. Ёнғоқнинг тагида ухлаган, кейин ўрнидан туриб сувга ҳалиги, сувга чоптирган. Жин чалган буни. Сулаймон ота оралабди бунингга. Ҳа, ёнғоқнинг тагида ухлаб туриб ё кул босган, ё ҳали айтганим сувга...

Норгул: – Энди нима бўлади?

Тўхта кампир: (Орзубойга энгасиб, нафасини ростлаб) – Ҳой, бадбаҳт. Қайт. Қайтмасанг сенга лаънат, қайтармасам менга лаънат. Қайт бадбаҳт, қайт. (У ўзича жинни лаънатлай бошлайди. Сўнг нималарни дир ичиде овоз чиқармай узоқ ўқийди. Пичирлайди. Сўнг, беморга куф-суф қилиб, яна қўлига пахта олиб унинг бошидан айлантиради...) – Рўйпирли боваларим, ҳазил-хузил қилган бўлса кечирингизлар, айтгандойлаганларини сизга раво кўрди. Эсор-ўсар юрган бўлса кечирингизлар. (Сўнг беморнинг бошида туриб яна нималарни дир пичирлайди-да, дуога қўл очиб юзиға фотиҳа тортади. Сўнг Норгула) – Яхши бўп кетади. Тез бир оқ хўроуди сўйиб, қонига пахта ботириб ўчоққа ташлагин. Мени айтди дейсан, тузалиб қолади. (Сўнг ҳовлига қараб) – Шу ёнғоқ ўлгурни узокроққа эксанглар бўлмасмиди, буям етмагандай чолдевор олдини кулхона қип ташлабсизлар. Зиён бу, зиён, айланай, зиён! Бундай жойни босгандан кейин, колбаса эмас, бошқа нарсаям деб алаҳсийди, айланай. Тавба, колбаса эмиш..

Тўхта қушноч ўрнидан туради. Норгул унга нимадир солинган тугунча тутади. Тўхта қушноч тугунни олади-да қўлтиғига қистириб дуога қўл очади.

Тўхта қушноч: – Омин, менинг қўлим эмас, биби отинларимизнинг қўли, шу инимиз соғайиб кетсин.

Тўхта кампир чиқиб кетади. Райхон югуриб келиб яна ухлаётган бемор отасининг ёнида ўтириб, унинг бошини силай бошлайди.

Райхон: – Отажон, отажоним. Ҳали яхши бўп кетасиз, ота. Бироз асабийлашибисиз, ота. (У отасининг юзидан оҳиста ўлиб қўяди.)

Кўча эшик тарақлаб ҳовлига Чори учар кириб келади. Беморнинг ёнига келиб ўтиради. Райхон қўлини кўксига қўйиб салом бериб ҳовли адогига кетади. Чори учар бир алфозда ётган Орзубойга эзилиб, раҳм ва ўқинч туйгулари билан қарайди. Шу маҳал ошхона томондан Норгул чиқиб келиб, бемор ёнида унга ачиниб қараб ўтирган Чори учарга дардини ёя бошлайди. У ҳам bemorning бу ёнига ўтиради.

Норгул: – Кўрмайсизми, ака, туппа-тузук юрувди. Мормин қишлоққа, ошнасиникига тўйга ҳам бориб келди. Сўнг томорқани айланди. Ёнғоқ тагида туриб нималарнидир чамалади. Ҳисоблади.

Чори учар: (Хушёр тортуб) – Нималарни чамалади?

Норгул: (Бармоқларини букиб кўрсатиб) – Худди шундай қилиб, бармоқларини букиб бир тонна чиқса ўн миллион, ўн тонна чиқса юз миллион, деб ҳисоблади. Мен ёнғоқ ортида деворга таппи ёпаётгандим. Узича кулиб ҳам қўядими-еий... Хуллас алламбалоларни ҳисоблайвериб ўн дақиқалар томорқа бошида турди, денг...

Чори учар: (Асабийлашиб) – Менга қаранг, нимани ҳисоблади, нимани ахир?

Норгул: (Энди бош чайқаб) – Колбасани. Колбаса экканман дейди. Кўрмайсизми, ақли ҳам кетганми, деб кўрқаман-да. (Сўнг ўиғлай бошлайди...)

Чори учар: (Овозини пасайтириб) – Эрингизнинг бу гапини ҳеч ким эшитмадими, келин?

Норгул: – Йўқ, эшитмади. Бир мен, бир қизим, бир қушноч кампирга айтдик, шу билади.

Чори учар: (Энди бақириб юборади) – Нима? Қушноч? Қанақа қушноч? Вой, энди Худо урди, бутун қишлоқ билади, бутун қишлоққа кетди бу хабар.

Норгул: (Эсанкираб) – Қайси хабар?

Чори учар: (Жаҳл билан) – Эрингизнинг жинни бўлгани, колбаса эккани.

Норгул: (Дийдиё қилиб) – Ака, одамнинг куни битиши олдидан шундай бўп қолармикин-а? Кўчиб келганимиздан бери, йигирма йилдан бери томорқага қўл урмаган эди. Йилда бир марта мол-ҳолга ўт ўриб олардик. Бу йил бир ойдан бери тиним билмай, томорқада ишлади. Юмшатди, илдизларни тозалади, кун бўйи сахардан шомгача томорқадан чиқмади. Мен ҳазиллашиб, агар шунча йилдан бери шундай ишланингизда аллақачон бошқача яшардик, бой бўп кетардик десам, ҳали кўрасан, шу йилнинг ўзида бойиб кетамиз, бу катта шанс, деди... Нимага ундан деди билмайман. Ё бундай ишга шўнгигиб, ишга берилиб кетиши оғирлик қилдимикин-а, офтоб урдимикин-а, ё қўз тегдимикин-а... (Норгул уввос тортуб ўиғлай бошлайди...)

Чори учар: (Атрофга аланг-жалаң) – Жим-е, секинроқ... Ҳар хил гапни кўйинг, келин.

Чори уларнинг ҳовлиси. Ҳовли эшиги тарақлаб Тўхта қушноч кириб келади. Супа томонга юради. Унинг келганини кўрган Рўзихол худди нажот фариштасига ўйлиққандай олдига югуради.

Рўзихол: (Ўргилиб, айланиб) – Келдингизми, дугонажон. Яхшимисиз, айланай, суюгиниз енгилми, дамлеккинамисиз?

Тўхта қушноч: (Виқор билан супага қараб) – Нима бўлди, айланай. Қирдан қулаган айиқ полвонга ўхшаб ётибди эрингиз...

Рўзихол: – Кўрмайсизми? Бир кунда шундай бўлди, дугонажон.

Тўхта қушноч: (Супада беморнинг ёнида ўтириб) – Ўзиям Одам атони танимай кетувди, эрингиз. Қилма топасан, деган нақл бор... Энди, гўр бўлармиди, гердайгани гердайган эди-я ўзиям.

Рўзихол: (Ялинини оҳангиди) – Орзубой акани даволаганингиздан кейин, бутун қишлоқ нафасингизга тан берди, дугонажон. Эримнинг ўзи ҳам сизни сўради.

Тўхта қушноч: (Беморга ажабсиниб) – Ўзи сўрадими?

Рўзихол: – Ўзи бир аҳволда-ю сизни сўради, айланай.

Тўхта қушноч: (Бемор ёнига ўрнашиб ўтириб, керилган кўйи, худди Орзубой бетоб бўлганда нима қилган бўлса, шундай ҳаракат қилиб, айнан ўша гапларни тақрорлай бошлайди-да, рўмоли учига тугилган пахтани ўнг қўлига олиб, bemorning бошидан ай-

лантириб уни силай бошлайди... Силаб бўлгач – икки қўлининг панжаларини ёзид олдга-ортга тортуб) – Қайт бадбахт, қайт бадбахт. Қайтмасанг сенга лаънат, қайтмасам менга лаънат. Куфф-суфф. Куфф, сууфф... (У бемор бошида яна нималарни дир пичирлади...)

Рўзихол: – Тузалармикин, ишқилиб?

Тўхта қушноч: – Тузалади. Кўпларнинг дилини оғринтирган. Рухлар кўрангиздаги оптоқ кўчкорни сўраяпти. Шуни сўйиб худойи қилинг... Кейин ҳамма дезазаларни уч кечакундуз очиб кўйинг! Эрингизнинг эгнидан сира тушмайдиган яхши кўрган тўниними, бирор кийимини қишлоқ йўлидаги лайлак тутнинг шохига илиб кўйинг. Ҳаммани кўзи тушсин. Икки кундан кейин олиб уни қўшнининг эшагига жабдуқ қилинглар.

Шу пайт Чори учар Тўхта қушночининг билагидан шартта ушлаб олади. Тўхта қушноч қўрқанидан чинқириб ўрнидан туради. Чори учар ҳам унинг қўлини қўйвормай ўрнидан туриб кетади. Тўхта қушноч ўтакаси ёрилгудай бўлиб:

Тўхта қушноч: (Кўрқиб) – Қўлимни қўйворинг, қўлимни қўйвор!

Чори учар: (Ғазаб билан) – Қўйвормайман! Сенга кўрсатиб қўяман, мени касал деб оғзингга келган гапни гапиравердинг-а?

Рўзихол: (У ҳам ўрнидан туриб, гоҳ эрига, гоҳ қушночга қараб, анграйиб, уларни айланиб югурба шохайди) – Вой, ўлмасам, вой, ўлмасам.

Тўхта қушноч: (Рўзихолга) – Ҳой, ҳой, Рўзи. Эрингизнинг күёнчиғи қўзиб, тутқаноғи тутганга ўхшайди. Бу соғмас, бу жинни бўпти.

Чори учар: (Уни қувиб, ортидан тепиши учун оёғини қўтариб қувлади. Ҳамон уни қувлаб) – Ўзинг жинни! Ўзинг тентаксан!

Тўхта қушноч юргургилаб-юргургилаб, саҳнанинг четида ўтириб қолади. Оғир уф тортади. Чори учар супа четида ўтириб ҳансираиди. Рўзихол жойида тик туриб гоҳ эрига, гоҳ қушночга қарайди.

Тўхта қушноч: (Уф тортуб) – Рўзи, Рўзи дугона, бу нима қилиқ? Шум эрингизни гўр ҳам ютмайди. Мени ўлдирай деди, бу эрингиз нақ тентак. Тентак.

Чори учар: (Ўрнидан туриб) – Бас қил, бас. Ўзингнинг эсинг кетган. Оқ қўчкор эмиш, чопонни жабдуқ қил эмиш, сенга кўрсатиб қўяман. Алвости.

Рўзихол: (Эрига қараб йиглаб) – Қилифингиз қурсин. Бу нима ҳазил-а? Бу нима қилғилик?

Чори учар: (Белини ушлаб, заҳарли кулиб) – Хўш, гап бундай, Тўхта қушноч, икковимиз ўртамиздаги бир сир бор, эсингдан чиқмайди-я?

Тўхта қушноч: (Бош иргаб уф тортуб) – Шунинг ўчини олай девдингизми-а? Қирқ йил қирон келсаям, қирилиб кетгурнинг эсидан чиқмабди.

Чори учар: (Тиржаяди) – Эсдан чиқмайди. Эсдан чиқмайди. Мана шу елкамга ўтиргизиб пахта пояни кешиб ўтганим сира эсимдан чиқмайди.

Рўзихол: (Эрига анграйиб, ҳеч нарсани тушунмагандай қараб) – Кимни кўтарасиз? Кимни елкангизда кўтаргансиз, нега кўтаргансиз?

Чори учар: (Киноя билан Тўхта қушночга ишора қилиб) – Анавини.

Тўхта қушноч: (Юзини қўли билан тўсиб) – Во-оей! Одам бўлмай ўлгура-а?

Чори учар: (Хотинизга) – Хотин, сен қайғурма, ҳеч нарса бўлгани йўқ. Обшир қишлоқдан сел келиб авжи баҳорда Хўжаипок дарёсида сув тошувди. Ўшанда бу Fўччи тентакка нон синдирилиб фотиҳа қилинган эди. Қарасам дарёда оқиб ўладиган. Ноилож, елкамга миндириб дарёдан олиб ўтдим... Сўнг буларни тўйи бўлди. Ўғли, ҳалиги Содик эзма туғилди. Елкамга минган бойвучча эса бугун бундай деб туриби.

Тўхта қушноч: (Ингламоқдан бери бўлиб) – Во-еёй. Вооей. Шуни ўчини олдингизми-я, одам бўлмай ҳар бало бўлгур...

Чори учар: (Айёрон) – Йўқ. Ўч олиш учун чақирмадим. Бир таклиф бор, шуни қилмасанг, у дунё бу дунё норизоман...

Тўхта қушноч: (Энди аланглаб) – Яна нимани бошламоқчисиз?

Чори учар: (Бир Рўзихолга, бир Тўхта қушночга қараб) – Орзубойнинг хотинига айтасан... У гапингга кўнади. Эримни қушноч даволади, деб ўйлаяпти. Майли, дард ҳам, шифо ҳам Худодан. Хуллас, бу кеча Орзубойницида бўл. Чироқ ёқиб ис чиқар, ўқитасанми, силайсанми, ирим-сирим қиласанми, икки-уч соатга ҳовлига чиқармасанг бўлди. Бола-чақасиям чиқмасин, ирими шунақа де... Инс-жинсларни қуваяпман де.

Рўзихол: – Яна нима ўйин бошламоқчисиз?

Чори учар: (Хотинизга ўшқириб) – Жим. Жим бўл.

Тўхта қушноч: (Ўрнидан туриб) – Мен ҳовлига чиқманглар десам, улар гапимга киради, деб ўйлаизисми?

Чори учар: (Айёrona кулиб) – Албатта. Қушноч, Сен айтсанг, айттанингни қилишади. Чироқ ёқиб ис чиқараман, Сизлар ҳовлига чиқишларинг хавфли, шундай қилсак Орзубой батамом, тузалади дейсан, вассалом.

Тўхта қушноч: (Ҳайратини яширолмай, бош чайқаб) – Тушунарли, мен унинг уйида чироқ ёқиб, ис чиқараман.

Чори учар: (Кулиб) – Албатта шундай! Тўғри топдинг. Фақат, Орзубой бола-бақраси билан кечаси ҳовлига чиқмай турса бас. Икки соатга.

Рўзихол: (Эрига) – Сиз қачон тинчийсиз?

Чори учар: – Жим! Жим бўл!

Тўхта қушноч: – Мен... Мен.

Чори учар: – Ҳа... боравер. Шу кеча... Тушундингми? Соат ўндан ўн иккигача!

Шу пайт ҳовли эшиги тарақлаб Эшдавлат “Бос, бос, қамчи бос, отга ўзинг қамчи, бос!” қўшигини хиргойи қилиб кириб келади. Саҳна ўртасига келганди оёғида тик турган Чори учарга, қушночга ва Рўзихолга қараб қотиб, ҳангуманг бўлиб қолади.

Эшдавлат: – Тога!.. Тога!.. Ие-ие, қайтиб кепсизда-а, тоға! (Кейин яна ҳайратлангандаи...) – Оббо тоға-е, Тўхта холам Сизни тирилтирибди-а? Қойил-е, қойил холажон (Қушночга таъзим қилади). Барака топинг, хола... Одамлар, қушноч хола зўр деса, ишонмасдим. Чин экан, чин экан, хола.

Чори учар: (*Қовоқ уюб Рўзихол ва Тўхта қушночга қараб*) – Қани, Сизлар энди боринглар. Бизнинг Эшдавлатбой билан ишимиз бор...

Хотинлар чиқиб кетади. Чори учар Эшдавлатга юзланади.

Чори учар: (*Ўсмоқчилаб*) – Жиян, шу... бир хизмат бор!

Эшдавлат: (*Чори учарга яқин келади. Чори учар Эшдавлатга бурнини жийириб қўли билан елпингган бўлади.*) – Ҳа, энди тоға, йигитчилик...

Чори учар: (*Норизо*) – Қачон қараса шу ўлгурни ичиб оғзинг сасиб юради. Винзавод бўп кет-а...

Эшдавлат: – Нима гапингиз бор эди, тоға?

Чори учар: (*Ундан сал узокроқ туриб*) – Шу ерда туравер. Яқинимга келмасанг ҳам майли, жиян.

Эшдавлат: (*Норизо*) – Уфф...

Чори учар: (*Масофа сақлаб*) – Жиян, ҳалиги, оқ тепанинг ёнидаги кўл атрофида бандидевона ўсади биласан-а?

Эшдавлат: – Биламан.

Чори учар: – Ана шу бандидевонадан бир қучоқ олиб кел, жиян.

Эшдавлат: – Эй-е, тоға, шу сассиқ бутани нима қиласиз? Бандидевонани мол ҳам емайди-ку, сассиқ-ку?

Чори учар: – Ишинг бўлмасин, одамнинг белига келадиган бўлиб қолганларини илдиз-пилдизи билан кўшиб суғуриб олиб кел.

Эшдавлат: Хўп.

Орзубойнинг хотини: (*Бақириб юборади*) – Отаси... Отаси! Норгул, ҳой Норгул. Бу ёққа кел.

Қизи чопиб чиқади. Югураман деб саҳнада йиқилиб тушади. Сўнг у ҳам “колбаса дарахт”ларига қараб жойида тахта бўлиб қолади. Шу пайт Орзубой югуриб чиқади.

Орзубой: (*Ховлиқиб*) – Нима гап-а? Нима гап?

“Колбаса дарахтча”ларини, колбаса етилган буталарни кўриб ҳангу манг бўлади. Уларнинг олдига югуриб боради. Бирини ушлаб кўради. Кейин уларни айланиб югурба бошлайди. Бир маҳал уларнинг учаласи ҳам жимиб, бир жойда тўпланишиб колбаса дарахтларига қараб туришади. Мусиқа, енгил мусиқа. Пирик мусиқа. Шу маҳал саҳнага бутун қишилоқ одамлари, комедияда иштирок этган ҳамма-ҳамма кириб келади. Улар ҳам мусиқа остида колбасаларга ҳайратланиб қараб туришибди. Нозим шоир, Бўри кал, Шоди барака, Чори учарнинг ўғли – Йўлдошли, ҳамма-ҳамма, ҳатто Нозим шоирнинг дўстси, ҳалиги ажнабий – инглиз ҳам бор. Айниқса, унинг ҳайрати чексиз. У колбаса осилиб турган дарахтсизон ўсимликларни суратга олиш билан машғул. Ҳар-ҳар замонда “гуд-гуд” деб кўяди. Эшдавлат Чори учарнинг қулогига нимадир демоқчи бўп энгашади. Чори учар юзини бужмайтириб, бурнини жийиради, қўли билан гўё бурни олдидағи ароқ ҳидини ҳайдагандай бўлиб Эшдавлатга норизо қараб кўяди.

Эшдавлат: (*Мийигида кулиб*) – Балосиз, тоға, балосиз.

Чори учар: (*Кўрсаткич бармоғини лабига теккизуб*) – Жимм.

Чори учар мийигида кулади. Эшдавлат кулади. Бошқалар ҳайрат билан колбаса дарахтчаларига термулиб туришибди. Мусиқа, енгил ва кўнгилни хушиуд этувчи мусиқа янграйди.

Парда ёпилади.





Мушиҳадаада

Мушиҳадаада Мушиҳада Мушиҳада

Абдулла УЛУГОВ

ШАКЛ ЭМАС, МАЗМУН МУҲИМРОҚ



Маълумки, адабиётда ҳикоя жанри ўзига хослиги билан алоҳида ўрин тутади. Хўш, бу ўзига хосликни биз нималарда кўрамиз? Аввало айтиш мумкинки, ҳикоя роман, қисса ёки достондан кичкина. “Уруш ва тинчлик”, “Тинч Дон” ёки “Иблислар”, “Телба”, “Жиноят ва жазо” романлари қаршисида А. Чехов, Р. Тагор, А. Қаҳхорнинг ҳикоялари фоятда кичкина, мўъжаз. Роман, қисса, достонларни ўқиб чиқиш учун кўп вақт ва ҳафсала зарур. В. Шекспир асарларини саҳнада томоша қилиш учун чипта олиш, театрга бориш, камида икки-уч соат ўша ерда бўлишга тўғри келади. “Уйку истаги” (А. Чехов), “Анор” (А. Қаҳхор) ҳикоясини мутолаа қилиш учун эса узоги билан ўн-ўн беш дақиқа кифоя. Эътибор билан ўқиган киши улардан юз саҳифалик қисса, уч юз бетлик роман билан танишганидан кўра кўпроқ мутаассир бўлади. Ваҳоланки, ушбу ҳикояларда қаҳрамон ҳаётидаги битта воқеа қаламга олинади. Ҳикоянинг қисса, романдан фарқли жиҳати унда қаҳрамон ҳаётидаги биргина воқеа гавдалантирилиши билан белгиланади. Шу воқеанинг бошланиши, ривожланиб, авж нуқтага кўтарилиши кишини қизиқтириб қўяди ва воқеанинг якуни, албатта, ўйлантиради. Ўқувчининг дикқати, эътибори маълум муддат шу биргина воқеа ва ундаги қаҳрамоннинг ҳолати, тақдири билан банд бўлади. Хусусан, А. Қаҳхорнинг “Ўғри”, “Бемор”, “Анор”, “Даҳшат”, “Майиз емаган хотин”, Ф. Гуломнинг “Менинг ўғригина болам” ҳикоялари шундай салмоқча эга. Ўзбек адабиётида ҳам, башқа ҳалқлар адабиётида ҳам иштиёқ билан ўқиладиган ва кишини ҳамиша ўйга толдирадиган ҳикоялар кўп. Улар кишиларнинг маънавияти, руҳиятига, дунёкарашининг теранлашишига, олам ва одам тўғрисидаги тасаввурининг бойишига жилд-жилд романлар, юз-икки юз саҳифали қиссалар, икки-уч соат томоша қилинадиган спектакль, фильмлардан кам таъсир кўрсатмаган.

Абдулла УЛУГОВ

1960 йилда туғилган. 1983 йилда Тошкент Давлат университетининг ўзбек филологияси факультетини тамомлаган. Адабиётшунос. “Қиссачилигимиз қурралари”, “Инсон ибрата интилади”, “Асл асарлар сөхри”, “Ватан – ва тан” каби китоблари, “Адабиётшуносликка кириш”, “Туркий ҳалқлар адабиёти” сингари ўқув қўлланмалари нашр этилган. Айни пайтда Ўзбекистон Миллий университети доценти.



ҳамма нарсанинг ихчами дуруст бўлганидай, ҳикоянинг ҳам қисқа ҳажмлиси, теран мазмунлиси ва лўнда ифода услубида битилгани яхши. Ҳикоями, қиссами эканлиги аниқ билиниб турмайдиган, чўзилиб кетган асарларнинг таъсир кучи паст бўлади. Улар А.Чехов ёки А.Қахҳорнинг мўйжаз ҳикояларига таъсирчанлик бобида бўйлаша олмайди. Албатта, ҳикоянинг ҳажми сонет, рубойй, туюқники сингари қатъий белгиланмаган. Шундай бўлса-да, қаҳрамон ҳаётидаги битта воқеа тасвириланадиган ҳикоя аччиқ ичак каби чўзилмагани, ҳар жиҳатдан аниқ, ихчам ва лўнда бўлгани дуруст. А.Чехов, А.Қахҳорнинг ҳикоялари ҳамиша қадрланади. Уларнинг услуги эскирмайди. Ҳажман ихчам, мазмунан теран, услуги ёрқин мумтоз ҳикоялар санъатдаги реализм йўналиши бевосита ҳаётга асосланиши ва шу боис бениҳоя таъсирчанлиги, унинг имкониятлари ғоят кенглигидан далолат беради.

А.Чехов, Р.Тагор, Мопассан, А.Қахҳор ҳикояларида ҳаётнинг ҳамма кўрадиган жиҳати тасвириланади. Яъни унда кечган турли воқеалар ва улардаги иштироқчилар ҳолати, хатти-харакати гавдалантирилади. А.Қахҳорнинг “Ўғри”, “Бемор” ҳикояларида қаҳрамонлар характеристида ҳеч қандай ўзгариш юз бермайди. Бу тур ҳикоялар воқеабанд асарлар сирасига киритилади. Айни ҳикоялarda қаҳрамонлар характеристидаги ўзгариш эмас, битта ҳаётий воқелик ичидаги ўсиш, тадрижийлик кўрсатилади. Ҳаётни бу тариқа бадиий акс эттирган асарлар, жумладан, ҳикоялар инсониятга жуда кўп нарса берди: улар аввало ижтимоий воқелик тўғрисида мушоҳада юритишга, ҳар бир кишининг қувончи, ғами жамиятга бевосита боғлиқлигини англашга ўргатди; айни асарлар таъсирида кишилар ҳаётда фаол бўлиш зарурлигини ва бунга ҳар бир одам – эркак ҳам, аёл ҳам, ёш ҳам, кекса ҳам тўла ҳақли эканини тушуниб етди. Инсонни ижтимоий воқелик билан узвий алоқада тасвирилаган, ижтимоий-тарихий шароитнинг инсон тақдиди ва феъл-авторига таъсирини теран бадиий тадқиқ этган асарлар, жанридан қатъи назар, кишиларда ўзини бошқалардан кам бўлмаган тенг ҳуқуқли инсон эканлигини идрок этиш, ўз ҳақ-ҳуқуқи учун кураш ҳиссини уйғотди. Ҳаётни реалистик акс эттирган асарлар инсон тақдиди, орзу-интилишлари ижтимоий асосга эга эканлигини кўрсатди. А.Чехов, А.Қахҳор каби адилар ижодининг аҳамияти аввало шу билан белгиланаади. Лекин эндилиқда бу адиларнинг ҳаётни бадиий акс эттиришдаги ифода услуги бадиий-эстетик тафаккурдаги босиб ўтилган босқич бўлиб қолди. Фазал, рубойй, туюқ ҳам шундай шакл ҳисобланади. Ҳаёт ҳодисалари, инсон дунёси эса кўп қиррали. Уларга турли томондан қаралса, турлича кўринади. “Анор”, “Даҳшат”, “Ўғри”, “Бемор”, “Майиз емаган хотин” (А.Қахҳор), “Менинг ўғригина болам” (F.Гулом) каби ҳикоячилигимизнинг мумтоз намуналарида қаламга олинган воқеликни, қаҳрамонлар образини бошқача гавдалантириш ҳам мумкин. Айни бир сюжетни ўзига хос талқин этиш ижодкорнинг дунёқарашига, маҳоратига ва албатта, яшаётган замоннинг бадиий-эстетик тамойилларига боғлиқдир. А.Қодирий романчилигимизнинг эмас, ҳикоячилигимизнинг ҳам тамал тошини кўйган. Унинг “Улоқда” асари ўзбек ҳикоячилигининг дастлабки на-мунасадидир. “Ўткан кунлар” муаллифи бошлаб берган ҳаётни реалистик тасвирилаш йўлини А.Қахҳор юк-

сак чўйқига кўтарди. Кейинги авлод адилари “Анор”, “Бемор” муаллифи анъаналарини ривожлантириди. Ўзбек ёзувчиларининг барчаси – О.Ёкубовдан тортиб Н.Эшонқулгача “Ўткан кунлар”, “Бемор”ни ўқиган. Уларнинг адабиётга қизиқиши, сўз санъати тўғрисидаги илк тасаввuri шу асарлар асосида шаклланган. Уларни Лотин Америкаси адабиёти вакиллари, япон адиларининг асарлари кейинчалик янгилик сифатида мафтун этган. Кафка, Камю, Пруст, Жойс, Фолькнер каби ёзувчиларнинг инсон образини гавдалантириш услуги бадиий-эстетик тафаккурдаги янги босқичдир. Бадиий-эстетик тафаккур эса ҳеч қачон бир жойда тўхтаб, қотиб қолмайди. У ҳам бошқа ҳодисалар сингари муттасил ўзгаради. Шундай экан, “Улоқда”, “Ўғри”, “Бемор”нинг бадиий даражаси ҳозирги модерн ҳикоялардан паст дейиш ножоиз. Чунки ҳар бир даврнинг ўзига хос адабиёти – бадиий-эстетик диди бўлади. Бугун инсоният ахборот “бўрон” ичида яшаяпти. Аввал адабиёт одамларга ахборот етказар эди. Энди унинг бу вазифасини ТВ, радио, интернет тармоғи, матбуот тортиб олди. Кино ҳам ундан ўз улушкини олиш учун ёпишди. Шу боис адабиёт учун воқеаларни нақл қилиш ўринисиз бўлиб қолди. Навоийнинг қаҳрамони Баҳром четдан келган мусоифларнинг ҳикоятларини тинглаб овунган бўлса, ҳозир ТВ каналлари, интернет саҳифалари, матбуот кишини зериктирмайди. Шунинг учун барча жанрларда инсоннинг ботинини, ҳиссий оламини кўрсатишга киришилди. Аввал адабиётда воқеалар тасвири устуворлик қилган бўлса, энди асосий эътибор сезги, туйгулар тасвирига қаратилди. Сезги, туйгулар таҳлилидан иборат асарлар ҳаётдаги кўзга кўринадиган ва кўринмайдиган ҳар бир ҳодиса инсонга фикрлаши учун туртки, мушоҳада юритиши учун асос бўла олишини билдиради. Одам эса ёбичиши эмас, балки фикрлаш, мушоҳада юритиш орқали Яратувчининг чексиз қурдати, унга берилган ҳаётнинг моҳиятини билиб, ўзининг кимлигини англаб етади.

Гомернинг “Илиада”, “Одиссея”си, ҳиндларнинг “Рамаяна”, “Махобҳорат”и, туркийларнинг “Алпомиш”, “Манас” ёки “Минг бир кеч” эртаклари ҳозир ҳам замонавий асарлардан кўра кўпроқ қизиқиш ўйғотаётгани, улар асосида фильмлар яратилаётгани, тадқиқотлар олиб борилаётгани воқеабанд асарларнинг аҳамияти, қадри ҳеч қачон йўқолмаслигидан далолат беради. Инсон руҳияти – туйғу, ҳиссиётлари қаламга олинган ҳикояларни ўқиганимиздан кейин кўнгилда одам тушунолмайдиган бу олам қанчалик мураккаб, чигал, мунг, изтиробга тўла бўлмасин, барибир гўзал, деган фикр кечади. Хусусан, Назар Эшонқулнинг ҳикоялари шундай ҳолатга солади. У инсон қалбидаги оғрикли кечинмаларни бениҳоя изтироб билан ёзади. Унинг асарларида ҳар бир тафсилот қаҳрамон ҳис қилган кулфат тўғрисида ўйлантириб, юракни ёзади. Адилнинг “Шамолни тутиб бўлмайди”, “Маймун етаклаган одам”, “Тун панжаралари” каби ҳикоя, қиссаларида ҳар бир сўз оддийлиги, аниқлиги, рангинлиги, жарангдорлиги билан тасаввuri чарақлатиб юборади. Воқеабанд бўладими, ҳис-туйгулар тасвириланадими, бундан қатъи назар, сўзлари жаранглаб турса, фикр аниқ ифодаланса, мuloҳазалар бир-бирини қувватлаб, кучайтириб, занжир ҳалқалари каби боғланса, ўша асл адабиёт асаридир. Ўшандай асарлар санъат нималигини, сўзларнинг киши руҳини юксакларга кўтарувчи

абадий кучи қанақалигини ҳис эттиради. Руҳият, сезгига урғу берилган асарлар қаҳрамоннинг қиёфаси, ҳолати, кечинмасини аниқ тасаввур этишга, кишининг юз-кўзи, бармоқларининг ҳар бир ҳаракати, имосида жуда кўп маъно-мазмун мавжудлигини билиб олишга имкон беради. Айни асарларни иштиёқ билан мутолаа қилган китобхон асл адабиёт нима эканлигини англаб етади. Воқеабанд асарларни қизиқиш билан ўқийдиган ўқувчилар ҳам аста-секин, албатта, инсоннинг ботини, ҳиссий ҳаёти тасвирланган асарларни мутолаа қилишга ўтади. Лекин китобхонликнинг сусайиб бораётгани, одамлар маънавий бойликлардан баҳраманд бўлишга эмас, нима қилиб бўлса-да, пул топиб, мол-давлат ортиришга ружу қўяётгани кишини хавотирга солади.

Кишиларнинг руҳиятига таъсир этиб, маънавиятини юксалтириш санъатнинг асосий мақсадидир. Шундай экан, адабиёт одамлардан олдинда юриши, пастга тушиши эмас, юксакликка интилиши табиий. Ундан ҳамма ўзининг диди, савияси даражасида баҳра олади. Замонавий адабиётда ҳаёт воқеаларини эмас, унинг марказида турган инсоннинг зиддиятли ўй-кечинмаларини тасвирлаш устувор бўлаётгани кишини кувонтиради. Чунки бу кишиларнинг ўзини англаши, ҳаёти ҳақида ўйлаб кўриши ва муайян ху-лосалар чиқаришига кўмаклашади. Инсоннинг ботинидаги мураккаб мулоқот жараёни акс эттирилган асарлар ҳар бир кишига унинг ҳаёти бошқалар билан, бутун коинот билан чамбарчас боғлиқ эканини англашга кўмаклашади. Эртак, ривоят, афсона, до-стонлардан тортиб “Минг бир кеча”, “Гулливернинг саёҳатлари”, “Робинзон Крузо”га ўхшаш воқеабанд асарлар одамларга дунё кенг эканлиги, у ажойибу фаройиб воқеаларга тўлалигидан сабоқ беради. Инсоннинг руҳиятидаги зиддиятли жараёнлар ёритилаётган асарлар эса ҳар бир одам катта олам эканидан хабардор этади. Юқорида эслатганимиздай, воқеабанд асарларни иштиёқ билан ўқиганлар турмуш тажрибаси ва мутолаа малакаси ортиши натижасида инсон руҳиятидаги жараёнлар тадқиқига қаратилган асарларга қизиқиб қолади. Бу йўлни ҳар ким ўзича босиб ўтади. Одамнинг мутолаа малакаси, китобхонлик даражаси ўсишига жуда кўп омиллар таъсир кўрсатади. Ҳамма очиқча тан олмаса-да, бошқаларга айтмаса-да, кимларнингдир диди, савияси ўзидан баландлигини сезади ва ўшаларга эргашади. “Бирники мингта, мингники оламга” деган гап аслида дид, савия, дунёқарашининг ўзгариши ҳақида айтилган. Глобалла-

шув даврида ҳамма нарса жуда тез ўзгармоқда. Аввалин замонларда эл эллик йилда ўзгарган бўлса, ҳозир ўн йилга қолмай, ҳамма соҳада бир авлод ўрнини янги бир авлод эгалламоқда. Бошқарув тизимида ҳам, ишлаб чиқариш, хизмат кўрсатиш тармоқларида шу ҳолат рўй бермоқда. Ёшида ўн йил фарқ бўлган кишиларнинг ҳаётга муносабати, билими даражаси, малакаси тамоман бошқача. Улар санъатга, адабиётга муносабати, китобхонлигига кўра ҳам бир-биридан фарқ қилади. Авлодларнинг диди, савияси жуда тез ўзгараётганини кийим-либос модаси, уй-жихозлари, автомашина марказлари бир йилга қолмай янгиланиб бораётганидан ҳам билса бўлади.

А.Чехов, Р.Тагор асарларидан бехабар, А.Қаҳҳор ҳикояларига беписанд қарайдиганлар сафи кенгайиб кетяпти. Интернет асл адабиёт йўлида тўсиқка айланмоқда. Чунки истаган одам интернетда хоҳлаган нарсасини чиқариб ётиди. Интернетнинг мухаррири, ношири йўқ. Ундаги асарнинг бадиий ғоясини ҳеч ким назорат қилмайди. Энг яхши алоқа, мулоқот воситаси, афсуски, бадиий дид, савияни жўнлаштирадиган кенг майдонга айланди. Шафқатсизлик, зўравонлик тарғибаташвиқ қилинган фильмларни кўриб, шу хилдаги китоблардан таъсирланиб улғайган авлод етишиб чиқди. Табиити, Шайх Саъдийнинг “Гулистан”, “Бўстон”ида, Шекспир, Гёте, Достоевский асарларида улуғланган ҳалоллик, олижаноблик бу авлод учун заррача қимматга эга эмас. Руҳни озиқлантириб, туйғуларни тарбиялайдиган, қалбда эзгу ҳиссиятлар уйғотадиган асарлардан бебахра одамлар эса бир-бирига унчалик ачинмайди. Ҳамма нарсани ҳисоб-китоб қилиб яшайдиган бундай кишилар ўз шахсий манфаати йўлида ҳеч бир нарсани аямайди, аждодлари ардоқлаган қадриятларни беписандлик билан топтаб кетаверади. “Ҳозир юз кишидан неча нафари мунтазам китоб мутолаа қилади ва қандай китобларни ўқийди?” деган савол асосида сўровнома ўтказиб, ёшларнинг, умуман, жамиятнинг дунёқараши, маънавий даражасини аниқласа бўлади. Чунки ҳар бир одам, сезмаган ҳолда, китоблардан жуда кўп хислатларни ўзига сингдиради. Бу муаммо мавзумизга унчалик алоқадор эмасдай туюлса-да, бугунги куннинг энг долзарб, энг оғрикли масаласидир. Китобхонлик барча замонларда инсон маънавиятини шакллантирадиган ўзак омилдир. Шунинг учун мамлакатимизда бадиий асарлар тарғиботига жиддий эътибор қаратилмоқда, китоб байрамлари ўтказилиши анъана тусини олмоқда.





Жаҳонгир ИСМОИЛОВ



Нази Нази
Нази Нази Нази



Сен билан баҳордир улири и куз фасми

ДЕҲҚОН

Ҳамма иш ҳам осон туюлар сиртдан,
Ург қадай олур ҳар қандай меров.
Лекин ерга ург қадаган одам,
Деҳқонга айланиб қолмайди дарров.

Бир экин ерининг шарт-шароити,
Бошқа бир далага келавермас мос.
Ерга қададингми ургуни, рости,
Парварии ҳам даркор шу экинга хос.

Шоир дилидаги түгён, туйгуни,
Бошқаларга тухфа этади шеърда.
Бугун афзал кўрса ором, уйқуни,
Тушириши мумкин қоғозга эрта.

Ёки бунёдкорнинг ишини кўргин,
Зарур ашёлар жам, тураверади.
Агар унинг қўли тегмаса бугун,
Эртага бемалол қураверади.

Деҳқон саратонми, қахратон қишими,
Далада куйманар, тиним билмас ҳеч.
Эртага қўёлмас бугунги ишини,
Бугун улгурмаса, эрта бўлар кеч.

Ер билан “тиллашар” ҳақиқий деҳқон,
Билади қаерда тўқис, кемтиги.



Билим, омилкорлик бобида, ишон,
У ўз даласининг Академиги.

* * *

Юришиб турганда ишинг, кўнглинг чоғ,
Оиланг тинч эса, дилда шукрони.
Озоринг тегмайди ҳеч кимга, бироқ —
Кимдир заволингни кутар пинҳона.

Кўллари муз,
Дили қурумдан баттар,
Башараси нурсиз, боқиши мунгли.
Қувонсанг-у оғир қайгуга ботар,
Ғам чекканинг кўрса яйрайди кўнгли.

Дўстим, парво қилма сен унга ҳеч вақт,
Асло аримасин тегрангдан ёғду.
Ичини қурт еган дарахтга ўхшаб,
Ўз-ўзидан адo бўлиб борар у.

* * *

Сен тенгсиз гўзалсан, ой каби якто,
Дийдорингни қўмсаб ўртанаr дилим.
Лек журъат этолмам қараишга ҳатто,
Кўнгил изҳорига ожиздир тилим.

Муҳаббат ошиқни қўяр қул айлаб,
Малика эрурсан кўнглим таҳтида.

Жаҳонгир ИСМОИЛОВ

1952 йилда Қизилтепа туманида туғилган. Тошкент Давлат университетида таҳсил олган. “Туташ тақдирлар”, “Юртим таровати”, “Юрт меҳри”, “Соғинч”, “Сўнгги манзил” каби кўплаб насрой ва назмий тўпламлар муаллифи.

Ўзбекистон Ёзувчилар уюшмаси аъзоси.

Менга оғир яшаши баҳорни бўйлаб,
Ҳаётим кузга юз тутган вақтида.

* * *

Ким билар тақдирда нелар битикдир,
Заҳар бўлди гоҳо бол деб топганим.
Қайси бир жиҳатдан кўнглим кемтиқдир,
Топганимдан кўпdir ийқотганларим.

Ҳамма пайт ҳам ишинг келавермас ўнг,
Чексиз дунё баъзан қафасдан ҳам тор.
Бол улашиса хушнуд бўлганингдан сўнг,
Заҳар тутганда ҳам чидашинг даркор.

* * *

Ҳаётда мавжуддир мукаммал тартиб,
Тўғри ё нотўғри кўясан қадам.
Унинг азобини бир ўзинг тортуб,
Бир ўзинг кўрасан роҳатини ҳам.

Қоқилмагин, бўлсин суянчинг ақл,
Фойдаси ийқ кейин тўккан кўзёини.
Аждодлар бежисизга қилмаган нақл:
“Ҳар ким ейди ўзи пиширган оини”.

* * *

Гарчи кўп бор дилда борини айтдим,
Эзгу, пок ниятда узатсан ҳам кўл.
Ҳар гал ҳузурингдан бош эгиб қайтдим,
Сенинг юрагингга тополмадим йўл.

Бутқул сўқилмаган умидим чоки,
Саргайган куз эмас, менинг ёшимдир.
Ишқ менинг энг сўнгги топганим, ёки
Эҳтимол энг сўнгги ийқотишими.

* * *

Сенинг муҳаббатинг илоҳий эрур,
Куёши каби ёниқ, уфқдай чексиз.
Сен менинг баҳтимга кўқдан тушган ҳур,
Сенсиз ёруг олам совуқ ва кўрксиз.



Митти юрагингда меҳр бир дунё,
Ғамларим муз янглиғ эрир тафтида.
Ҳоргин кўзларимга инади зиё,
Рұҳим мадад олар толган вақтида.

Сен билан баҳордир умрим куз фасли,
Хаёлингсиз яшай олмасман сира.
Фариштам, илоҳий муҳаббат асли,
Илоҳий садоқат билан бокира.

ТЎРТЛИКЛАР

Узоқни ўйламай иши тутма асло,
Кўрдим, ишионч ҳосил қилдим кузатиб.
Қимматга тушади гоҳи бир хато,
Уни умр бўйи бўлмас тузатиб.

* * *

Беҳуда чираниши бермайди самар,
Ҳаддин билмаганинг ҳоли охир танг.
Йўғонга тақлидан чўзилса агар,
Ингичка албатта узилар, билсанг.

* * *

Ҳаёт синов, гоҳи шафқат қилмайди,
Иродали одам осон “синмайди”.
Банда олар балки қўлингдагини,
Пешонангдагини ола билмайди.

* * *

Ризқига шукур қил, ажралма элдан,
Камтар, элтарварга толе бўлар ёр.
Кимнингки оёғи узилса ердан,
Охир бир кун қулаб тушмоги ҳам бор.

* * *

Азалу абаддан шу садо келур,
Тинглаб, бир савдога лол қолар киши:
Итнинг касби мудом ҳурмоқлик эрур,
Ўтиб кетмоқ эрур карвоннинг иши.





Наср Наср
Наср Наср Наср



Нурилло ЧОРИ



БЎРОН ТИНГАН КЕЧА

Ҳикоя



Фармон тоғамга

«...Жонузоқ араб сал гүппироқ одам эди. Унинг назарида, бу ёруғ дунёда атиги иккита ҳурматга лойиқ одам бор эди: бири – галатепалик раис Раим Гайбаров, иккинчиси – қамашилик раис Норбўта Шароф».

**Мурод Мұхаммад Дўстнинг
«Лолазор» романидан**

Ху-ув, у давронлар бошқача эди. Ҳар мардумнинг дили тили билан бир эди.

Бошпуртсиз Жонузоқ араб ҳар сафар Ўртагүргонга карвон тортганида Норбўта Шароф бўталар бўйнидаги қўнгириқ садолари эшилмай,

лўкиллаган нортуюлару йўловчилар чанг йўлга сингиб, лой изларга ботиб кетмагунча ортидан қараб қоларди.

Иҳтиёр ўзида бўлса Кўхиқофда дев бўлишга орзуманд араб, бир кетганида ҳилолни тўлдириб ё бўлмаса, баркашдек ойни нимталаб Элсаройнинг сойида бўй берарди. Ана шундай кеча-кундузларда карвону сарбонга илҳақ Норбўта Шароф ич-этини ер эди. Карвон йўлига кўзини тикмаслик учун ўзини овутиш баҳонасида эл оралаб тўю томоша кўрар, юрт кезиб ҳол сўрарди. Шу одати кейин-кейин унинг аъмолига айланиб кетди.

Бу кунда у ёлғиз эмас, эгиз юрарди. Алплиги Алпомишга тортган, келбати Қоражонга қора берган Шоҳимардон пирнинг боласи, Чим саройининг Шаймардон полвони ёнида бўларди. Билганлар полвонни Ибраим (Иброҳим) аминнинг боласи, билмаганлар Норбўтанинг полвони дерди. Аммо иккиси-да рост эди.

Пешин... пешиннинг пешинлигини билиш-да қийин пайт... Этагини йиғмаган куздан қаҳрланган қиши қиличини қибладан туриб яланғочлаган. Қор кишининг қовоғини-да очирмайди, очганда ям ўн-ўн беш одим нари кўринмайди. Қулоққа от пишқириги ва гангур-гунгур овоз эшиллади. Овознинг қор парчаларидай олис-олисдан келаётганини пайқаш унчалик мушкул эмас. Гоҳ аниқ эшиллган сасдан гоҳо садоям бўлмайди. Яна бирпасда от дупурлари бўронда туртниб ўчоққа ўт қалаётган, ош дамлаб, эт қайнатаётган аҳли Қизғалдоқнинг диққатини тортади.

Шу бўронда отасидан мироҳур нисбасини мерос олган Ташкан кал элга дастурхон ёзиб мироҳурлигига муносиб бўлмоқчи, юрт кезиб тотган нон-насибасини

Нурилло ЧОРИ

1983 йилда Қашқадарё вилоятининг Яккабог туманидаги Изиллоқ қишлоғида туғилган.

Мирзо Улуғбек номидаги Ўзбекистон Миллий университетининг ўзбек филологияси факультетини тамомлаган. Қатор ҳикоялар муаллифи.

оқламоқчи, кўп қор кўриб, сочини оқартирган аламни кўкайидан суғуриб отмоқчи, эл олдида тўққизинчи қизини «улим» деб елкасига қоқмоқчи.

Ташкан босар-тусарини билмаган Бойсаридай бой ҳам, Бойбўридай шой ҳам эмас, ёнида маслаҳат бергувчи Я(Ё)ртибойи ҳам йўқ. Унинг бисотидаги бойлиги минг кўйлинникидан да зиёда. Кўнглининг бениҳоя кенг-лиги, жўрабозу ошнабозлигини айтмаганда, Қалдироҷчек қизларидан бошка ҳеч вақси йўқ. Мирохурнинг элга ва Эгамга бир ёқкан томони бордирки, шу кунда Галатепаю Терсотадан, Хўжасоату Сангижумондан, Қувкаллаю Бақаҳовуздан, Накурту Арпали даштидан от ўйнатиб, пою пиёда мисли бўрондай меҳмон ёғилляпти.

Кўз кўрар, товуш етар оралиқ масофа ташлаб ёш-яланг тизилган. Улар келгувчиларнинг отувонини ушлаб, тўй баҳона тикилган ўтовга чорлайди. Ўтвода Бухор мулла, Тиркаш кўса, Эшон Ташкан мирохурнинг қаватида меҳмонлар билан хушлашади, хешлашади.

Шу пайт кимдир ташқарида меҳмонлар талаш бўлаётганини айтди. Тиркаш кўса чўрт кесиб, бу меҳмонлар Қўлмирзага (Қўлмирзанинг ўзи бўлмагандан унинг исмига шайтон лақабини ҳам тиркарди) тобин эканини айтди.

– Хўв, Тиркаш бува, бизга кўноқ йўқми? – деб ичкарилади муртига қор инган қорувли йигит, унинг гапи тугар-тугамас.

– Меҳмоннинг ҳали қадами узилгани йўқ, – деди Эшон беписанд назар ташлаб.

– Сабр қилинг, эндини сизники, – деди тасбех ўрнига бармоқлари бўғимини санаётган мулла.

– Учинчи марта шундай деганларингиз! Биз тўй берганимизда мирохур иззатли чавандозларни кузатган.

– Сиз ҳам иззатлисини кузатасиз, полвон, – деди кўса сийрак соқолини гўштдор панжалари билан тутамлаб.

– Мирохурнинг қайси меҳмони иззатсиз экан?! Менга меҳмон беринг, бошқасини билмайман. Меҳмонсиз ўтводан чиқмайман, – деди ўтириб олган йигит ўзимизнинг Бозирган чавандоз бўлади.

Бу тортишувлардан кўнгли кўтарилиган Ташкан ташқарилади, одамлар орасидан сийлиқди. Кўзидан ёш қалқиб, тошди... Елкаси нортуюнинг ўркачидай силкинди, қайта-қайта учиб-учиб тушди...

Қор билан юзини ювиб қайtdi. Ўтвни қуршаб тургандарнинг суҳбати қулогига илинди.

– Кўпкари бермаса, мирохурнинг мирохурлиги қаерда қолади?

– Кўпкари бўлмасаям кураш беряпти-ку!

– Энди, айтаман-да, отбознинг қилган ишини?

– Мирохур улли бўлсан, кўпкари бераман, кўпкарига Норбўта Шароф баковул бўлади, деб ният қилган экан. Бугун Норбўта Шароф қариган. Кўпкарига оралаши қийин.

– Ораламаса баковуллик қилиб бўлмасмикан?

– У баковул бўлган кўпкарида чавандозлар билан биртан чопган, дейишади.

– Мирохурга ҳалол билан ҳаромни ажратиб берадиган бошқа одам йўқ эканми?

– Бор. Раим оқсоқол.

– У ҳам қирчангичол-да, энди. Кейин, Норбўтанинг устидан от ҳайдамайди у.

– Нима бўлгандаям, отларнинг ўпкаси пишмайдиган бўлди-да. Кўпкари йўқ.

– Кўпкари бўлгандан улоқни узиб оладигани борми?

– Балки Норбўта Шароф олишда Шаймардонга товоқни олиб бераман, деб баковулликка рози бўлгандир-а?!

– Шаймардон Норбўтасиз давраларнинг товоғини ҳам бирорвага бермаган. Кейин, фирромлиги бўлса, мирохур уни ошна тутмасди. Ташкан томоқ қириб тортишувни бўлди: – Мен Норбўта бува баковул бўлади, деганман. Шаймардонга зот бераман, деб олиш қилаётганим йўқ. Жонинг бўлса, элнинг ориман, Қизғалдоқ меники, деб кўкрагингга урсанг, полвон билан олиш, ол. Ўзим чиқсан уят бўлар... Меҳмонлар мирохур ноқис экан, полвонга зот бергиси келмай, бутига тармашди, демайдими? Ҳали йўлдаги кишига шунча гап. Тағин қулоги қизиб, Норбўта Шароф биздан гиналамасин, бўзанинг полвонлари. – Ака, ғафлатда қолибсиз, оқсоқол бошли элсаройликлар Бозирган полвоннига аллақачон кўноқ бўлди...

Шомга бориб бўрон тинди. Қибла қонталаш тусга кирди. Ерни қоплаган қор тўпиқдан ошади. Ҳар қадамдан фирчиллаган овоз чиқади. Совуқ суюк-суюкка игна санчаётганига қарамай, барча бу кунги бўронни кўрмагандай, писанд этмагандай. Қишлоқда қанча ўчоқ бўлса, ҳаммасига ўт қаланяпти. Бу билан улар мирохурнинг тўйи, деб Тангрининг кўхна иморатини қизитмоқча урингандай. Хуфтон кирди. Ойсиз, ўлдузсиз, қор оқартган бир кеча. Кураш бошланишига илҳақ оломон баковулнинг овозига маҳтал.

– Биродарлар! Ташканбой бойлардан бой, беклардан бек йигит. Сазаси учун шайтоннинг бўйни узиладиган имонли, эътиқодли йигит. Ҳудонинг ҳовлисида жонлиқни ҳаром қотирмаган. Ҳалоллаганини сизу менсиз тотмаган. Бугун бир баҳона билан барчамизни йиқкан. Азалдан элга бераман, деган хотамтойнинг баҳонаси кўп. Нима бўлгандаям, «ўмганласам, суюгувчи, қулогим битса, ортимдан чақиргувчи, чўбин отимни етакловчи шу эл», деб билган мирохурнинг берганини ҳалоллаб, кўпнинг ризолиги билан оласиз, полвонларим, – деди ўрта бўй, юзидан нур ёғилган, овози ўқтам бир чол майдонда туриб. – Даврада ҳалолни мен айтаман. Вижденини йиқитган фирром полвон бўлса, Элсаройни аҳмоқ қилмай келсин, тўйчининг «товоқча ташлайман», деган туси билан жандасини ҳозир бериб юбораман.

– Номарду нокасни полвон деманг, ундейлар бизнинг орамизда йўқ! – ҳайқирди оломон.



Полвонларга Тангри таолодан куч-кувват, йигит пиридан йўл сўраган баковулнинг овози янада ўқтамлашиб: – Полвон, отингиз нима?

– Жолпон.

– Сизники-чи, полвон?

– Ортиқ.

– Ов-в, халойик. Ортиқ полвон билан Жолпон полвон элнинг катта полвони бўлсин! Ҳозир ҳам кам эмас, тиши бутун, ризқ-насибаси мўл, ўнгирини аёл тутмаган, кураги ер кўрмаган зўр полвонлар. Бу полвонларга тўйчи бир сўм пул, Ташман тую уч сўм пул, Тоштемир полвон бир чопон атаган. Ҳалоллаб ўйин кўрсатиб, олишсин. Нима дейсиз, қора кўзли қанотларим, – деб элга юзланди Норбўта Шароф.

Давранинг ҳар томонида меҳмон полвонлар Сайфининг салласича келмайдиган қишлоғи шаъни учун енг шимаряпти. Бир-бирини ботирим, деб майдонга ундаяпти. Ахли Қизғалдоқ эса, бу курашда Шаймардондан бошқа полвон йўқдек, у билан тиравадиган бир мард изляяпти. Белидан мадори кетиб, кўзи тина бошлаган оқсоқоллар мурти сабза урган ҳар кишидан умидвор: термилди, тикилди, тамшаниб, милкини сўрди. Охири, ким майдондан мағрур қайтса, ўзларига жиклаб, қон-қариндош чиқара бошлиди.

– Эшон, боя Йўлдош калнинг ули билан олишган ким?

– Кўса, кўзингга нима бўлган, изиллоқлик Ўроқнинг боласи-ку!

– Ҳа, Тоштемир бекорга унга тўнини тикмаган экан-да. Улар тоға-жиянлашади-я?

– Мен билмайман, ўзлари билишмаса...

– Нима дедингиз, Эшон? – деб сухбатга аралашган мулла дафъатан жойидан ирғиб турди: – Ўроқнинг ўзи қани?

– Арзининг уйига қўноқ тушган экан, иззатини қилмаганми, курашга қарамай кетибди. Мирохурнинг ҳам номига яхши бўлмади.

– Эшон, жигилдон билан гапирманг. Бир юмуши чиққандирки, кетган.

– Улини олишираман, деб келган одамнинг нима иши чиқиши мумкин, сўфитўрғай.

– Ўў, Эшон, тилингнинг тагидан тилча чиқармай Қулматни топ, шундан бошқа бари «оғироёқ».

– Шу сағирга бунчалар ишонмасангиз? Бори бир ялоқхўр бўлса, – деди Тиркаш кўса.

– Ошна, сизни элнинг кўса деганиям эъзоз экан-ку! Асли икки кўзи милтиллаган бир қоп гўшт экан-сиз... Менга Ўроқ керак. Сизларга керак бўлмаса, Қизғалдоққа керак! Ҳўв, Қулматбой болам, бери кел, Қулматбой, – деб бўғзига зўр бера бошлади мулла даврага термилиб турган жуссаси муштдек ўспиринга. – Болам, Қулматбой, Қулмуҳаммадбой, ҳозир Изиллоққа – Бўри тўпдан Ўроқнинг уйига борасан. Сиздан Ташкан мирохур хафа, де. Бормасангиз мирохурнинг кўп йиллик тугуни яна чийралиб қолар экан, дегин. Бухор мулла айтди, дегин. Майли, манови Тиркаш буванг билан Эшон бувангнинг

авлод-аждоди номидан гапирсанг ҳам майли. Чоп, тўйхонаю қўноқ тушган уйлардаги истаган отингни мин. Фақат Норбўта Шарофнинг тўриғига тегмасанг бўлгани. Чоп, болам. Чоп.

Ойдин кечада оппоқ қор узра от чоптириб бораётган йигитча ортидан Бухор мулла бир муддат қараб қолди. Сўнг қайтиб жойига ўтира олмади. Бу орада бироз сепсиб қолган, бир хил жуссали, бир хил қувватли полвонларнинг ўртамиёна курашидан зериккан давра Шаймардон полвоннинг чакмонидан тутишга ким журъат этишини кутарди.

Тик туриб полвонларга разм солаётган муллани тобора яқинлашаётган от дупури даврадан суғуриб олди. Оғзидан оппоқ буғ чиқариб, пишнаб турган отнинг жиловини маҳкам чангаллаганча, келгувчиларни: «Ўроқбой полвон, яхши келдингизми, сизни давра кутиб қолди-ку, шундай курашниям ташлаб кетадими?» – деб қаршилади.

– Мулла бува, нимага бунча зарур бўлдим?

– Сиздан бошқа бирор Шаймардоннинг ёқасидан ушлаёлмайдиган кўринади, иним.

– Эй, бу нима деганингиз бўлди? Мен олишга ишқибозман. Ўзим тенгим билан ҳам олишаман, тўғри. Катта полвонлар билан қачон олишувдим.

– Полвонжон, бунда Қизғалдоқнинг ори туриби.

– Қизғалдоқнинг ори бўлса, менга нима. Қизғалдоқ сизники...

– Нима десангиз ҳам мозоримиз бирлигини унутманг, – деб кўзининг ости билан қаради мулла.

– Мулла бува, оталар қабрини босиб ўтадиган Кўкаманнинг кўкайидан оламан. Лекин полвонни қишлоғингиздан топганингиз яхши эди.

– Полвон, ўзингиз оталар ётган жойни оёқости қилдирмайман, деб турибсиз-ку. Бошқа одам излаб нима қиламиш? Сиз бола эдингиз, билмайсиз. Отангиз, бу мозористонга Элсаройдан бир аёлни суягим, деб олиб келиб қўйганди...

– Эшитганман, мулла бува, эшитганман. У киши аммамиз бўлади.

– Эшитган бўлсангиз, уларни оёқости қилиб кўясизми? Шуларни билсангиз яна нимага терсланасиз?

– Майли, сиз айтгандек бўлсин, – деб чуқур нафас олди Ўроқ маҳсум.

– Қўрқманг, полвон, сизни Шаймардон йиқита олмайди. Айтганимдай бўлмаса, Бухор тилидан коғир дейсиз.

Даврада Шаймардон полвоннинг қўлини баланд кўтариб, талабгор излаётган баковулнинг қаватига юрак ютиб бирор яқинлашмади. Бундан элсаройликлар қанча мамнун бўлса, қизғалдоқликларнинг боши шунча ҳам эди. Шу боис, Ўроқ маҳсумнинг даврага кирганини бирор билмай қолди.

Норбўта Шароф Шаймардон полвоннинг талабгори Ўроқ полвон эканини элга эълон қилди. Уларнинг чакмони устидан баковулнинг ўзи белбоғ боғлади. Томошаталабларнинг бутун вужуди кўзга айланган: лаб жуфтламай, киприк қоқмай давра-

га тикилади. Полвонлар аввал қўшқўллашиб саломлашиди. Сўнг Шаймардан ўнгдан давра айланди. Рақиби унга эргашди. Бир-бирига юзланганча чап оёғидан ўнгини ярим қадам олдинга ташлаган полвонлар бироз энгашди. Гўё қанот қоқиб турган хўrozлардай бир-бирига тикилди.

Шаймардан полвон рақибига тикилганча... ўн яшар болага айланди.

...Пешиндагидек бўрон қўпган кун. Унинг пешонасидан бир одам ўпди. Маҳкам қучоклаб, манглайини манглайига тиради ва: «Бу оламнинг савдоларини бир кун ўзинг ечасан, менга осон тутма, отангни ҳам кутма. Шу кунгача ғайридин олиб кетган бирор одам қайтмади. Кишининг молига тегинма. Қўлинг ҳалол, нима иш қилсанг-да, бир кун биз томонга Худойкул деб излаб бор. Етимни Яратган яхши кўради, бошини ёрмайди. Ўзингни эҳтиёт қил...» – деб, икки қоп сомон остидан фақат боши кўриниб турган оқ бурун, олақашқа саманга марҳумани юклиди. Шаймардан биянинг ортидан йиғлаб чопди. Йиқилди, қорга ағанади. Шу ётганча олдинга тикилиб қолди. Тим қора дум қорда судралиб борарди...

Аввал сарбон, кейин бия, сўнг қорда қолган дум изи бўронда кўринмай кетди. Бияни етаклаб кетган одам – бодомқовоқ, қийиккўз, ўsicк қош, кенг бурун, кулча юзли, буғдойранг одам эди. У қартайиш ўrnига ёшариб, кичрайиб, бугун қаршисида туриди.

Шаймардан бу одамни икки марта излади: аввал урушга кетиш арафасида дараклаб келди. Билдики, бия етаклаган сарбон элнинг мулласи экан, ўтиб кетиби. Онаси омонатини топширганида «уртиқ», «от-от» замон эди. Отаси ҳам шунинг қурбони эканини кейин англади. Иккинчи марта урушдан қайтгандан сўнг қидирди. Худойкулдан қорахат келди, деб эшитди. Шу билан тоға томиридан, она авлодидан умидини узиб кетди. Худойкулнинг эл ичра Ўроқ отини олганини эса, кимсадан эшитмади. Бугун у қаршисида!..

Полвоннинг қомати «дол» бўлди. Рақибининг ёқасини тутишга чоғланган қўллари тўқсонга тўқнашиб, асога кучи келмайдиган иликлардай шалвираб қолди. Бирдан ортига тисланиб, қўлини осмон қадар кўтарганча «курашмайман» ишорасини берди. Давра – ҳангуманг. Нима бўлганини ҳеч ким билмай қолди.

Осмон тоқидаги узун пардек булатнинг қишлоқ тепасидаги жойи тугунга ўхшайди. Гўё Сомон

йўлида бораётган «нортуюлар» ҳориб, давра устида чўккан. «Йўловчилари» эл-улусни кузатган, кузатгани шу кузатишда жим тарқалаётгандек эди. Оломон ҳам қандай йигилган бўлса, яна шундай тарқади.

Туни билан кўноқхоналарда Ўроқ маҳсум ва Шаймардан аминнинг тақдиридан гурунг қизиди. Қишлоқ аҳли бомдодда Шаймардан полвоннинг қабристонда қироат билан фотиҳа ўқиётганини эшитди.

Қизғалдоқдан қайтаётган отлиқлар орасида икки киши унсиз сўзлашдилар. Норбўта Шарофнинг кўзлари «олишганда отангни аяма, дейишарди. Бу ёғи қандай бўлди, Шаймардан?» деганини уқсан полвоннинг кўзлари «Бир кун бу танни тупроққа топширап бўлсан, манзил-маконимга қўяр одамнинг қандай ёқасидан олай, оқсоқол?» дерди.

Оқсоқол бўлса кўнглида, «Полвон, сен эмас, мен йиқилдим. Умримда бировнинг ёқасидан олмаган, кишининг ёқасини жуфтламаган мулладан йиқилдим-а! Мулладан! – дерди. – Давраларда юрсам-да, бақириб-бақириб турсам-да, қарибман... Қарибман-да, а? Бир алдаркўса мениям, сениям, бизга қўшиб тоғангням йиқитди. Энди у бу гапларни тўйлардаги давраларда эмас, азада ҳам қироат қилиб ўқииди. Шуни айтиб ўтади... Уҳ, оқ чалворли, кўнгли қора кас...» Маҳзун сухбат тилга кўчиб, кўнгилга чўкиб борарди:

– Оқсоқол, бу оламда тоға нега бунчалар мукаррам?

– Полвон, бу оламни-ку қўятур, зимистон, қоронғу лаҳад туккан жиянни тўрга ўтқазиб сийлаган ҳам юраги ёлдор баҳодир тоға эди-ку! Эр йигитни гўрдан олиб таҳтга чиқазгани учун лаҳадга қўйиш ҳам унинг зиммасида қолгандир, балки. Элсаройда Норбўта Шароф бўлсан-да, улар нималарга таяниб яшайди, билмасам, полвон.

Оқсоқол узоқларга қўз тикиб, карвонга, карвоннинг эмас, Жонузоқ арабнинг йўлига қаравади. Қани энди, у кўринса. Келса-ю, кўрган-кечирганидан айтса. Норбўта ҳам кўнглининг черини ёзса, ёзса-ю, дилида бирор тугун қолмаса, чув тушган алами қалбини тирнамаса, кўқайида ҳам, карвон йўлларида ҳам чечаклар кўкласа, бу опам кўмкўк бўлиб, кўкариб кетса... Олам яшарса, Норбўта Шароф ёшарса, Шаймардан эмас, мен олишаман, деб даврага отилиб кирса... Эҳ, қани энди шундай бўлса. Шундайлар бўлса...





ҲИГОХ
Ҳигоҳ Ҳигоҳ Ҳигоҳ



Зилола НАМОЗОВА



ПОЭЗИЯ ЁХУД ШЕЪР УМРИ

Сўз – маҳзаннинг нишонаси ҳам,
Маъни дурининг хазонаси ҳам, – деб ёзган эди Мунис.
Шеър бир булоқдирки, унда сўзлар қайнайди, ҳислар мавжланади. Шоир борлиққа рух кўзи билан қарап экан, ундағи яратиклардан ўзини, ўз ички оламини, руҳий ҳолатини ахтаради. Бу – барча ижод оламидагиларга дахлдор бўлса-да, шоирлар бошқаларга қараганда кўпроқ кўнгли билан “ҳисоблашиб”га мажбур. Шоир бир пайтнинг ўзида, оламга рассом нигоҳи билан боқиши ва айни дамда дизайнер каби туйғуларидан шеър “тикиш”и лозим. Ҳар қандай қоғияли сўзлар тизмасига шеър деб айтилади, деган қоида яратиб олган айрим шеърпастлар қоралаётган “рангиз сурат”лар бундай нигоҳдан бутунлай ҳоли. Асл шеър на замон, на макон танлайди. Адабиёт – улуғ мактаб. Ижодкорлар эса ундаги ўқувчилардир. Адабиёт мактабидаги синфлар эса ундаги йўналишлар бўлиб, буюк мактабда поэзия алоҳида бир синф. Бу муқаддас маскан миллат ажратмайди, ёш танламайди. Фақат истеъдод ва теран нигоҳ талаб этади, холос.

Буюк асарлар ўлмас ғоя, ўзгармас фалсафа ва бетакор тасвир асосида туғилади. Классик асарларимизнинг агадийликка дахлдорлигига сабаб ҳам ана шу қонуният асосида яратилганлигидир. Ҳар бир нарсада ривожланиш, ўсиш бўлганидек, бугунги давр адабиёти, хусусан, шеъриятида модернизм юз очаётганини кўрамиз. Кўпчилигимизга бу йўналишда тушкунлик, қоралик атри уфуриб тургандек туюлади. Шу баҳона билан улардан воз кечмоқчи ҳам бўламиз. Эҳтимол, тафаккуримизни зўриқтиргимиз келмас.

Маълумки, адабиётда, айниқса, шеъриятда туйғуларни сўзда чизиш талаб этилади. Насрдан фарқли ўлароқ поэзияда воқеа эмас, руҳият тасвири етакчилик қилишини ҳисобга олганда, модернизмнинг бугунги шеъриятимиз учун кераклигини тан олишимиз лозим. Модернизмнинг ҳаётда бўлмайдиган муболагали тасвirlаш усули энг некбин кайфиятни, инжа туйғуларни сўзда чизиш ва ундан китобхонни завқлантира олиши жиҳати билан аҳамиятли ва айни пайтда қадимийдир. Энг яхши шеър – энг ёлғон шеър, деган нақл эса гўзал шеърнинг жимжимасиз бўлмаслигини таъкидлайди.

Классик ва модернизм шеъриятининг ўхшаш жиҳатлари талайгина. Масалан, Навоийнинг тилларда машҳур бир байтига эътибор қаратайлик:

Зилола НАМОЗОВА

1990 йилда Қашқадарё вилоятида туғилган. Қарши Давлат университети ўзбек филологияси факультети талабаси

Оразин ёпқач, кўзимдин сочишур ҳар лаҳза ёш,
Ўйлаким, пайдо бўлур юлдуз ниҳон бўлғоч қуёш.

Мазмуни: Ёрнинг юзини яшириши менинг кўзимдаги ёшларнинг сочилишига сабаб бўлади. Бу – худди күёшнинг пинҳон бўлиши (ботиши) билан осмонда юлдузларнинг пайдо бўлиши янглиғидир. Нақадар гўзал ўхшатиш! Бу байт “сенсиз кунларим коронғу” деган жўн бир гапнинг бадиий ифодаси, аслида. Бироқ Адабиёт – ошкораликдаги ошкорлик эмас, шу жиҳати билан реалликдан фарқланади.

XX аср рус шеъриятининг буюк дарғаларидан бири Константин Бальмонт “Шафақ гуллари” шеърида некбин кайфиятини ифодалар экан, “шафақ ранглар – қайтмас шуълалар”га мурожаат қиласди. Қуёш шуъласидан лаъл каби қизарган булутлар, димиқан кенгликлар, хансираган ўрмонларни “теран” ҳасратлар исканжасида тасвирлайди:

...Кенгликлар димиқар, ўрмон ҳансирар,
Теран ҳасратларга тўлиб бу маҳал...

Айни дамда шоир лирик қаҳрамонидаги ички кайфиятни “қизарган булутлар”, “ҳансираган ўрмонлар” восита-сида ифодалаган.

Зиҳи, ҳилолинг ўлуб ой бошига тиги бало,
Бир олмасиз икки ёрғон сену қуёш масало, – деб ёзар экан Алишер Навоий, ёрни қуёш билан бир бутун олманинг икки қисми деб тасвirlайди. Бу ўринда сўз санъаткори ёрнинг юзини қуёшга ўхшатиш билан чегараланса ҳам ташбих бўларди, аммо Навоий юқори даражали то-пилма яратади, энди ёрнинг фақат гўзаллиги эмас, балки “куйдириш” сифати ҳам қўшилади ва ўқувчи бу байтдан бир неча маъно уқади. Ёки шоирнинг яна бир кашфиётiga эътибор қилайлик:

Ҳазон сипоҳига, эй боғбон, эмас монеъ
Бу боғ томида гар иғнадин тикан қилғил.

Ушбу байтда шоир умр нақадар ўткинчилиги, ҳазон лашкари, яъни, ўлим келгач, унга чора йўқлигини уқтиради. Юқоридаги байтга ҳамфиқр тарзда:



Тўкилар ўйларим қўллимдан қумдек,
Оёгим остидан сирғалар ёшлиқ, – деб ёзади рус
шеъриятининг кўзга кўринган вакили Николай Рубцов.

Қатра су ичра, дегайким, баргу гулнинг аксиур,
Қатра қоним рангини ким кўрса ул пайкон аро, – деб
ёзар экан яна бир ғазалида Навоий, гул ва унинг барги
сувда ўз аксини кўрсатар экан, менинг қонимга бўялган
пайконни эслатади ва бу менинг кўз ёшимда акс этган,
демоқчи бўлади шоир.

Дарднинг суратини, аламнинг аксини сўзда чизган
Анна Ахматова эса:

*Дарёда муз қарсиллар ногоҳ,
Осмон гўё недан зададир... – деб ёзади бир шеърида.*

Европа адабиётида, хусусан, рус шеъриятида ички туйғуларни табиат тасвири билан омухта тарзда акс этириш етакчилик қиласди. Модернистик руҳдаги шеърлар оҳанг эмас, сўз деб аталган буюк куроли билан қалб де-ворларини бузиб, ундаги ҳисларни ўқса тутади ва юракда ғалаён – зилзила қиласди. Ана шу туйғулар силкимишидан китобхон лаззатланади, ширин оғриқ туди. Бу йўналиш ўзбек адабиётида Рауф Парфи, Шавкат Раҳмон каби сўз усталарининг ижодида янада гуллаб яшнади. Шавкат Раҳмон бир шеърида шундай ёзади:

*...Майсаларни тараб, парвозга
Шайлланади чексиз далалар.
Ўспиринлар қучогида маст
Қирда асир тушган лолалар.*

*Боғларда оқ аланга гурлар,
Телба қилар шамоллар иси.
Гилос гулин кийган кўчада
Оқиб борар қизлар кулгиси.*

Далаларнинг парвозга шайланиши, кўчаларнинг гилос гулини кийиши, кўчаларда қизлар кулгисининг оқиши каби ташbihлар баҳорнинг нақадар шаддодлик билан кириб келиши ва борликини ўз измига бўйсундириши, оламини гўзалликка буркаши каби табиат мўъжизасини сўзда тараннум этар экан, шеърхон баҳор ҳавосини сўз тароватида ҳис этади. Яна бир шеърида эса:

*Ой гуллади. Осмон тоқига
Юлдузларни кимдир қоқади.
Ўзанларда сокин тўлғаниб*

Тагин қуюқ кундуз оқади, – деб ёзади шоир. Ойнинг гуллаши, юлдузларнинг қоқилиши, қуюқ кундузининг ўзанларда оқиши каби тонг отиши арафасидаги манзаранинг жонли тасвири кишини ҳайратлантиради. Бундай тасвирлар бироз ғализ ёки тушунарсиздек кўринади, аммо жонлантириш ва маъно кўчиришнинг бундай усуллари реал воқеанинг образларда жонли тасвирини яратиш имконини беради. Ёки Шавкат Раҳмон “Инсонлар овози” шеърида инсониятни бирдамликка чақирав экан, ўз ўй-хаёлларини “тиконли фикрлар ичра руҳимиз” дея жонли тасвирлайди.

Рауф Парфи лирикасида ҳам СўЗ ўзгача жаранглайди:

*Қалқиб-қалқиб қўяди қараб,
Табассумлар ёзилган тупроқ.
Чапак чалиб, сочини тараб
Бош ювади бир ҳовуҷ япроқ...*

Шеърни ўқир экансиз, ундан ёмғирдан сўнг тупроқдан тараладиган ажиб тароватли ҳид анқиётгандай бўлади.

Заргар рангин тақинчоқлар ҳосил қилгани каби “сўз заргари” ҳам туйғуларидан шеър “ясар” экан, унга бетакор ташbihлар, янги топилмалар билан жило беради. “Туйғулар заргари” – Ўроз Ҳайдарнинг жаҳон адабиёти ва классик адабиётизим таъсирида юз очган лирикасида ҳислар ўзгача бўй таратади:

*Ҳавони чайнайман – бўғзим тўла буғ,
Хаёлда юлдуздан ясайман маржон.
Оғзим-қон, кўксим – қон, зирқираиди жон,
Ичимда ҳилпиар лекин қутлуғ туғ.*

Ишқ тараннуми аксланган бу сонет парчасига гўё ишқ оловининг чўйи кафт босган каби, мисралардан ёрқин ўт зим-зиё кечани ёритгани тасвирини тумизи. Бўғизнинг бугланиши – изтиробнинг кучидан, ишқ ўтидан. Лирик қаҳрамоннинг оғзи ва юраги қонга тўлишини эса оловнинг юқори қисми қизғиши бўлиши билан изохлаш мумкин. Ошиқнинг ички оламида қутлуғ туғнинг кўтарилиши, шубҳасиз, ишқнинг поклиги ва мағрурлигидандир.

Яна бир сонетида :

*Муҳаббат уллонин банда тўлолмас,
Ишқ юртида бизлар ғарип фуқаро, – деб ёзар
екан шоир, ишқ ўлкасига инсоният ҳамиша тобе эканини таъкидлайди. Бу мисралар афоризмга айланган ушбу машхур байтини ёдга солади:*

*Муҳаббатсиз киши одам эмасдур,
Гар одамсан, муҳаббат ихтиёр эт.*

Ушбу тасвир ўзини ожиз ва нотавон ҳис этувчи ошиқ кайфиятини ҳам ифодалаган.

Шоир ишқдан мажнун қиёфасига келган кўнглига му-рожаат қилиб:

*Шабнам оташида түғилгай қуёш,
Музлар эригайдир тўкканингда ёш-
Сув тубида тошлар ўйинга тушур,*

Само раққосаси ҳайратдан бехуш, – деб ёзади яна бир сонетида. Қуёшдан томаётган зарралар шабнамга сингар экан, ана шунда у илк бор олами кўради. Нурнинг тугилиши, аслида кўёшнинг тугилиши эмасми? Кўнгил сultonни бўлмиш ошиқ кўз ўш тўкканида, ишқ ҳароратидан оқаётган бу ёшларнинг қайноқ тафти совуқда қотган музни эритишига қодир. Ҳаттоқи, унда тошлар шундай рақс этадики, само раққосаси бехуш ийқилади – ожиз қолади... Ишқ сурати нақадар бетакор бўёқда чизилган! Ишқ – буюк бир қудратки, илондек бағрингга кириб, сўнгра аждардек вужудинга ўт пуркайди. Ишқдан телба кўнгилгина ишқнинг сийратини билишга қодир. Ишқ ҳароратидан куйган бу мисралар кўнгилга симобдек оқиб, кўргошиндек қотиши шубҳасиз.

Хулоса қилиб айтганда, шоир қандай йўналишида ёзишидан қатъиб назар, аввалдан мавжуд туйғуларни мавжуд бўлмаган усул билан, маълум бўлмаган рангларда сўзда нақш этиши лозим. Акс ҳолда Чўлпон назарда тутган “бирхиллик” давом этаверади. Чаренц “Шоирлик не?” шеърида уни “Ҳарорат, ҳарорат, ҳарорат!” дейа таърифлар экан, Шавкат Раҳмон “Ёш шоирларга” шеърида шоирларга “чақилмас тошлардай бир тоғлар қолсин!” дейа хитоб қиласди. Яхши шеър замонларнинг араваси остида янчилса-да, бутун қолиши, яъни ўз қиммати ва сифатини йўқотмаслиги лозим. Асл шоир эса совуқдан “куйиш” и, иссиқдан “музлаш” и керак. Ана шундагина шоир номи айтилганда китобхон кўз ўнгидага шеърда чизилган сурат бўлиб шоир жонланади. Зотан, шеърда шоир яшайди.



Шойим ШЕРНАЗАР

*Нази Нази
Нази Нази Нази*



Хүйбүйі насили тараалар дилга

САРДОБА

Чүнг кафтида сув узатган сардоба,
Чанқогини қондирған кү-үп карвонлар.
Бундан ўтган фотиҳ, лўли ароба,
Хотирага чўкиб кетган давронлар.

Бўнда келган тунда ой сирлашгани,
Чўпчак айтиб кетган қанча бўронлар.
Мана шу йўл, тупроққалъя ватани,
Юрагининг бир парчаси карвонлар.

* * *

Эски қишилоқ, эски хотира,
Ишком... сўри... баҳру байт ёди.
Олов бўлиб ёнарди мисра,
Фаришталар айлар сир – жоду.

Туйгуларим қишилоқда қолди,
Сени шаҳар олиб кетганмиши.
Армон мени бағрига олди
Ва айлади девона дарвеш...

Ҳали-ҳануз ишком тагида,
Ғамим майга солиб ичаман.



Яраланган қуш аҳволида,
Хар кун тушиларимда учаман.

* * *

Оромимни ўғирлар тунлар,
Деразамдан ой мўралаиди.
Деворсоат... айланар миллар,
Faфлатни бир четга қувлайди.

Туйғум тутқич бермайди асов,
Узо-о-оқларда чақнайди чақин.
Юлдузчалар пастлаб келдиёв,
Сир айтгани ёнимга яқин.

Кувлашмачоқ ўйнар шамоллар,
Япроқчалар чалади чапак.
Мижжса қоқмас бу кеч хаёллар,
Деразамда ёришар фалак.

* * *

Эски қишилоқ...
Ёшилик ўтган кез,
Бирам сўлим, бирам беғубор,
Хотиralар ташлаб ўтар из,
У кунларда йўқ эди губор.

Шойим ШЕРНАЗАР

1958 йилда Навоий вилоятининг Кармана туманида туғилган. “Тун эртаги”, “Соғинч даҳаси”, “Сумбула”, “Истара”, “Кўнгил йўли”, “Чанқовуз” каби китоблари чоп этилган.



Чинни осмон...
Пистоқи дала,
Орзулардан ясалган варрак.
Эргаштириб бир гала бола,
Аттор лўли чалади хуштак.

Сўқмоқларни қучган майсалар.
Олиб борар болалик томон.
Ариқ лаби...
Кўмуши жийдалар,
Кутуб олар эски қадрдон.

Чархпалакнинг пақирчасидан,
Обиҳаёт қуйилар гулга.
Шўхликларнинг ҳур кўчасидан,
Хушбўй насим таралар дилга.

Йиллар карвон...
Бобо ҳам бўлдим,
Неварамга эртак сўзлайман.
Унинг чақнаб турган кўзидан,
Ўтган ёшлигимни излайман...



ДАРАХТЛАР ҲАМ

Дарахтлар ҳам одамга ўхшар,
Ғурури бор, қаддин тутар тик.
Тилёглама хушомадгўйлар,
Мажсунтолдек бошлари эгик.



* * *

Вафо ФАЙЗУЛЛОҲга

Дўст дийдори...
Орзиқар кўнгил,
Кўз олдимда иссиқ истара.
Согинчларим қараб қолар йўл,
Шууримда тансиқ хотира.

Жонланади дарвешили дунё,
Кўзларимга йўғрилади нур.
Тушларимга кирад ажабо,
Хурлар билан сирлашган бир ҳур.

Согинаман, йўлга қарайман,
Дўстга чанқоқ юрагим мустар.
Баҳоримдан уни сўрайман,
Келар,
Келган куни турналар...

* * *

Ой нигоҳин ташлайди,
Тун эртагин бошлайди.
Шохда ухлар қушчалар,
Кўриб ширин тушибалар.
Сувда ўйнайди шуъла,
Сой бошлайди ашула.
Ҳувв гужжса юлдузчалар –
Жовдираган кўзчалар.
Чириллайди чирилдоқ,
Зулматга солиб титроқ.
Хилтирап япроқчалар –
Кўкдаги байроқчалар.
Ой нигоҳин ташлайди,
Тун эртагин бошлайди...

* * *

Ҳаммаси ўтади,
Қувонч ҳам, гам ҳам.
Жилгалар дарёга,
Бориб қуийилар.
Фақат қолар экан
Бўлиб мукаррам,
Юракдан отилиб
Чиққан туйгулар.






Наср Наср
Наср Наср Наср



Асад АСИЛ



ТАШНАЛИК

Ҳикоя

Арслон чол бир кам саксонга борганида кампира бандаликни бажо келтириди. Кутилмаган бу кулфат, бемаврид жудолик ўн йигитга ўрнини бермай юрган қарияни довдиратиб қўйди. Отанинг назарида гўё ўзи қатнашиб юрган давралардан бирдан файз кетди, бу олам ҳувиллаб бўшаб қолди. У уйдан чиқмай қўйди, ҳатто чойхонага киришни ҳам тарқ этди.

Арслон ота йўқлиги учун тенгқурлар орасида мудом давом этиб келган асқия, ҳазил-хузул ҳам ўз-ўзидан барҳам топди, давомли, қизғин сухбатлар совиди. Ёлғиз ўзи уйига қамалиб, нортуюдек чўкиб ётган чолни тенгқурлари келиб, давраларига чорлар, қария эса кескин рад этиб, “Ҳар нарсанинг ўз вақти бор”, деб қўярди...

Ҳамма томондан “қўлни юваб қўлтиққа урган” ота бир масалада жуда қаттиқўл эди. У яккаю ёлғиз ўғлини зир югуртириб, кампирининг барча расм-руссумларини вақти-вақтида, кўнгилдагидек қилиб ўтказди. Келди-кетдилар тийилиб, қўллар бўшагач, ота ўғли ва келинига руҳсат берди. Бола-чақаси билан шаҳарга қайтиб борганига бир ҳафта бўлмаган эди, ота ўғлини зудлик билан яна чақириди. “Ишқилиб тинчлик бўлсин-да!” Автобусга сабри чидамай, такси ёллаб, ҳадиксирай-ҳадиксирай этиб келган Жавлон отасининг жиддий гапи борлигини дарров сезди. Негаки, чол гапини мақолдан бошлаганди.

– Ўйчи ўйлаб бўлгунча таваккалчи ишини битиради, ўғлим, – деди соқолини дамба-дам силаб қўяётган отаси Жавлоннинг кўзларига тикилиб. – Мана, кунлар ҳам жўнашиб кетди. Энди буёғи ёз, уйни сал кенгайтириб олсаммикан, девдим...

Жавлоннинг хаёлида ҳозир яшаб турган шароити, уй ахволи жонланди. У кута-кута эндиғина орзусига эришган, шаҳарнинг чиройли қисмида қурилган уйларнинг биридан тўрт хонали квартира олганди. Квартираси иккинчи қаватда, болаларининг кичиклари ёнгинасидаги боғчага борарди. Хотини ўқитувчи, мактаб

ҳам чақирса овоз етадиган жойда. Тўнғич фарзандлари, хотини билан қийналмай, ўқишга бориб-келиб туришибди. Уйи шаҳар марказида жойлашгани учун келди-кетдилар кўп. Қишлоғидан шаҳарга тушганларнинг аксарияти Жавлонларникига қидириб боради. Хотини Муҳайё шаҳарда туғилиб-ўсган, жуда одамохун, келган меҳмонни ош билан сийламаса, кўнгли ўрнига тушмайди. Хуллас, иккинчи маош қўлга теккунча, биринчиси силлиқина бўлиб қўлдан чиқиб туради. Эски уйларни бузиб, ўрнига янги иморат турғизишнинг ўзи бўладими!..

– Ҳа, мум тишлаб қолдинг? – ота Жавлоннинг кўнглидагиларни уқиб тургандек зарда билан давом этди. – Сендан бир мириям сўрамайман. Онанг иккимиз ўлимликкайм, уй қурамиз, деб бунгаям етадиган маблағ тўплаб қўйган эдик. Раҳматлик, янги уйни, болаларини бағрида қўришни орзу қила-қила ўтиб кетди. Уйни янгиласак, кўчиб келсанг, онангниям руҳи шод бўлармиди.

Жавлонни энди қишлоққа кўчиб келиш ваҳимаси босди. У уйланиш олдидан Муҳайёга: “Умрбод шаҳарда яшаймиз”, деб вайда бериб қўйганди. Болала-рининг боғчаси, мактаби нима бўлади? Бу ерда эса... боғча кўп йиллардан бери қурилиб-қурилмай ётиби. Мактабда ҳам таълим-тарбиянинг мазаси йўқ, дейишиди. Буёғи қандоқ бўлди?! Йигитнинг хаёли охири йўқ калавадекчувалашиб кетди.

– Мундо-о-оқ кўнглингдагини гапирсанг-чи, тилинг борми ўзи?! – деди ота чинакамига жаҳли чиқиб.

– Қайдам, ўйлаб кўрармиз...

– Э... сенга қолган куним шу бўлса!..

Арслон ота этагини қоқиб, ўрнидан туриб кетди. Йўл-йўлакай кетмонини қўлига олди-да, орқа эшикдан чиқиб, бора солиб, эски томни чангитиб очаверди. Отанинг меҳри каби қаҳри ҳам қаттиқлигини яхши билган ўғил унинг ёнига қайта ўйлай олмади-да, орқа эшикдан чиқиб, секингина шаҳарга жўнаворди...

Асад АСИЛ

Асад АСИЛОВ (Асад Асил) – Бўстонлиқ туманининг Хондайлиқ қишлоғида таваллуд топган. “Лочин”, “Қувонч”, “Мехр”, “Тоғликлар” каби кўплаб китоблар муаллифи. Ўзбекистон Їзуичилар уюшмаси аъзоси.



– Дадам соғ-саломат юрибдиларми, қариндошлар тинч-омонми? – ҳар доимгидек дарров суриштириди, хушбўй мошкичирини дастурхонга қўяётган Муҳайё.

– Ҳа, – истар-истамас жавоб берди Жавлон қовоқтумшуғи осилиб. Одатига кўра, Муҳайё гапни тўхтатди. Эри уйга хафа ҳолда қайтган кезларида, “ўлкасини босиб олгунча”, у индамас, ўз ҳолига кўйиб берарди. Болаларни ҳам боғчадан ўзи олиб келди. Ҳар кунгидек, бир амаллаб озгина овқат едириди, дам ялининб, дам уришиб, зўрға ухлатди. Жавлон девор томонга ўгирилиб олганча, ҳар замон-ҳар замонда “уҳ” тортиб, миқ этмай ётаверди. Унинг уйқуси ўчиб кетган, отасининг ғамгин ва жаҳлдор қиёфаси, ораларида бўлиб ўтган қисқа ва кескин сухбат хаёлидан сира ўчмасди.

Ошхона юмушларидан қўли бўшаган Муҳайё, хоналарнинг чироқларини ўчирди-да, келиб эрининг ёнига оҳиста чўзилди. Жавлоннинг юрагидаги дардни тахминан тушуниб, паст ва майнин овозда кўнглидаги гапларни айтди:

– Адажониси, дадам бояқишига ҳам қийин бўлдида! Қариганда қадрдонларидан айрилиб ёлғиз қолди. Бир ўйлаб кўрсакмикан? Агар сиз рози бўлсангиз, қишлоққа...

– Ҳа, энди сенини етмай турувди! Қишлоққа кўчайлик демоқчимисан?! Кўчмайман, эшитдингми, кўчмайман! Нима, пешонамга яккаш сарсон-саргардонлик битилганми? Ёки мени синаб кўряпсанми, сир олмоқчимисан?!

Жавлон сакраб туриб, диванга ўтироди. Стол устида ётган сигаретдан олиб тутатди. Уни ташлаб, бошқасини чекди.

– Ҳай, ҳай, намунча дағаллашиб кетмасангиз, - майнингина кулимсираб ўзини оғирликка олди Муҳайё. – Янги танишганимиздаги анави гапларни айтяпсизми? Тўйгача ваъдаларнинг кўпиги кўп бўлади. Сиз биттагина ваъдангизни бажармай қўя қолинг! Мен буни ҳеч қаҷон юзингизга солмасликка сўз бераман. Ахир ўйлаб кўринг, шаҳардан қишлоққа борсак, нимани ҳам ўқотардик! Мен ўқитувчилигимни қилавераман, сиз иқтисодчилигингизни. Қолган кам-кўстларни бирга битириб олаверамиз-да... Қани, буёққа ўгирилиб, бир жилмайиб юборсинлар-чи!

Жавлон Муҳайёнинг гапларини жон қулоги билан тингларди-ю, унинг кутилмаган бу таклифига ишонқирамай, зимдан қараб-қараб қўярди.

– Келинг, муғомбирликни қўйинг! – Муҳайё овозини бир парда баландлатди. – Ўзингиз ҳам жон-жон деб турибсиз-у, тарангликка бало борми! Ичдан пишганлик сизга ярашмас экан! Ўн йилдан бери бирга яшаб, хотинингизни ҳалиям синамадингизми? Буёгини билмоқчи бўлсангиз, бағри кенг қишлоқ ҳавоси, одми одамлари менгаям ёқиб қолган. Ёқиши ҳам гапми, обдон боғланиб, ҳавасмандман шу жойларга!

Жавлон индамасди-ю, Муҳайёнинг назарида, эрининг юзи ёришиб, чиройи очила бошлагандек эди. Жавлон ўрнига ётиб, хотиржам уйқуга кетганидан кейингина Муҳайёнинг кўнгли жойига тушди.

* * *

Пешонасини рўмолча билан тангиги олиб, тупроқ босиб қолган шоҳ-шаббаларни ажратадиган Арслон отанинг кўзи бир зум тиниб кетгандек бўлди. Қаттиқ ташналини хис этиб, нарироқда турган човгум жўмрагини оғзига тутди. Човгумнинг қопқоғи кесаклар орасига тушди-ю, чолнинг оғзига бир-икки томчи томди холос. У сувни аллақачон ичиб бўлган, қолган-күтгани ҳам иссиқда бугланиб кетган эди. Отанинг шу дам жуда кўнгли тушиб кетди, бирдан дармони куриди. Ногаҳон кампирини қўмсаб, бирдан йиғлаб юборай деди-да, жовдираётган кўзларини узоқ-узоқларга тикиди. Олис-олисда қишлоғи сари ғизиллаб келаётган машиналар кўриниб турарди. Чол улардан кўз узолмай қолди, чукур хўрсиниб қўйди. Тўнгич невараси билан истараси иссиқ келини кўз олдига келди. Қулоқлари остида кенжа неварасининг қичқириғи эшитилгандай бўлди, бўйнига чирмашган жажожи қўлларини хис этди. Афсуски...

Дармонсизланганидан тиззалари қалтираб кетган ота қалқиб, кесаклар уюми устига ўтириб қолди. У катта йўлдан бурилиб, маҳалласи томон яқинлашаётган машинадан кўз узолмасди. Гўё бир зум қарамай қолса, йўқотиб қўядигандек, киприк қоқмай ўтиради. Машина сеҳрланган каби Арслон ота уйи томон бурилди. У қиялиқдан вағиллаганча чиқиб келиб, ариқчадан бир силтаниб ўтди ва дарвоза яқинида тўхтади. Кабина эшиги очилиб, жингалак соч, қоп-қора юзли шофёр сакраб тушди.

– Хорманг, бобой, юракдан ҳам бор экан-да, а? Бир ўзингиз қўрқмасдан ҳамма уйларни бузиб ташлабсиз!

Ота шофёр билан ўрнидан турмасдан қўришди, индамасдан қандайдир илинж билан унинг оғзини пойлади. Шофёр чолнинг қўлини қўйиб юбормай туриб сўради:

– Ота, ветврач Турсунбой аканинг уйи қаерда? Жуда керак бўлиб қолди.

Чолнинг гапиришга мадори қолмаганди, қўли билан юқори маҳаллага ишора қилди. Машина ўтиб кетгач, ота титроқ бармоқлари билан човгум дастасидан оҳиста тутди, ўнг кўлига таяниб, ўрнидан аранг турди, бошини қўйи эгганча, ариқ томонга жўнаган ҳам эдик, ортида машина тўхтади. Аранг ўғирилган отанинг ажинлар куршовидаги кўзлари порлаб кетди. Машинадан тушган ўйтит ўғлига, сумка кўтарган аёл келинiga ўхшарди. Болалар ҳам неварапари шекилли...

– Бобом, бобожоним!

Тўнгич невараси Лола чопганча келиб, бобосининг бўйнидан кучди, юзларидан чўлл-чўлл ўлди.

– Эй, Худо, борингга шукур, кўрсатганингга шукур, – шивирлади ота ташналиқдан қақшаб кетган лаблари билан. Қария қоқсуяқ, қалтирабётган бармоқлари билан неварасининг соchlарини силаркан, серажин юз-кўзларига ёпишган чангда из қолдириб томчилар думаларди. Бу терми, кўз ёшларими... билиб бўлмасди.



Замира РЎЗИЕВА



*Нази Нази
Нази Нази Нази*



Субҳи ғоғлар мұжда күтди и насимвардин

ОШИҚ ЭТМИШ

Ул ёрким сафти соҳиҳ руҳсори ошиқ этмииш,
Қараашларинда зоҳир асрори ошиқ этмииш.

Кўкларда эрур шаъни, файзиёбдур гулшани,
Ор йўлинда жон-тани нисори ошиқ этмииш.

Бўлса ҳатто бир онлик васли дилга комронлик,
Ярашади султонлик виқори ошиқ этмииш.

Муҳаббат тилида най, куйлаётир пайдар-пай,
Минг йил ҳам тўкилмагай оҳори ошиқ этмииш.

Ошиқлигинг – тилло тож, бўлса арзир жон – хирож,
Чорлагай аришу меъроҷ, узори ошиқ этмииш.

* * *

Кимки Ҳотам, кўнглига уммон насиб,
Қилса торликдан ҳазар, осмон насиб.

Қайси дил покиза бир сұхбатталаб,
Покланиб очса эшик, меҳмон насиб.

Чархланиб куч топгуси кун-кун сабот,
Ишиқи комилларга гар ҳижрон насиб.

Ўртанур жон фидойи ошиқ учун,
Қайтса ёрдин хиёнат, ёлгон насиб.

Муҳаббатни хор этар ким, нобакор,
Умрининг боричадур пушимон насиб.

Яхшиликка зор бу очун, яхшига,
Беназир ҳурмат бўлар осон насиб.

Қаҳридиллик не учун, дилга баҳор,
Ярашгай найсон насиб, бўстон насиб.

Меҳрибонлар кўп эса, юртнинг юки
Ерда қолмас, дардига дармон насиб.

Эй Замира, ёр азиз, андин Ватан,
Азизроқ деб сев, сенга имон насиб.

СЕНИНГСИЗ...

Ифор қани, гулзор қани сенингсиз,
Танимайди гуллар мани сенингсиз.

Лолазорлар ловуллаши на даркор,
Ёндиримаса гар гулхани сенингсиз.

Ошиқман деб гул тутган кўп, во дариғ,
Ёр деёлмам ҳеч биттани сенингсиз.

Гаҳи армон, гаҳи согинч чулгагай,
Умридаги ҳар лаҳзани сенингсиз.

Замира РЎЗИЕВА

1957 йилда Андикон шаҳрида туғилган. Ўзбекистон Миллий университетининг журналистика факультетини тамомлаган. “Мунаввар юртим”, “Гул ислари”, “Нашида”, “Қирқ ўрим соч”, “Атиргулга айланаман”, “Офтобжамол”, “Жон риштаси”, “Сарчашима”, “Ташна дил” сингари китоблари нашр этилган. Ўзбекистон Ёзувчилар юшмаси аъзоси.

О-ю офтоб илинса-да шифо нур,
Тузатолмас мен хастани сенингсиз.

Юзлашганда ёраб, юпанч тутолмас,
На Андижон, на Тошкани сенингсиз.

Сенга-ку баҳт тилагайман, валекин,
Баҳти кулмас Замирани сенингсиз.

БИР ГЎЗАЛ БОР

Бир гўзал бор, сочин ёйса, қуюқлашиб кетар тун,
Гар офтобга юзин чайса, тиниқлашиб кетар кун.

Бармоқлари чертса соз, оҳангга айланиб ноз,
Аллалаб элитгайдир, кўнгилни сирли афсун.

Ювилиб араз, гашлар, юмишаб бородир тошлилар,
Кечаги кўзи ёшилар, бўлолмас бугун маҳзун.

Кўпаяди яхшилик, сепин ёяр яшиллик,
Муҳаббатга бош эгиб, яшарар кўҳна очун.

Сеҳрга, ўтга тушдим, ошиқ деб хатга тушдим,
Ул гўзалини Лайли денг ва мени атанг Мажнун.

* * *

Паришондур сочим сабодан кейин,
Нафармондур очун наводан кейин.

Кўнгил мулки ичра қимматли не бор,
Бари садоқатдан, вафодан кейин.

На кўкка, на ерга ярашимас қаҳр,
Бойчечак таратган садодан кейин.

Хожсалар не топсин остонасидан,
Йиғлаб қуруқ қайтган гадодан кейин.

Муҳаббатнинг кўзи кўр бўлса нетай,
Мен тошини севибман Худодан кейин.

* * *

Дунёning бир ками менда кўринди,
Юз-қўзимни топган мунгда кўринди.

Муҳаббатнинг қадри тўқилган кунлар,
Сўз топмай тўлиқкан гунгда кўринди.

Ифорлар гулники, зорлар дилники,
Ёлгонларнинг чўги чинда кўринди.

Кўнгилники бўлди минг битта оғриқ,
Иситмасин тафти мингда кўринди.

Ойдай орзуларни туманлар ютди,
Излар сароб сари қумда кўринди.

Ким алдаб адашиди, кимдир алданиб,
Тун ичра гуноҳлар чўнгда кўринди.

Энг аввал вафолар кетдилар ташлаб,
Жафолари кейин, сўнгда кўринди.

Дардан огоҳ тушлар сувда жим оқди,
Хиёнатнинг ҳукми ўнгда кўринди.

Замира, нақл топ, нома бит бугун,
Дунёning бир ками менда кўринди.

* * *

Ошиқликнинг тахти менга тайин бўлди,
Согинчларда ўртаниши он сайин бўлди.

Сокин эрдим оразин то кўргунимча,
Оловларда ёнишилик сўнг, кейин бўлди.

Юзим боссам азобимдин олар бир-бир,
Манга сирдоши оқ терак, оқ қайин бўлди.

Субҳ ҷоғлар музжда кутдим насимлардин,
Менга таскин тутар барлар майин бўлди.

Жафоси бор бўлди-ю, йўқ анда парво,
Наҳот ишқим жафокашга ўйин бўлди.

Эй Замира, сеҳр топдим, сабр топдим,
Фақат ул ёр дилин топмоқ қийин бўлди.





Ж. Жаҳон ҳикоялари мизги

Кэтрин МЕНСФИЛД

Жаҳон ҳикоялари мизги
Жаҳон ҳикоялари мизги



САДАКА

Ҳикоя

Турмушга чиққанига эндиғина икки йил бўлган кўхлиқкина, ёш, ақлли, замонавий ва ўқимишли жувон Розмари Феллни эри жуда яхши кўрар, ундан ҳеч нарсани аямасди. Розмари тушган оила, мабодо ке-лин у ёки бу нарса харид қилмоқчи бўлса, Лондонни назарига илмай, тўппа-тўғри Парижга йўл оларди. Қишлоғомларидан бирда Розмари тилла магазинига кириб келди. Мудир атайлаб яшириб қўйилган кутичани пештахта остидан чиқарди.

– Вой, бунча чиройли! – деди ҳайратланиб Розмари. – Қанча тураркан?

Мудир унинг сўзини эшитмаганликка олди, аммо бирордан кейин:

– Арзимаган пул, хоним, – деди.

– Менга сақлаб қўйсангиз, илтинос.

Магазин мудири таъзим қилди.

Ташқарида ёмғир қуяр, эндиғина ёнган электр чироқлари қандайдир ғамгин милтираб турарди.

Ана шу вақтда кичик жуссали, қораҷадан келган ёш бир қиз Розмарининг ёнида пайдо бўлди ва мунгли овозда:

– Хоним, хайр қилинг... – деди.

– Менга айтяпсизми? – овоз келган томонга ўгирилди Розмари ва худди сувдан чиққандай қалтираб турган бегона қизни кўрди.



Кэтрин МЭНСФИЛД

Машҳур инглиз ҳикоянависи. XX аср бошларида (1888-1923 й.) Янги Зелландияда яшаб ўтган. Адабининг “Герман Пансионида” номли ҳикоялар тўплами адабиёт ихлосмандларига яхши таниш.

– Хоним, – деди қиз янада мунглироқ оҳангда, – садақа қилинг...

«Садақа?» Бу товуш қандайдир содда, самими эди, сира гадойникига ўхшамасди.

– Нима, ҳечам пулингиз йўқми? – сўради Розмари шу заҳоти ноўрин савол бериб қўйганини пайқаб, хижолат чекди.

– Ҳа, хоним, – жавоб қилди қиз.

– Наҳотки? – Розмари қизга диққат билан разм соглач, раҳми келиб, саховат кўрсатмоқчи бўлди.

Фараз қилингки, қизни уйга олиб борсин, хўш, унда нима бўлади? Шов-шув кўтарилиши табиий. Розмари бу бечорага ҳайратланиб қараётган яқинларига нималар дейишини тасаввур қилди: «Шунчаки уйга олиб келдим...» Ниҳоят, қизга яқинлашиб, деди:

– Юринг бизниги.

Қиз эргашди.

– Сиз мени полицияга топшириб юбормайсизми? – шубҳаланиб сўради у, бироз юришгач.

– Полицияга дейсизми? – кулиб қўйди Розмари.

– Нега энди? Савоб иш қилмоқчиман, холос.

Улар чиқкан енгил машина тун қўйнига шўнғиб кетди.

– Мана уйга ҳам етиб келдик... Ўтириңг, марҳамат, – деди у қизни камин ёнида турган катта оромкурсига таклиф қилиб.

– Яхши, хоним, – пичирлади қиз ва шляпасини ечди.

– Келинг, пальтонгизни ҳам ечинг, – деди Розмари.

Қиз ўрнидан турди, ўнг кўли билан оромкурсига суюнди. Розмари унга кўмаклашди.

– Авф этасиз, хоним, – деди қиз ранги ўчиб. – Хушдан кетяпман. Ҳозир йиқилиб тушсан керак. Хоним, ейишга бирон нарса топилмайдими?

– Ё Худо! Қандай бераҳмман-а!

Розмари хизматкорга буюрди:

– Чой опкелинг! Дарров чой опкелинг! Озгина конъяқ ҳам!

Қизнинг қўзларига ёш қалқди, у энди тортинчоқликни унутганди.

– Мен бу ҳолатда узокқа боролмайман! – деди у бақириб. – Чидаб туролмай-ман. Бу кунимдан ўлганим яхши...

– Бироз сабр қилинг, – деди Розмари. – Ўзингизни босинг. Илтимос, йигламанг.

Чой келтирилди. Қиз йигини тўхтатиб, лаззатли таомлардан тўйиб тановул қилди.

Дастурхон йиғиштирилганда лаблари қирмиз, қўзлари шаҳло бир соҳибжамол оромкурсида ястаниб ўтиради.

Шу пайт эшик тутқичи буралди: «Розмари, кирсам майлими?» Бу унинг эри Филипп эди.

– Ҳа, – деди Розмари жилмайиб. – Бу менинг ўртоғим...

– Смит хоним, – деди оромкурсидаги гўзал.

– Смит хоним, – деди Розмари. – Биз гурунглашаётгандик.

– Агар малол келмаса, – деди Филипп хотинига қараб, – кутубхонага чиқсангиз. Смит хоним бизни авф этсинлар.

Кўзлар тўқнашди. Розмари қиз учун жавоб берди:

«Албатта». Эру хотин хонадан чиқиб кетишиди.

– Хўш, – деди Филипп кутубхонада, – ким у? Мехмонмий?

Розмари эшикка суюниб кулди.

– Кўчадан топиб келдим. Ростдан. У мендан садақа сўраганди, уйга таклиф қилдим.

– Табриклайман! – деди Филипп ҳазиллашиб. – Хўш, уни нима қилмоқчисиз?

– Билмасам, – деди Розмари елкасини қисиб. – Ўйлаб кўрамиз-да.

– Аммо-лекин, – деди Филипп сигаретининг кулинни тушираркан. – У ҳаддан ташқари гўзал экан, ёши ҳам йигирмадан ошмаган, менимча.

«Гўзал?» Розмари шундай ажабландики, ҳатто уятдан қизариб кетди.

– Оҳ! – гапни илиб кеди Филипп. – У ниҳоятда гўзал экан! Наҳотки сезмаган бўлсангиз? Хўш, энди Смит хонимни бугунги зиёфатга таклиф этишга ижозат берсангиз, жоним.

– Қўйсангиз-чи! – деди Розмари ва кутубхонадан чиқиб кетди, бироқ меҳмонхонага бормади. У ёзув-чиズув қиласиган хонасига кириб, курсига чўқди: «Гўзал! Ҳаддан ташқари гўзал...» Розмари нинг юраги гупиллаб ура бошлади. У сейфни очиб беш фунт стерлинг олди, сўнг иккитасини қайтиб жойига қўйди-да, уч фунт стерлингни чангллаганича меҳмонхонага йўналди...

Бир ярим соатлардан кейин Розмари кутубхонага қайтиб келди.

– Сизга айтиб қўймоқчи эдим, – деди Розмари.

– Смит хоним тунги зиёфатда қатнаша олмас экан. Филиппнинг қўлидаги қофоз тушиб кетди.

– А? Нега? Нима бўлди?

Розмари кулиб, эрининг тиззасига ўтириди.

– Негадир ўз-ўзидан кетаманга тушиб қолди, – деди у бироздан сўнг. – Бечорага хайр қилдим. Кетди. Раъини қайтара олмадим.

Орага жимлик чўқди.

Бироздан сўнг Розмари мақсадга ўтди:

– Бугун магазинда ажойиб қутича кўрдим. Ўшани олсан майлими?

– Ихтиёрингиз, – деди Филипп. – Биласиз-ку, мен ҳеч қачон сизнинг раъйингизни қайтармаганман.

Лекин Розмари сўрамоқчи бўлган нарса, аслида, бу эмасди.

– Филипп, – шивирлади у. – Мен гўзалманми-а?

**Инглиз тилидан Мунира НОРОВА
таржимаси**



Ҳ
Ҳигоҳ
Ҳигоҳ Ҳигоҳ



Абдумўмин ҚОСИМОВ



ҚИССАДАН ҲИССА ФАҚАТ КУЛГУМИ?

Халқимизнинг ардоқли адаби Ғафур Ғулом қаламига мансуб бўлмиш «Шум бола» қиссасини айримлар соддагина, фақат кулгули саргузаштлардан иборат асар ҳисоблайди. Аслида ҳам шундайми?

«Шум бола» қиссаси дастлаб «Муштум» журналида босилди, сўнgra «Довдираш» номи билан китобча ҳолида нашр этилган бўлди.

Асарнинг дастлабки нашрларида Аччиобод, Кўктерак деган номлар учраса-да, воқеаларнинг қаҷон ва қаерда бўлиб ўтгани номаълум эди. Асар бошида Соли, Тўлаган деган болалар тилга олинса-да, кейин улар шу бўйича тушиб қолар ва Омон билан Шум боланинг учрашишлари тасодифий рўй берарди. Ҳар ҳолда асар умумий ўтмиш ҳақидаги «чўпчак» каби таассурот уйғотарди. «Бу фалокатли ишни Йўлдош бошлади» деган гап билан экспозициясиз бошланган асарни конкрет замон ва макон билан боғлаш қийин эди. Кейин қайта ишланган варианта эса асосий воқеалар кечадиган жой колорити ва қаҳрамонлар характеристини шакллантирувчи шарт-шароитлар тасвирланади. Бу ерда биринчи жаҳон уруши арафасидаги Тошкентнинг ижтимоий қиёфаси чизилади; шаҳар халқининг машғулоти, уларнинг ўзаро муносабати, онги, тушунчаси, бойлар ва камбағалларнинг, шаҳарнинг ижтимоий-иқтисодий, маданий тараққиётини характерловчи белги-колоритлар берилади.

«Расталар обод. Қаймоқ бозорининг бурилишида, маҳкаманинг бошида, Илҳом самоварчининг каттакон чойхонаси бўлиб, унда граммафон чалинади. Турли пластинкалар орқали Тўйчи ҳофиз, Ҳамроқул қори, Ҳожи Абдул-Азиз ва Фаргона яллачи хотинлари кетмакет мақомлар, яллалар, ашулалар айтади. Чойхонада жой етишмайди» деб бошлаган ёзувчи китобхонни найрангбоз савдогарлар, «қалдирғоч суратли коняқ» ичаётган бойваччалар, камбағал косиб ва дехқонлар, бозорда санғиб юрган дайди болалар, ҳатто, жиннилар

билан таниширади, уларнинг ақлдан озиш сабаблари ҳақида ҳикоя қиласди. Масалан, улардан бирига жиннилик «хукуматдан теккан», шунинг учун Николай, Кауфман, Мочалов, Наби каби миршабларни сўкаверади, деб таърифлайди.

Шум боланинг сўзи орқали айтилаётган ва тушунирилаётган бундай воқеалар ўша даврдаги халқ аҳволини кўрсатишда айрича қимматга эгадир. Адаб қисса персонажлари бўлмиш болаларнинг ота-онаси касб-корини баён қилиб, кўпчилиги «босмахона ва қандолатхона ишчилари эди», дейди. Шунингдек, ёзувчи Шум боланинг ўртоқларига, уларнинг ота-оналарига хос хусусиятларга маҳорат билан чизгилар беради. Энг муҳими, бу қиссада болаларнинг саёқ юриши ва ўз бошларидан ҳар хил саргузаштлар ўтказишининг боисини ҳам очиб бериб, Шум боланинг саргузашлари тарихига ҳаётий тус беради. Яъни бундай зўраки саргузаштлар замарида оғир турмуш шароити ётганлигини моҳирона кўрсатади. Ёзувчи ўша даврда шаҳарда ишсизлик авж олиши туфайли болалар тугул катталар ҳам қийналганини таъкидлайди. Китобхон шум болаларни, «эртадан кеч кўча-куйда сандироқлаб юрадиган увин-тўда бекорчилар»ни кўргач, уларнинг уйни ташлаб чиқиб кетиб, ўз бошларидан катта саргузаштлар ўтказишига сира шубҳа қилмайди. Қиссанинг дастлабки нусхасида Шум боланинг уч-тўрт дўсти тилга олинса-да, улардан фақат Омонгина кейинги, қайта ишланган нусхага киритилган. Шум бола иккиси зоҳиран кулгули, ботинан ғуссали бўлган ҳангомаларни бошдан ўтказишиди.

Юқоридаги мисоллардан кўриниб турибдики, атоқли адаб Ғафур Ғуломнинг «Шум бола» қиссаси, шунчаки, енгил-елпи ҳангомаларга йўғрилган асар эмас. Унинг замарида ётган аччиқ ҳақиқат ҳар бир ўкувчини жиддий ўйга толдиради. Тегишли хулосалар чиқаришга undайди.

Абдумўмин ҚОСИМОВ

1987 йилда Андижон вилоятининг Шаҳриҳон туманида туғилган. Андижон Давлат университетида таҳсил олган. Магистрант. Ҳозирда ўқитувчи.



Нази

Нази Нази Нази Нази

Икромжон АСЛИЙ



Читиқдирман ҳамиша бахорингга, муҳаббат

* * *

Сизни кутган тонгларим ойдин, мусаффо бўлдишар,
Утрашиб кундузларим ҳам нурга ошино бўлдишар.

Кўкда ой, офтоб, саноқсиз юлдузу сайёralар,
Бошингизда чарх уриб бир сизга шайдо бўлдишар.

Лайлиниг шайдоси танҳо Қайс эди олам аро,
Сизга-чи, мингларча ошиқ йўлда пайдо бўлдишар.

Кўнглингиз топмоқ муаммосин қаламга олмишам,
Тахмису фарду рубоий ҳам муаммо бўлдишар.

Бу замин зеболари пардозу одоб ўрганиб,
Олди-ю андозани, гулчехра зебо бўлдишар.

Сиз араз қилдингизу, ўзга нигор топмоқ бўлиб,
Манзилим Фарғона-ю Шошу Бухоро бўлдишар.

Топмадим, қайтдим қошингизга мен Икромжонингиз,
Хисларим, дилрозларим бир турфа инишо бўлдишар.

* * *

Эй дилим, дунё гамин қўй, дилрабони эслагил,
Хушкалому хуш салом, хуш муддаони эслагил.

Кетдилар олисга сендан баъзи бир ошноларинг,
Жон ила жисмингга дўст чин ошинони эслагил.

Ишқ эли маъшуқасин доно дея фахр айлагай,
Шул замоннинг зийнати – ақли расони эслагил.

Икромжон АСЛИЙ

1983 йилда Андикон туманида туғилган. Андикон Давлат университетининг филология факультетини туғатган. Ҳозирда вилоятдаги “Адолат мезони” газетасида фаолият юритмоқда. Шеърлари туман, вилоят ва Республика матбуотида эълон қилинган.



Ойгул УБАЙДУЛЛА қизи

Наср Наср Наср
Наср Наср Наср



СОФИНЧ ҚҮШИФИ

Хикоя



Бешикда ётган гүдак йиғлади. Аёл овутиш ниятида құқрагини тұтди. Аммо гүдак бошини сарак-сарак қылганича йиғисини авжига чиқарди.

Тұғруқхонадан чиқышганига мана бир ҳафта бұлыбидики, ҳар куни кечкүрун шу ахвол. Йиғлайвериб милклари қызарыб кетген чақалоқ, охири, онасидан аразлаган ҳолда ухлаб қолади.

Бұғун ҳам шу ҳол тақрорланди. Гүдак онасига истегини билдириш ниятида умидвор термулди. Митти құзларини жовдиратиб қарашидан онасининг меҳри жунбушға келди. Күз косалари ёшдан түлди. Құли билан жигарбандининг муштдайгина бошини авайлаб силади. Бу ҳол гүдагига ёқмади. Яна йиғисини давом эттиреди. Жонининг бир парчаси бүлған гүдагининг йиғиси аёл қалбини остин-устун қилиб юборди. Қалбининг туб-тубидан чиққан ўзидан норозилік ҳисси юз-құзларida зохир бўлди. Сўнгра меҳрга қоришиқ сўзлар тилига чиқа бошлади. «Бешикдаги полвоним, алла. Қалбиганамнинг сultonни, алла».

Ойгул УБАЙДУЛЛА қизи

1962 йилда Самарқанд вилоятининг Нарпай туманиндағы Хўжақўргон қишлоғида таваллуд топган. Тошкент Давлат университетининг журналистика факультетида таҳсил олган. Шоиранинг «Шаҳсувор», «Ёлғизлик гули» шеърий китоблари чоп этилган.

Хаёлидан эрим эшишиб қолмадимикан, деган ўйтди. Елкалари билинар-билинмас қисинди, боши бирозгина эгилди, юзларига қызиллик югурди.

Аммо, алла сўзларини ўзи базур өшилди. «Нима қиласай болажоним? Сенга алла айта олмаяпман.» Кўз ёшлари дувиллаб қуйилди. Гўдагини овутиш ниятида бешикни оҳиста тебратади. Гўдак яна бошини сарак-сарак қылганича баттарроқ йиғлади.

Шу пайт эшик зарб билан очилиб хонага эри кириб келди.

– Қанақа бемеҳр онасиз! Бир ҳафтадан буён болани қийнайсиз! Алла айтсангиз бўлмайдими?! – деди.

Аёл эрига қаради. Унча-мунчага жаҳли чиқмайдиган эрининг юз-қўзларида хотинига нисбатан нафрят акс етарди. Аёлининг ёшли қўзларида иложсизликни кўрган эр зумда жаҳлидан тушди. Тараддулланди. Бешик ёнига ўтиреди. Оҳиста тебратиб алла айта бошлади:

Ухлаб қолгин, болам-а, алла,
Ором олгин болам-а, алла.

Йиғлаётган гүдак тинчиб қолди. Кўзларида ҳайрат жилваланди. Жилмайди. Берилеб тинглай бошлади. Сўнгра қўзлари оҳистагина юмилди.

Эркак бешикнинг говрапўшини қия очиқ қолдирди. Ўрнидан турди. Хонадан чиқар экан, ортига бурилиб аёлига қаради. Аёли кўз ёшлари аралаш эрига миннатдорчилек ҳисси билан боқиб турарди. Эр хотинини тушунди. Раҳми келди.

– Алла айтишни билмасангиз ана газета, журналлардан ёдланг. Топа олмасангиз ёзган шеърингизни чўзиб айтсангиз аллага айланади. Ҳар икки қаторидан сўнг алла, деб қўшиб қўйсангиз яна ҳам чиройли чиқади.

Аёл билинар-билинмас жилмаяр экан, нигоҳларидаги миннатдорчилек ҳисси янада барқ урди. Шу

кундан бошлаб эркак ҳар кечада гўдагига алла айтиб ухлатадиган бўлди.

Орадан бир ярим ойча вақт ўтди.

Аёл ўйлади: «Барибир алла айтишим керак! Аммо...»

Аёл гўдагини меҳр билан чўмилтириди. Каттагина, юмшоққина сочиққа, сўнгра кўрпачасига ўради. Жигарбандига қараб туриб кулгиси келди. Чунки у «Лоло ва унинг саргузаштлари» мультфильмидаги пингвин боласига ўхшаб қолганди.

Кўйлакчасини, қалпоқчасини кийдирди. Авайлаб бешикка ётқизди. Онасининг укаларини бешикка солаётганида айтадиган сўзлари ёдига тушди. Ўша сўзларни айтди. «Қани-қани, бобовлар, кетинглар-чи. Ўйимизнинг эгаси келди».

Оёқларининг орасига, икки четига латта қўйди. Кўрпачаси билан ўради. Кўлбоғини устидан ўтказиб ўради. Ипини бешикнинг юқори қисмига боғлади. Сўнгра кўлчаларининг икки четига ҳам латта қўйиб иккичи кўлбоғни бешикдан айлантириб олиш учун эгилди. Онасининг тинимсиз эркалаб гапиришига гўдаги жилмайди. Бошини эгиб «миёв-миёв» қилганида гўдаги қиқирлаб кулди.

Аёл атлас кўлбоғлар билан боғланган дилбандининг устига, кўлда паҳтани чигитидан ажратиб тайёрлаган сатин кўрпачасини ёпди. Қалпоқчасини тўғрилади. Бахмал говрапўшини ёпиб бош тарафини бироз қайириб очиб қўйди. Сўнгра ўнг кўли билан бешикка суюниб бироз энгашган ҳолда кўкрагини гўдагига тутди.

Аёл жигаргўшасини эмиза туриб гулдан-да чиройли чехрасига, осмондан-да беғубор кўзларига термулди. Гўдак митти оғизчасини маммаси билан тўлдириб, мириқиб эмар экан, бир зум бўлсин нигоҳини онасининг нигоҳидан узмасди. Аёл жилмайди. Дилбандининг нигоҳида кулгу барқ урди.

Шу пайт аёлнинг кўнглида оналик меҳр-муҳаббати кўпилиб тошди. Кўкракларига сут келиб таранглашди.

Аёл бешикни оҳиста тебратা бошлади. Гўдаги унга яна ниманидир истаган ҳолда умидвор термулди. Аёл паст овозда алла айта бошлади.

Осмондаги ойгинам-о, алла-ё алла,
Ўйнаб оққан сойгинам-о, алла-ё алла.

Аёлнинг овози ўзига бегона эди. Гўдаги онасининг юз-кўзларига ажабсиниб тикилди. Сўнгра бу ҳол ўзига ёқмаётганини билдириш ниятида йиғисини бошлади. Аёл овозини баландлатиб давом эта бошлади:

Жон болам, жоним болам,
Жонимдан бунёдим болам, алла-ё алла.
Жон болам, жоним болам,
Жонимга пайвандим болам, алла-ё алла.
Қолар изим, алла-ё алла,
Айтар сўзим, алла-ё алла.

Ўттиз ёшга кирган Аёл учун Алла бегона эди. Алла учун Аёл ҳам бегона эди. Шу сабабли улар бир-бирига ўргана олмаётган эдилар. Бу ҳол эса гўдагига ёқмас, шу сабабли йиғисини бир зум бўлсин тўхтатмасди.

Унинг тилидан алла сўзлари чиқиши баробарида олис қишлоғи бағрида қолган болалиги кўз ўнгига келди. Онасининг беморлик енгган кичик жуссаси, заҳил,

кулгу нималигини унугтган чехраси, укасининг бевақт ўлимидан сўнг тўшакка буткул михланиб қолгани, автоҳалокат туфайли акасининг ўлими, бу фожиани кўтаролмаган онаси ҳам кўп ўтмай оламдан бевақт кўз юмгани кўз ўнгидан кино тасмасидай ўтди.

Сўнгра аёлининг ўлимидан сўнг бир этак бола билан қолиб кетган отасининг буқчайиб қолган гавдаси, маъюс чехраси, ерга урса кўкка сапчидиган ака-укаларининг хомуш бўлиб қолганлиги, сингилларининг йириқ-ямоқ кийимларда юриши, кечалари кўзларига уйку келмай онасини соғиниши, ичикиб йиғлашлари ёдига тушди. Кичик жуссасига барвакт тушган тандир тўла нон ёпишлари, кирсим тўла кийим-кечакларни ювиши, сигир сога туриб билаклари толиб қолиши ёдига тушди.

Тўйи бўлаётганида онасини эслаб тўйиб-тўйиб йиғлагани, уйи остонасидан ўтиб ташқарига чиққанида, отасининг «борган жойингда тошдек тингин! Ували-жували бўлиб, кўша қарип юринглар», деб кўзларida ёш билан duo қилиши кўринди.

Саккиз йил бўйида бўлмагани боис қайин опасининг «айб келинда бўлса, уни ҳайдаймиз» дегани, овсими унга калондимоғларча қараб «ўйланманг, келинпошша, менда олтита бола бор, бирини сизга бераман» дегани, синглиси, ака-укаларини йигиб «бирорталаринг болаларингдан бирини беринглар, оиласи бузилмасин. Болаларингга ўз боламдек қарамайман. Ҳеч нимага зориқтирмайман. Яхши жойларда ўқитаман. Олий маълумотли қиламан», деб зорланишига жавобан, уларнинг миқ этмай туришлари кўринди.

Муштипар, бир бурдагина бўлиб, бели буқчайиб қолган қайнонасининг ҳар гал қишлоққа боришганида маъюс ва умидвор оҳангда «бирорта янгилик борми, келин» деба янгилик эшитиш илинжида жовдирашиб қараб туриши, гоҳида йиғлаб «агар неварам бўлса, этагимга солсан, кейин шу турганимча ўлсан, бу дунёда армоним қолмасди» деган сўзларини қайта эшитгандай бўлди.

Тунлари ухлай олмай йиғлашлари, эрининг сочларини силаган ҳолда йиғламанг, ҳаммаси яхши бўлади, ҳали менга бир этак бола туғиб берасиз, деб овутишлари ёдига тушди...

Аёл тўлиб-тошиб алла айтар, айтгани сари алла сўзлари қалбидаги тоғдек дардларини ёмғир мисоли эритар, эриган дардлар эса ўзанини бузгудек бўлиб, кўзларидан сел каби тўлиб-тошиб чиқарди. У тошдек қалби юмшаб бораётганини англади. Шу англаниш баробарида оналик меҳру муҳаббати қалбини буткул зангдан аритиб, нафақат қалбини, балки бутун вужудини ишғол қилди.

Аёл қанча вақт алла айтганини билмади. Билгани кўз ёшларидан рўмолининг икки учи ҳўл бўлиб кетганди. Қалби мунаvvар, руҳи озод қущдек бирам енгил эди-ки...

Аёл гўдагига озор бериб қўйишдан чўчиган каби лабларини секин унинг пешонасига тегизди. Дилбандидан бирам ширин бўй тарааларди. Жигаргўшасини тўйиб-тўйиб ҳидлади. Онасининг сўзи ёдига тушди. «Чақалоқдан жаннатнинг ҳиди келади». Гўдаги онасининг меҳрини, муҳаббатини туйди. Уйку аралаш ширингина жилмайди.

Аёл бешик ёнига солинган ўрнига ўзидан мамнун ҳолда чўзилди. Кўллари бешик ёпиқларини силар экан, кўзлари юмилди.



Гулчехра РАХИМОВА

*Нази Нази
Нази Нази Нази*



Порлоқ орзу-ўйимда сирлар көлгай тунлари

* * *

*Яратганга минг-минг ташаккур,
Порлаётган чирогим учун.
Юз каллада юз миллион фикр,
Масъул ҳар ким ўз боги учун.*

*Ботадиган тиғ, наштар қанча,
Яхши-ёмон пучмогим учун.
Бирлашмасак етмас беш панжаса,
Ёвнинг йўлини тўсмогим учун.*


*Музейдаги занг қурол-яроғ,
Ётар ииртиқ, ямогим учун.
Ҳилтираган мовий ранг байроқ,
Паноҳ уруғ-аймогим учун.*

*Ўт бўлиб ён, Қақнусга айлан,
Бўлма қурбон нафс тогинг учун.
Тирикликни қилмагил эрмак,
Фақат нафсинг, томогинг учун.*

* * *

*Қорлар ёғса бошима,
Шошимам рўмол ўрашга.
Келар ҳар кун қошима,
Хурлар аҳвол сўрашга.*

*Порлоқ орзу-ўйимда,
Сирлар кечгай тунлари.
Нурлар инган уйимда,
Булбулларнинг унлари.*



*Бахтга ишонгим келар,
Ғўр истак бермас тутқич.
Юрагимда гулулар,
Келолмагайдир ўкинч.*

*Эрк билан юрт дарди бир,
Умид-жон қадар кучли.
Тарқ эттмайди барибир,
Қонда яшаига ўчилик.*

*Тор дунёлар бўлиб кенг,
Йўл қўймас қалб нурашга.
Чунки ўзни енгиб мен,
Бел боғладим курашга.*

* * *

*Олам тинчлик тафтида,
Қолмас ўчдан бир ниишон.
Тутар ерни кафтида,
Буюк Ҳазрати Иңсон.*



*Нур ва шаффоф бу кўзёши,
Не бир дамлар ичида.
Ярқираган минг қўёши,
Чексиз гамлар ичида.*

*Тўлдирап баҳт камини,
Юрт билан тенгсиз жаҳон.
Тортуб улус гамини,
Севинчлар олам жаҳон.*

Гулчехра РАХИМОВА

1952 йилда Қорақалпогистон Республикасининг Тўрткўл туманида таваллуд топган. Тошкент Даёлат университетида таҳсил олган. Қорақалпогистон халқ шоири. Кўплаб шеърий ва насрый асарлар муаллифи.



Кўнгил ҳамон қаримас,
Севишини ўйлар яккаш.
Дунё эса қасд олар,
Хув, жонга теккан яшаши.

ТЎРТЛИКЛАР

Кўзлаган манзилга, айт, қандоқ етай,
Ташлади бу ҳаёт пахтадек титиб.
Қайтмас йўлдан қайтиб кетяпман, нетай,
Ичимга дунёning оҳини ютиб.

* * *

Кетар ҳар кун дилимни доғлаб,
Куёши чиқса тонгда қизариб.



Саробларга умид боғлабман,
Ёлғон тушилар айлади гарид.

* * *

Эси-дарди “катта”га ёқии,
Қани юрак – кўкракда нишон?
Юролмаса нетсин бояқши –
Оёгида, бошида кишин.

* * *

Илинмас кўз то саҳаргача,
Фикрлари сочиқ пойма-пой.
Тақиб этар то машҳаргача,
Ҳаётида қолган очиқ жой.



Алишер МУҚУМОВ

Дилга яқин ҳар битта сўзинг



ЎЗГАРМАДИНГ

Барча дилда жо эдинг, ўзгармадинг,
Менга бепарво эдинг, ўзгармадинг.

Доимо ёнингда бўлсам ҳам нетай,
Барibir танҳо эдинг, ўзгармадинг.

Гарчи мен-ла келди шодликдин хабар,
Гам билан оишно эдинг, ўзгармадинг.

Ҳар суханда бўлмаса меҳру вафо,
Булбули гўё эдинг, ўзгармадинг.

Гарчи кўп бўлса чаманда лолалар,
Сен гулираъно эдинг, ўзгармадинг.

Йўқ эдим кўзларингда мен, бироқ
Кўзлари шаҳло эдинг, ўзгармадинг.

Гарчи дунёда сулувлар кўп эди,
Менга бир дунё эдинг, ўзгармадинг...



ТАШРИФ

Орзулардан юзим ўғириб,
Мен ўзимдан бўлгандим жудо.
Изтиробда қолган чоғимда
Сени менга етказди Худо.

Овозларинг нақадар майин,
Дилга яқин ҳар битта сўзинг.
Менга қошу кўзларинг таниш,
Тушларимда кўрганим ўзинг.

Келгунингча шодлик йўқ эди,
Яшар эдим дунёда ёлгиз.
Сен келдинг-у бир мўъжизадек,
Гам юракдан йўқолди изсиз.

Сенга мудом ёр бўлсин Худо,
Шодлигимга ёрлигинг учун.
Бор бўлгин то бор экан дунё,
Чунки борман борлигинг учун.



Дилсора АБДУСАТТОРОВА

Наср Наср
Наср Наср Наср



ТУФИЛГАН КУН

Хикоя



Санжарбек түсатдан дарсларга келмай қолди. Орадан бир ҳафта үтди. Гурух раҳбари Наргис Нодировна хавотирга туша бошлади. Санжарбек билан бир маҳаллада яшайдиган Дилфузани ўрнидан турғазди.

— Маҳкамова, мабодо сен билмайсанми, Шодиев нега келмаяпти?

Дилфузда худди чақимчилик қилаётгандек теварагига бир аланглаб олди.

— Биламан... унинг дадаси қамалиб қолди. Менимча, сабаби шу.

Синфхона сув қуйгандай жимиб қолди. Ўқувчилар ўзаро маъноли кўз уриштира бошлиши. Кимлардир ажабланиш, ачиниш билан бош чайқар, баъзи бирорларнинг айтида мамнун ифода ўйноқлар эди.

Дилсора АБДУСАТТОРОВА

1998 йилда Тошкент вилоятининг Паркент туманида туғилган. "Эзгулик", "Нигоҳимдаги одамлар" номли китоблари чоп этилган. Ўқувчи.

— Тушунарли, — деди Наргис опа ўйчан ва хомуш тарзда деразадан қаракан, — Шодиевлар оиласи мушкул аҳволда қолибди.

Санжарбек лицейдаги энг түполончи, безори болалардан бири эди. Текканга тегиниб, тегмаганга кесак отарди. Атрофига баъзи бирорларни йигиб, доим аллақандай дилхираликларни бошлаб юрарди. Айтишларича, унинг отаси қандайдир нуфузли ташкилотга бош-қош экан. Топиш-тутиши зўр. Шунинг учун ҳам Санжарбек талтайиб ҳеч кимни назар-писанд қилас экан. Гуруҳда ҳам кўплар ундан ҳайиқар, очиқ-ошкора хушомад қилишар эди. Аммо гурух раҳбари Наргис Нодировна Санжарбек билан муроса қилишни истамасди. Тез-тез уни койиб, танбех берарди.

— Лицейимиз тумандаги энг яхши лицей бўлиши учун, гуруҳимиз лицейдаги энг намунали гурух бўлиш учун курашяяпти. Шодиев, сен ўз хулқинг билан ҳаммамизга халақит бераяпсан, бизларни орқага тортаяпсан, илтимос, ўзингни бироз кўлга ол. Мени эмас, ҳамсабоқ дўстларингни хурмат қил.

Санжарбек бундай гапларга сурбетларча, бепарво тиржайиб қўяр, баъзан қўпол қиликлар кўрсатиб синфхонадан чиқиб кетар эди.

Бир ойча аввал лицейга юқоридан текширувчи гурух келди. Директордан тортиб оддий ўқитувчиларгача жонсарак юргургилаб қолишиди. Айниқса, Наргис Нодировнанинг ҳаяжони чексиз эди. Айтишларича, текширув гурухи айнан Наргис Нодировнанинг ишини ўрганиш мақсадида келган эмиш. Бу билимдон, маҳоратли педагогни юқорироқ лавозимга кўтармоқчи бўлишса керак, ҳойнаҳой.

— Болалар, — деди Наргис опа ўша куни эрталаб синфхонага кириб, — илтимос, тартиб-интизомга, давоматга эътибор беринглар.

Ўша куни ўзи бош бўлиб аллақаердандир қўшимча кўргазмали ўкув қуроллари топиб келтириди. Ўзи енг шимариб ўқувчилар ёрдамида супир-сирирга киришиди. Бир соат ичига синфхона ярақлаб кетди. Худди ичларига чироқ ёқилгандаи болаларнинг ҳам юз-кўзлари яшнаб қолди. Аммо ўша куни текширув гуруҳидан дарак бўлмади.

“Бизнига эртага киришаркан”, – дея хабар етказди кимдир.

Бироқ эртаси куни дарсга келган болалар синфхонанинг аҳволини кўриб ҳангуманг қотиб қолишиди. Ҳаммаёқ тўзғин! Кўргазма қуролларининг баъзиси йирилган, стуллар, гултуваклар афарилган эди.

Болалар бир-бирига қарашди. Нигоҳларда битта савол айланарди: “Бу кимнинг иши?” Ва ўша кўз қарашларда жавоб ҳам хирагина липиллаб турарди: “Бундай безорилик фақат Санжарбекнинг қўлидан келади”. Айни пайтда Шодиев худди ҳеч нарса бўлмагандек сақич чайнаб, оёқ чалиштириб ўз ўрнида ўтиради. Гувоҳлардан бири чиндан ҳам бу ишни Санжарбек қилганини тасдиқлаб болаларга шивирлай бошлади.

Синфхонага ҳовлиққанича Наргис Нодировна кирди. Аҳволни кўриб ранг-рўйи бўздек оқарди. Чеккадиги стулга беҳол ўтириб қолди. Сумкачасидан аллақандай дори олиб тили тагига ташлади. Кимдир унга сув тутди. Шу пайт оstonада лицей директори ва икки нафар текширув гуруҳи аъзоси пайдо бўлди! Наргис Нодировна аранг ўрнидан туриб уларга юзланди.

– Ассалом...

Аҳволни кўриб лол қолган директор саломга алик ҳам олмади.

– Нима гап, Тоҳирова? Кўчиб кетяпсизларми? – деди совуқ бир товушда у.

– Йў-ў...ҳалиги, – деб минғирлади Наргис опа каловланиб, – йиғиштироқчи...

У гапини тугата олмади. Текширув гуруҳи аъзолари гап-сўзсиз ортга бурилишиди. Директор ҳам уларга эргашаркан, муаллимага ўқрайиб қўйди. Болалар ҳамма-ҳаммасини нафаслари ичларига тушиб кузатиб туришарди. Гурух раҳбари яна ўзини беҳол стулга ташлади.

– Болалар, – деди у бироздан сўнг зўрға, – хонани тартибга келтириш керак.

Ўқувчилар дувва ишга киришишди. Кимлардир тўкилган нарсаларни йиғиштириди, кимдир челяқда сув, пол ювадиган латта келтириди. Эпчилоқ болалар йирилган кўргазма қуролларини бир зумда елимлаб ямашди.

Наргис Нодировна ўқувчиларнинг астойдил ёрдамга шошилишларидан мамнун бўлди, шекилли, аста-секин чехраси очилиб, ўзига кела бошлади. Лекин бир оғиз ҳам бу бузгунчиликни ким қилди, деб сўрамади. Ҳеч нима кўрмагандай бир оздан сўнг дарс ўта бошлади.

Бу воқеа бир-икки кун лицейда шов-шув бўлиб юрди-ю, сўнг тагин ҳаммаси тинчиди...

Мана энди янги бир машмаша: Санжарбек бир ҳафтадан бери ўқишига келмаяпти. Ниҳоят, бунинг сабаби маълум бўлди-ю, Наргис Нодировна маъюс тортиб қолди.

– Болалар, – деди у ўқувчиларга бир-бир кўз югуртириб, – биз демократик, одил давлатда яшяяпмиз. Отанинг қилмиши учун бола жавобгар эмас. Сизлардан илтимос, Шодиев билан ҳамишагидек дўстона, яхши муносабатда бўлинглар. Эртага унинг туғилган куни, бундан хабарларинг борми?

Ўқувчилар индамай елка қисишиди.

– Менинг хабарим бор, – деб қўйди доим Санжарбекка дум бўлиб юрадиган Шокир.

Наргис Нодировна унга юзланди.

– Жуда яхши, Шокиржон. Эртага уни бошлаб кел. Иложи бўлса, икки-учта бўлиб боринглар, дўстни кулфат пайти ёлғиз қолдириш яхши эмас.

Болалар бир-бирига маъноли қарашди. Ўзига шунча ташвиш орттирган ўқувчига устознинг бу қадар эҳтиром кўрсатиши уларга жуда ғалати туяларди.

Эртаси куни гуруҳдошлар Санжарбекни бошлаб келишишди. Илгари ерга урса, осмонга сапчийдиган ўспириндан асар ҳам йўқ эди. Озиб-тўзиб, мунғайибгина қолиби у.

Наргис Нодировна болаларга имо қилди. Ўқувчилар дувва ўрнидан туриб, жўр овозда қичқиришиди:

– Табриклаймиз! Табриклаймиз!

Санжарбек ҳангуманг бўлиб қолди. Довдираған қўйи у ён-бу ён аланглади.

– Санжарбек, туғилган кунингиз муборак! – деди Наргис опа жилмайиб, – иқболингиз баланд бўлсин!

Аввал келишилгандек кимдир Санжарбекка бир даста гул тутди. Кимдир ялтироқ ўрамли совғани узатди.

Санжарбек ҳануз каловланар, лабларида синик бир табассум кезинар эди. У Наргис опа томон юзланди. Кўзларидаги филт-филт ёш айланарди.

– Устоз, – деб ғудранди у аранг, – мени... мени кечиринг...

Наргис Нодировна жилмайган қўйи унинг пешонасидан оҳиста ўпиб қўйди. Санжарбек устознинг елкасига беихтиёр бош қўйиб, баралла йиғлаб юборди. Айни пайтда у чиндан ҳам онадан қайта туғилган гўдакка ўхшарди.





Бириңиң үграшув

Бириңиң үграшув
Бириңиң үграшув

Махфузә ИМОМОВА



Чорлаяпман латиф бир тонгни

* * *

Тун негадир күринмай қолди
Тұнамоқда балки йұлакда.
Ой ёргулғык ичра йүқолди.
Күёши чиқди...
Шаффооф күйлакда.
Чапак қалиб қүйди чумчуклар.
Хар чечакка кирди иссиқ жсон.
Баҳор келди заминни йүқлаб,
Уң фаслни қылғач имтиҳон.

* * *

Оқармоқда осмоннинг ранғги,
Шитирлайди...
Дараҳтлар юпун.
Түш күрарман, мен бугун янги,
Эскиларин унұтмоқ учун.

Оқармоқда оқшомнинг ранғги,
Бардошимни синар суқунат.
Чорлаяпман латиф бир тонгни,
Қизғалдоқлар барғида тунаб.

Оқармоқда хира күнларим,
Изтироблар, энді хайру хүши.
Сен кетарсан умримдан нари,
Мен кетарман күргали бир туши.

Ишқ кетмайды бизлардан фақат...



Борар йўлим аниқ.
Борар йўлим чин...
Кетяпман...
Атрофда бир уюм ҳазон.
Ортимдан эргашиб келяпсан нечун?
Мен сенга боғланиб улгурдим қачон?
Баридир кетяпман...
Юрагим оғриб...
Кўзларинг тубига бўлмоқдаман гарқ.
Ўртада бепоён масофа бордир.
Каттадир азизим, ўртамиизда фарқ.
Оҳ, ҷалғиб кетяпман...
Орзуларимдан..
Менга азоб берар бу айри дунё.
Муҳаббат, охирги сўзни ўзинг айт
Кетайми,
Кетайми,
Қолайнми ё?!



ТОНГ

Оғриқ берар бу кеч жароҳат,
Кўзларим лиқ согинчга тўлган.
Сен ҳам мени куттирма фақат,
Сен ҳам барвақт туришини ўрган!

Махфузә ИМОМОВА

1989 йилда Сурхондарё вилоятининг Олтинсой туманида туғилган. Шеърлари туман, вилоят ва Республика матбуотида эълон қилинган. Ҳозирда “Эко олам” журналида фаолият юритмоқда.



ҲАММАСИ БОЛАЛАР УЧУН

Болалар маънавиятини шакллантиришда эртакларнинг алоҳида ўрни бор. Бугунги кунда турли халқ эртаклари асосида кўплаб мултфилмлар яратилмоқда. Телеэкранлар орқали кўрсатилаётган мултфилмлар болалар тарбиясига таъсир этиши табиий. Лекин айни пайтда экранларда намойиш этилаётган мультипликацион фильмларнинг ҳаммаси ҳам фойдали жиҳатларга эгами? Умуман, ҳозирги кунда болалар учун яратилаётган анимацион фильмларнинг аҳволи қандай ва бу жараёнда асосан қайси муаммолар кўзга ташланаяпти?

Ўзбекистон Ёзувчилар уюшмаси ва “Ўзбеккино” миллий агентлиги ҳамкорлигидаги ўтказилган давра сұхбатида ана шу мавзуда атрофлича фикр алмашилди.

– Ҳамма яхши нарсаларни болаларимизга бағишлишга ҳаракат қиласиз, – деди Ёзувчилар уюшмаси раиси, Ўзбекистон халқ ёзувчиси Муҳаммад Али. – Шундай экан, болаларга фильмлар ва мултфилмларнинг ҳам энг яхшиларини тақдим қилишимиз керак. Энг аввало, турли эртак ва ҳояялар асосида яхши мултфилмлар яратиш, бунинг учун эса истеъододли ёзувчи ва режиссёrlарнинг ҳамкорлиги йўлга қўйиш зарур.

Дарҳақиқат, ҳақиқий ёзувчи ҳар бир асар устида, токи айтмоқчи бўлган гапи маромига етгунча, жиддий ишлайди. Росмана режиссёр ҳам ўз ишига ўта масъулият ва талабчанлик билан ёндашади. Бундай жараёнда, албатта, барчага ибрат бўладиган яхши асарлар яратилади. Болалар учун асарлар ёзаётган фидойи ёзувчи ва шоирларимиз ҳам, моҳир режиссёrlаримиз ҳам кўп. Ҳозирги вақтда хорижий мамлакатларда тайёрланган кўплаб анимацион фильмлар ўзбек тилига ўғирилиб, телевизорлар орқали намойиш этиляпти ёхуд дискларга туширилиб, савдога чиқарилмоқда. Лекин уларнинг савияси, миллий тарбиямизга қанчалик тўғри келиши жиддий йўлаб кўриладиган масала. Бинобарин, фильмлар тарбия воситаларидан бири эканлигини инобатга оладиган бўлсак, уларда, аввало, миллий қаҳрамонлар қиёфаси акс этишига, тилига, дидактик аҳамиятига алоҳида этибиор қаратиш лозим. “Ўзбеккино” миллий агентлиги буюртмаси асосида ҳар йили йигирмага яқин болалар ва ўсмирлар учун фильмлар, ўнга яқин мултфилмлар ишлаб чиқариладиганлиги таъкидланди. Аммо уларнинг ҳаммаси мазмунан пишиқми, тили болаларга мосми? Сценарийларнинг кўпчилиги ҳаваскор ижодкорлар томонидан тақдим этилаётганлиги, бу эса режиссёrlар ва киномуҳаррирлар учун ҳам муайян қийинчиликларни юзага келтираётгани айтилди. Шунинг учун эндилиқда таникли ёзувчи ва шоирлар ҳам бу ишда четда томо-

шабин бўлиб турмасдан, яхши асарлар, сценарийлар ёзиб берсалар мақсадга мувофиқ бўлар эди.

Ўзбекистон халқ ёзувчиси X. Тўхтабоев, Анвар Обиджон, таникли шоирлар Т. Адашбоев, Миразиз Аъзам, режиссёrlар Мавзур Маҳмудов, Б. Одилов, “Ўзбеккино” бош мухарририFaafur Шермуҳаммад, ва бошқалар мавзу бўйича ўзларининг таклиф ва мулоҳазаларини билдирилар. Тадбир сўнгидаги ушбу соҳада ҳамкорликда олиб бориладиган ишлар юзасидан чора-тадбирлар белгиланди.

* * *

Ўзбекистон Ёзувчилар уюшмасида Ўзбекистон Бастакорлар уюшмаси билан биргалиқда ташкил этилган давра сұхбатида асосий этибиор болаларга аталган қўшиқларнинг бугунги савияси, уларни ривожлантириш йўллари мавзусига бағишиланди.

– Бундан қарийб чорак аср муқаддам яратилган айрим қўшиқлар борки, ҳали ҳам кўпчилик томонидан севиб тингланади, – деди Бастакорлар уюшмаси раиси Рустам Абдуллаев. – Бу истеъододли шоир ва бастакорларимизнинг ҳамкорлиги туфайлиdir. Ҳозирги кунда болалар учун юқори савияли қўшиқларнинг камлигига биринчи галда шоир ҳамда бастакорларимиз ўртасида ҳамжиҳатликнинг етарли даражада эмаслиги сабаб деб ўйлайман. Шунинг учун ҳам турли байрам тантаналари ва тадбирларда болаларга тақдим этиладиган қўшиқларни танлашда қийинчиликларга дуч келаяпмиз.

Таъкидланганидек, бугунги кунда болалар қўшиқчилигига ҳали анчагина муаммолар мавжудлигини тан олмай иложимиз йўқ. “Булбулча”, “Томоша”, “Севинч” каби болалар дасталари фаолият кўрсатяпти. Аммо ушбу дасталарнинг репертуарларини ҳали яна анча бойитиш керак. Шу боисдан ҳам айни пайтда мактаблар ва мактабгача таълим муассасаларида қандай тадбир ўтказиладиган бўлса, аксарият ҳолларда катталар учун ижро этиладиган ишқ-муҳаббат ва бошқа мавзудаги қўшиқлардан фойдаланилмоқда. Болалар онгига айнан ана шундай қўшиқлар сингиб қоляпти. Бу шунчаки муаммо эмас. Энди истеъододли қаламкашлар, бастакорлар биргалиқда ижод қилиб, болалардек беғубор, қувноқ, мазмундор қўшиқлар яратиш устида самимий изланишлари зарур. Бундай қўшиқларни тўплаб, видео ва аудио албомларини кўпайтириб, таълим муассасаларига ҳамда кенг оммага етказиш масалалари ҳам йўлаб кўрилса мақсадга мувофиқ бўларди.



Биринчи утрашув

Биринчи утрашув
Биринчи утрашув

Феруза ТУРАЕВА



ЙЎЛОВЧИ

Ҳикоя

Рустам йўл бўйлаб хушхандон келарди. Кўзлари кувончдан порлаган. Чехрасида мамнун бир ифода. Майнин эсаётган шабада димогига келтирган чечаклар ифоридан мириқиб, чуқур-чуқур нафас олди. Бу ифор баҳор хушхабарига лиммо-лим эди. Бундан Рустамнинг қўнгли ҳам чоғланди. Уни хуш кайфият етаклаб кетаётган эди. Кун ҳам гўё унга ҳамроҳлик қилишга шайлангандек дараҳт япроқлари орасидан мўралаб-мўралаб кўярди. Кўкнинг у ер-бу ерида момиқина бу-путлар намланган пахтадай сузуб юрибди. Қушларнинг чуғуралиши, гала-гала бўлиб, бир-бирларини қувлашиб у дараҳтдан бу дараҳтга пириллаб учиб-кўнишлари қўнгилларда алланечук завқ уйғотади.

Рустам туйкус кечаги сабоқни эслади. Қандайдир институтдан атай ташриф буюрган, юз-кўзидан, хатти-ҳаракатидан билимдон, фикрчан зиёли эканлиги билиниб турган ёш бир музаллим маъруза қилиб берди. Маъруза ҳам унча-мунча эмас, инсоний комиллик мавзусида бўлди. Домла инсоний меҳр-оқибат, садоқат, имон-эътиқод ҳақида тўлқинланиб гапириб ҳаммани оғзига қаратди. Ҳатто айримлар андак-андак кўз ёши ҳам қилиб олишиди.

Биз муносабатимизни энг аввал яхши кўришдан бошлиймиз. Кейин иззат-хурмат уйғонади. Сўнг севамиз, меҳр кўрсатамиз. Оқибатда, бир-биримизни ардоқлаб яшаймиз, деди у донишманларга хос йўчанлик билан. Хуллас, ўзи ҳам комиллик таъмини татиб кўрганига ҳаммани осонгина ишонтириди. Энг муҳими, Рустам домланинг эътиборига тушди. У берган саволлар устоҳда қизиқиш уйғотди. Миянг бут болага ўхшаяпсан, кейинроқ менга бир учраш, – деди у киши кетар чоги.

Ўша эътирофлар хаёлида жонланар экан, Рустамнинг қалби баттар чароғон тортарди. Теварагига мамнунлик, очиқ қўнгиллик билан кўз ташларди. Йўлда нотанишларни кўрганда ҳам қўнгли юмшаб, уларнинг

яқин келишини интизор кутарди. Гоҳо қадамларини жадаллаштириб кимларгадир етиб оларди. Туйкус у бир чолни кўриб қолди. Қария ҳассасига таянган кўйи аранг борар, эгилиб-букилиб қолганига қарамай шошилиб қадам ташларди. У тез юришга қанчалик уринмасин, қарилик оёғига тушов бўлганди.

“Сизга кўмак керак эмасми”, – деб сўради Рустам унинг сертомир кўлидан тутиб.

Чол чурқ этмади. Бошини янада энгаштириб олди. Нигоҳини ердан олмади. Рустам чолнинг ҳасса ушлаган кўлига кўлини кўйди. Чол кўлини тортиб олди. Энди унинг кўллари қалтирай бошлади. Рустам ўзини андак четга тортди. Бироқ чолни эътиборсиз қолдира олмади. Ортидан унга эргашди. Чол бепарводай кетарди-ю, аммо хижолат тортганилиги сезилиб турарди.

Рустам энди нимадир дейишга юраги дав бермаётганди. Иккаласи жимликни бузмаслик керакдек йўлда давом этиб борарди. Бироздан кейин чолнинг лаблари пирпирай бошлади. Гоҳида ўзи билмаган ҳолда овози чиқиб қоларди. Рустам уни элас-элас эшитарди-ю, тушуна олмасди. Кейин қариянинг нима деяётганига қизиқиб изидан бораверди. Унинг нима учун бу кўйга тушганини билишни хоҳларди. Чол ҳамон гапириниб кетишида давом этарди.

– Ўзим. Нега ўзим? Хатога қаерда йўл кўйдим? Ахир у... – деди-ю, ёнида ҳамроҳи борлиги эсига тушди.

Чол Рустамга қаради.

– Сизга нима керак, ўғлим?

– Кечирасиз. Сиздан... – Рустам хижолат бўлганидан гапини давом эттира олмади. Ноқулай аҳволда қолганини ҳис қилди.

– Мендан ниманидир сўрамоқчимисиз? – сўради чол.

– Ҳа. Билмоқчи эдимки...

– Қаёққа кетаяпсиз демоқчимисиз, – деди қария чўрт кесиб. – Ҳозир қаерга кетаётганимни, қаерга боришини ўзим ҳам билмайман.

Феруза ТУРАЕВА

Сурхондарё вилоятининг Денов туманида туғилган. Ўзбекистон Миллий университетининг журналистика факультети талабаси.

Рустам бундай гапни кутмаган эди. Шунинг учун у ҳайратини яшириб ўтиради.

– Ахир улуғ ёшда бўлсангиз...

– Алам қиладигани ҳам шунда-да, – деди чол.

Рустам энди қарияни яхшироқ билишга ҳаракат қила бошлади.

– Фарзандларингиз йўқми?

– Яккаю ёлғиз ўғлим бор, – хўрсиниб жавоб берди чол.

– У билан яхши эмасмисиз?

– Шундай десам ҳам бўлаверади. Лекин начора... набираларимни яхши кўраман, уларнинг кулишлари, атак-чечак юришлари, айниқса, "бо-бо" деганини эшитганимда дилим яйради. Афсуски, булар мен учун ширин истак...

Қария кўзларидан дувиллаб келган икки қатра ёшини Рустамдан яшириб ўтирасдан артиб қўйди.

Рустам ҳар савол берганида чолга озор бергандек бўларди. Бироқ уни шу ҳолича ташлаб кета олмасди ҳам.

Чолнинг юраги эзилган. Рустамга меҳр тўла кўзлари билан боқиб турарди.

Энди Рустам қарияга яқин бўлиб қолганди. Мўйсафидни сухбатга тортишни ҳоҳларди. Рустам чолни кўча четида жойлашган ёғоч ўриндиққа бошлаб борди. Нима биландир унинг кўнглини кўтаришга ҳаракат қиласди. Чол ерга тикилган, гоҳида чуқур хўрсиниб оларди. Гоҳида ачиниш ва раҳмдиллик билан Рустамга қараб қўярди.

Рустам ўзини қатъий тутган бўлди. Чолдан нима бўлганини очик сўрашга киришди.

– Отахон, нега борадиган манзилингиз йўқ? Фарзандингиз бор экан.

– Фарзандим бор. Тўрт қаватли уйим бор. Афсуски, у ерда менга жой йўқ.

– Нима?! Тўрт қават уйда сизга жой йўқ!

– Сиз тушунишингиз учун бошидан бошламасам бўлмайди, – деди чол, сўнг оғир сўлиш олиб, хира бир товушда ҳикоясини бошлади, – ёш эдим. Отам вафот этганди. Оилани боқиш онам ва акаларимнинг зиммасида қолди. Онам куни билан кўчада тамаки сотиб ўтиради. Икки акам эса, ёз-кузда қадоқланмаган сув сотишарди. Олиб юрилган сув иссиқда исиб кетар, онда-сонда олмоқчи бўлган харидор ҳам сувни олмай кетарди. Аканаримнинг бу аҳволдан ҳафсалалари пир бўлар эди. Мен кичкина эдим. Онамга ё акаларимга эргашиб юардим. Шу зайл кун кўтардик. Кўпроқ пул келган куни севиниб кетардек. Даромад яхши бўлган куни орзуларимиз учун пул йигардик. Буни қарангки, онам тамаки сотиб юриб, баданига тамакидан аллергия тошадиган бўлиб қолди. Аста-секин касаллик

тез-тез безовта қила бошлади. Орзулар учун йигилган пуллар аламли кўз ёши билан кетди. Аканарим онам учун югурди-елди. Бироқ хасталик бизни онасиз қолдирди. Аканаримнинг зиммасидаги юмушлар яна оғирлашди. Икала акам ҳам тамаки сотишга ўтди. Мени бирга олиб юришарди-ю, тамаки соттиришмасди. Онам бизларни оқ ёқали кўйлак кийса, деб ҳавас қиласди. Доим кийимларимдан тамаки хиди анқиб турарди. Биз доғлари тез билинмайдиган кўйлак ки-ярдик. Кўчада югургилаб юрганимиздан тез терлаб кетардик. Кейин кийимлар чангдан кирланарди. Онамнинг орзусини амалга оширишни истаган акаларим мени ўқитиши. Сўнг мен ишлай бошладим. Аканарим хурсанд эди. Биз баҳтиёр эдик. Бир-бириմиздан ҳеч нарсани аяб ўтирасдик. Улар ҳаёт қийинчиликларига эрта учраганлиги сабаб эрта вафот этиши. Мен акаларимсиз ёлғизланиб қолиб бор меҳримни ўғлимга бериб, унга суюниб қолдим. Ҳаётим осуда кечарди. Аканарим менга қилган меҳрибончиликларини, зорланиб яшамаслигим учун берган кўмакларини мен ўғлимга қилган эдим. Ҳеч нарсага зориқмади. Қийинчилик ни-малигини билмади. Зиёлилар орасида юрсин, авлодимиз ночор қолмасин, деб ўқимишли қилдим. Ниҳоят, зиёлилар орасида ўзининг фикрига эркин суюнадиган бўлди. Обрў ҳам орттириди. Бироқ юксалишлар уни кибрлантириб юборди. Мен ишонтириб айтаманки, менинг ўғлим зиёлилик муҳитини ўзгартириб юборди. Мана, бир ойдан ошаяпти, менга ҳар куни янги қурилган қариялар уйини мақтайди. Мен шу жойда яшашим керак экан. У жойни банд қилиш учун танишларини анча оввора қилиб қўйган экан. Мен бормасам сўраган одамларнинг олдида юзи шувут бўлар экан. Ҳозир мени излаб юргандир.

Чолнинг ҳикояси тугар-тугамас олдиларига япянги "Ласетти" келиб тўхтади.

– Отахон, келинг, машинага чиқинг, – деди ҳайдовчи.

Чол Рустамга сўлғин қаради-да, сўнг ҳассасини шундай маҳкам ушлаб олдики, гўё ҳаёт-мамоти шунга боғлиқ эди. Рустам чолни кузатиб турарди. Чол машинага яқин борганида эшик очилди. Ичиди кимдир бор эди.

«Овора қилмасдан ўтирангиз бўлмайдими?», – деди номаълум йоловчи.

Рустам машина ичкарисига синчиклаб қаради. Қаради-ю, кўзларига ишонгиси келмади. Ўзини панага олиб турган одам, ўша – комил инсон ҳақидаги маъруzasи билан ҳаммани лол қолдирган ёш билимдон устоз эди.

Рустам худди ҳаво етишмаётган каби бўғила бошлади. Негадир чор атроф кўзига зим-зиё бўлиб кўринди.





Мұтодаа
Мұтодаа мұлаа
Мұтодаа



Дилафрӯз ЗЕБАРОВА



"ОҚ ҚОФОЗ КҮНГЛИМНИНГ ТУФИЛГАН ЕРИ"


ёхуд ёш шоира Гулбаҳор Ортиқұжәева ижодига
бир назар

Ёшлик инсон умрининг энг гүзал фаслидир. Айни шу даврда инсоннинг ички дунёси турфа эврилишларни бошидан кечиради. Орзулар, соҳир түйғулар қалбни ифорли чаманзорга айлантиради. Ёшликнинг ушбу манзарасини тасвирлаш ҳар бир ижодкорда ҳар хил кечади. Бу борада иқтидорли шоира Гулбаҳор Ортиқұжәеванинг үз нигоҳи, айттар сүзи бор. Биз қуйида унинг яқындагина "Адолат" нашриети томонидан чоп этилган "Ұзингизни авайланг" деб номланувчи тұпламидан жой олган айрим шеърларига назар ташлаб ўтишга ҳаракат қылдик.

Хәётни англаш умрнинг ёшлик дамларидан бошланади. Бу даврда киши турлы күчаларда ҳәётнинг үзига дуч кела бошлади. Гулбаҳор бу ҳолни нозик бир чизгилар билан гүзал ифодалайды.

Епіб болаликнинг дарвозасини,
Кенг күчага чиқдинг – бу ҳәёт үйли.
Қайға ғойиб бўлди бармоқчаларинг,
Қўлларинг ҳам катта одамнинг қўли...

Дарҳақиқат, киши дунёни англай бориш баробарида болалик дарвозасини ёпишга мажбур бўлади ва ташқарига – чинакам ҳәёт кўчасига чиқади. Энди у бола эмас. У ҳәёт саҳнасида асосий ролларни ўйнай бошлиши керак.



Елкамга қўлини ташлади дунё,
Дўст бўлайлик, деди, мен дўст бўлмадим.
Кейин қасд қилишини бошлади дунё,
Мен бундай яшашга кўнмадим.

Ҳәётдаги турфа кечмишлар силласида түйғулар шуурида тараашланиб инсон теранликни оширади. Энди унинг ҳар бир қадамда мулоҳазага эҳтиёжи орта бошлади. Шоира Гулбаҳор Ортиқұжәева эса...

«Энди мусичанинг кўзларида мен, томоша қиласман болалигимни», «Дунё айт, ким билан дўстсан ўзи, юраги бутунни кўрмадим», каби ифодалар билан ўз қарашларини изҳор этади. Ушбу ҳолатни ифодалаш учун шоира яна бир шеърида, «оқ қоғозкўнглиминг туғилган ери» дея шоирона түйғуларга хос сатр тузади. У энди кўнглидагиларни қоғозга шеър қилиб туширишга уринади: «Мук тушиб ёзасан, ёзаверасан, Кўнглингни ёзолмай бўласан ҳалак».

Шоира ушбу шеърининг давомида «Шу лаҳза сувдамас, бошқа жойдамас, қалбингда айланар кўхна чархпалак» сатрлари орқали кўнглида кечеётган кечинмаларнинг манзараларини маъюс бир оҳангларда беришга уринади.

Ҳар қандай инсон, унинг фикр юритиши, бирор түйғуни ҳис қила олиш қобилияти бардавом экан, унинг қалбида энг азиз бўлган түйғулар яшайди. Ватан түйғуси – ана шу түйғулар ичидаги энг залвор-

Дилафрӯз ЗЕБАРОВА

Қашқадарё вилоятининг Дехқонобод туманида туғилган. Ўзбекистон Миллий университетининг ўзбек филологияси факультетида таҳсил олган. Ўқитувчи.



лисиdir. Ҳисларни қоғозга муҳрлаш ижодкордан алоҳида масъулият, ҳаракат талаб қилади.

*Ватан нелигини англар экансан,
Бехосдан ўзингни англай бошласонг.*

Гулбаҳорнинг ушбу сатрларида ватанинг англаш, ўзни англаш билан нақадар боғлиқ эканлиги фалсафий ёндашув жиҳатидан ҳам чиройли тасвирланган. Ватанинг ҳар бир кенглиги: унинг чаманидаги таровати-ю, боғларидаги саховатидан илҳомланган шоира "Нафас олинг..." шеърида қўйидаги кўркам сатрларни битади:

«Сиз ҳам она заминга ўхшаб, нафас олинг майсалар билан», «Энг аввало, тупроқни севинг, ана шунда гуллайди Ватан!», «тогоғолча ҳам ўғониб кетди, кийиб олди оқ гулли кўйлак», «ватан нелигини англар экансан, ...бошингда чирқираб айланаверса, ватанидан жудо бўлган лайлаклар.».

Муҳаббат ҳақидаги сатрлар ҳамма даврда ҳар бир шоир ижодида ажойиб истиоралар, ташбеҳлар ва янгидан янги топилмалар билан ўқувчи юрагини ҳаяжонга солиб келган. Чунки инсон яшар экан, унинг ўзи бир бутун оламдир. У ўз ички дунёсини ўзича тушунади ва намоён қилади. Шоира Гулбаҳор Ортиқхўжаеванинг муҳаббат ҳақидаги шеърларида ҳам дийдор, ҳижрон, ёлғизлик кечинмаларини бўёқларда чизиши ўқувчи эътиборини тортади. Унинг узоқ айрилиқдан сўнг кўришган ошиқ ва маъшуқ ўртасидаги дийдорни:

*Мен ўзимни йўқотиб қўйдим,
Сени топиб олган лаҳзада*

каби рангин, бадиий тизмаларда бериши шеърнинг тасирчанлигини ниҳоятда оширган. Ушбу жумлалардаги "йўқотиб қўймоқ" ва "топиб олмоқ" шак-

лидаги тазод санъатининг моҳирона қўлланиши ўқувчига завқ бағишлийди. Шоира ошиқ қўнгилнинг ҳижронли кунлардаги ёлғиз дамларини:

*Мени алдар ёлғизлигимда,
Қуриб қолган япроқлар рақси*

дея маҳорат билан ифодалайди. Ва шу баробарида кўнгил иқрорини очиб беради. Бу сатрларни ўқиганда кўз ўнгимизда атрофи куз билан куршаб олинган, ўзи эса дараҳтлардан тушаётган хазонрез барглар товушига кўнинкан ошиқ тимсоли намоён бўлади.

Шоира ижодида, айниқса, ошиқликдаги кайфияти, оний, ҳеч кимга ошкор этилмайдиган ҳолатларни ўқувчига етказиш устун туради. Бу кайфиятни ўқувчи шеърни ёлғиз синчиклаб ўқиши жараёнидагина ҳис қилиши мумкин.

*Усмон Азим. Куз. Менинг кўнглим.
Юрагимнига очиқ дарчаси.
Кўзларимга мўлтираб боқар,
Янги ойнинг синиқ парчаси.*

Ушбу шеърда шоир Усмон Азим шеърларидан таъсириланган, шикаста қалбнинг тушкун ҳолати куз кайфияти билан уйғунлашганига гувоҳ бўламиз. Одатда ёлғиз қолган, тушкун кайфиятдаги киши ойга боқиб хаёл суриши мумкин. Лекин шоира ушбу ҳолатга бошқа томондан ёндашади, яъни ой лирик қаҳрамоннинг кўзларига "мўлтираб" боқади. Янги чиқкан ҳилол эса унга тўлин ойнинг бир парчasi бўлиб кўринади. Лирик қаҳрамоннинг шикаста қалби ойга қиёсланиши гўзал поэтик топилмадир.

Биз иқтидорли шоира Гулбаҳор Ортиқхўжаеванинг ижоди бардавом, ёниқ бўлишини, ҳеч қачон хира тортмаслигини тилаймиз.





Макс АДЛЕР

Етпү Етпүгүр
Етпүгүр Етпүгүр
Етпүгүр



УЙҚУ АРАФАСИ

Хажвия

Роксбороулик жаноб Баттервик анчадан бери уйқусизлик касалига чалинган. Мана ҳозир ҳам пинакка кетиш учун қилган бесамар ҳаракатларидан сүнг, түсатдан ёдига бир алманаҳда ўқигани, уйқусизликни даволаш чораси тушиб қолди. Унда ухлаб қолиш учун хаёлга бир пода қўйни бирор тўсиқ устидан сакраётганини келтириб, кейин уларни санаш лозимлиги ёзилган. У шу тажрибани амалда қўллашга қарор қилди. Кўзларини юмиб тўсиқдан сакраётган қўйларни тасаввур қила бошлади. Бир юз қирқинчи қўйга келиб, жаноб Баттервик мудрай бошлади. Аммо түсатдан Баттервик хоним гапириб юборди:

– Йозеф!
– Ҳа, нима?
– Менимча сариқ товуғимиз жўжа очмоқчи.
– Оҳ, бундай арзимас гаплар билан уйқумга ҳалақит берма! Жим бўл-да, ухла!

Кейин Баттервик яна бошқатдан қўйларини санашни бошлади: У бир юз йигирманчи қўйга келган пайт яна кўзи мудрай бошлаганини сезди, бир юз йигирма биринчи қўй тўсиқдан ошиб ўтиш учун ҳавога кўтарилганди ҳамки, эгизаклардан биттаси бақириб ийғлаб юборди.

– Болангга қара! – деб, бақириб у Баттервик хонимга. – Нега сен уни тинчлантириб ухлата олмайсан-а?

Баттервик хоним болани ухлатиши биланоқ, Баттервик, асабийлашган ва ҳаяжоланаётган бўлса ҳам, бояги ишидан давом этишга қарор қилди. Хаёлий подані кўз олдига келтириб санашни бошлади.

Эндиғина олтмиш биринчи қўй хурсанчилик билан тўсиқдан сакраб ўтганди ҳамки, Баттервикнинг қайнонаси эшикни тиқиллатиб, куёвини сўроқлатди. Унинг уйғоқлигини билгач, орқа дарчани ёпишни унуганини, ҳозиргина боғда ўғрилар шовуруни эшитган-дек бўлганини маълум қилди.

Баттервик чойшабга ўраниб боқقا чиқди. Дарчанинг ҳар доимидек ёпиқлигини кўрган Баттервик, ётоқхонага қайтган заҳотиёқ эртага эрталаб, яхшиликча ё қайнонаси, ёки унинг ўзи уйдан чиқиб кетишини айтди.

Бўлган воқеаларга қарамай, у алманаҳда ёзилган тавсияга яна бир бор имкон бермоқчи бўлди. Бу сафар у икки юз қирқинчи қўйга етиб келди, бунақа, уч юзинчи қўйга етгунча у аниқ узоқ кутилган уйқуга шўнғиши аниқ эди. Лекин шу пайт қўшни боғдаги Макснинг янги ити эски уйини соғиниб, узоқ ва баланд овозда увиллай бошлади.

Баттервик ғазаб отига минганди. Қўйларга ҳам парво қилмасдан, у кўлига илинган нарса билан Макснинг янги итини “ўққа тута” бошлади. Товоқчалар, финжонлар ва қошиқлардан сўнг итга қараб Даниэл Вебстернинг гипсдан ишланган бюсти учди-ю, ит югурниб уясига кириб кетди. Ва тонгача эски уйи ҳақида сукунатда ўйлашга мажбур бўлди. Сабр косасига охирги томчи тушганини сезиб турса ҳам Баттервик альманаҳда маслаҳат берган олим тавсиясига яна бир амал қилишга уриниб кўрди. Шундай қилиб саксон иккинчи қўй ҳам эсон-омон тўсиқдан сакраб ўтганини кўриб, эндиғина тушлар оламига сокин шўнғиётган маҳал, тўсатдан Баттервик хоним уйқусираб гумбурлаган қўйи кораватдан йиқилиб тушди ва бу сафар эгизакларнинг иккаласини ҳам уйғотиб юборди. Болаларнинг чинқириғига қўшимчча, қайнона тепадан пастки қаватга бир вақтнинг тўрт қадам ташлаб, ҳозирги бўлган ер қимирлашини пастдаги болалари ҳам сезган-сезмаганини сўраб, учиб келаётганди.

Бўлиб турган ҳолат сўз билан тариф этиб бўлмас даражада ёмон эди. Баттервик унга бир муддат ақлдан озган кишидек қараб турди-да, кейин ёстиғини олиб, шаҳд билан орқа меҳмонхонадаги диван томон йўл олди. У ўн дақиқа ичиди, ҳеч қандай алманаҳнинг маслаҳатларисиз ухлаб қолди. Тушида Косвольд қўчқори уни экватор бўйлаб қувлаб юрганини кўрди. Эрталаб даҳшатли бел ва боз оғриғидан уйғонди. У энди Косвольд қўйлари фақат жун ва гўштликка яхши эканини, аммо мақташга умуман арзимаслигини теран англади.

**Инглиз тилидан Аидахон БЎМАТОВА
таржимаси**